

Udél dwata: gna
kesfasad ne lomi
kesfasad



New Testament in Tboli (RP:tbl:Tboli)

Udél dwata: gna kesfasad ne lomi kesfasad

New Testament in Tboli (RP:tbl:Tboli)

copyright © 2007 Wycliffe Bible Translators, Inc.

Language: Tboli

Translation by: Wycliffe Bible Translators, Inc.

Tboli

tbl

Philippines

Copyright Information

© 2007, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789718960715

The New Testament

in Tboli

© 2007, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022

07fe3f6f-241e-5f1e-a520-6090d606a884

Contents

Matyu	1
-----------------	---

Kun Snulat Matyu

Mò gna senfala

Bè yóm tehe knò Jisas te tonok, yóm tau hol geta bè Rom fen homong kmamal yóm kul benwu yó kem Ju. Yó gónón ali wen sendalù lemwót bè Rom nô bè klamangen benwu le. Sotu gónón ali mgel bè yó kem Ju yóm ali kdé bwis hbayaden kul yóm tau hol geta bè Rom. Wen kem Ju néléken mò fen gel mtuk bwis bè yó kem kul dumu Ju. Yó se ali kenlit yó kem Ju, mom kul dumu yóm fen mtuk kul, lelen glukas yóm gel ntuk le.

Matyu se yóm sotu Ju tehe gel mtuk bwis bè kem kun dumu Ju. Okóm bè yóm ktaba Jisas du, tódò kendel mimón, tódò tebelen yóm sana tehe kun nmò, ne du hlós baling sotu bè yó kem sfolò lewu gel lemolo ke Jisas.

Wen tehe eles hsulat Dwata yó kem gna tugoden ekni gbak ebè yóm tau deng tehe eles néléken mò hkamalen yóm klamangen, duhen yóm Misaya. Dè tulón Matyu bè nim sulaten ni lemwót bè yóm gna Sulat Dwata mò gónó le dmlólò du deng duhen Jisas se yóm hol Ngà Dwata, yóm Misaya tendo gel nangat le. Bud tulónen kul snéén là olon kem Ju du yóm tnóbóng Dwata, bede gomong tnóbóngén yó kem dumu tau bè klamangen benwu.

Mò gónóm hménég lebangen

- 1:1-2:23 Yó kem tau tehe gónó Jisas gu semfu, ne yóm kbalingen tau te tonok
 3:1-12 Kun ktolok yóm Jan gel mabtays
 3:13-4:11 Kehbabtays Jisas ke Jan, ne yóm ktilów Seitan du
 4:12-18:35 Ktolok Jisas bè klamangen prubinsya Galili
 19:1-20:34 Kógów Jisas bè syudad Jirusalim
 21:1-25:46 Yóm nmò Jisas bè Jirusalim bè yóm hol sòn knóen talak tonok
 26:1-27:66 Khatay le ke Jisas
 28:1-20 Klowlil Jisas, ne yóm bud kehegfannen bè yó kem gel lemolo du

*Yó kem tau tehe gónó Jisas gu semfu
(Luk 3:23-38)*

¹ Ni se kmò kestugoden yóm gónó Jisas Krays gu semfu bè yóm tehe kehbalingen tau. Semfu gu bè yóm tehe Dabid. Ne ke Dabid, sfu yóm tehe Abraham.

² Yóm Abraham ni, du se yóm hol kun mà yóm tehe Isak. Ne mngà yóm Isak, duhen Jakub.

Tikóng mngà Jakub, duhen Juda ne yó kem dumun setwoli hono logi.

³ Timbow mngà Juda kun, duhen Pérés ne Sira. (Yó boluy yé le, Tamar.) Mngà

Pérés, duhen Hisron. Yóm Hisron ni, mà yóm tehe Ram.

⁴ Tikóng mngà Ram, duhen Aminadab. Mngà Aminadab, duhen Nasun.

⁵ Mngà Nasun, duhen Salmun. Mngà Salmun, duhen Buas. (Ne yó boluy yé Buas, Rahab.) Mngà yóm Buas, duhen Ubid. (Ne yó boluy yé Ubid, Rut.)

Timbow mngà nim Ubid ni, duhen Jisi.

⁶ Mngà ke Jisi, duhen Dabid, yóm tehe sotu tau hol geta bè yó kem Ju.

Timbow mngà ke Dabid, duhen Selumun. (Yó yé Selumun, yóm tehe yehen Yuraya.)

⁷ Mngà yóm Selumun, duhen Rihubum. Mngà nim Rihubum, duhen Abidya. Mngà Abidya, duhen Asa.

⁸ Nim Asa ni, mà yóm tehe Jihusafat. Mngà Jihusafat, duhen Jihuram.

⁹ Mngà Jihuram, duhen Usaya. Yó kun ngà Usaya, duhen Jutam. Ne mngà Jutam, duhen Ahas. Mngà Ahas, duhen Hisikaya.

¹⁰ Nim Hisikaya ni, hol kun mà yóm tehe Manasi. Mngà Manasi, duhen Amon. Mngà Amon, duhen Jusiya.

¹¹ Mngà Jusiya, duhen Jékunaya ne wen kem twolihen.

Umahu kóm bè yóm kul kdaw yó, yó se yóm gotu kegef le kul ebè Babilun yó kem tau Israél.

¹² Yóm deng kkol le ditu bè Babilun yó kem tau yó koni, mngà Jékunaya, duhen Syaltil. Mngà Syaltil, duhen Sirubabél.

¹³ Mngà ke Sirubabél, duhen Abyud. Ne mngà Abyud, duhen yóm tehe Ilyakim. Mngà Ilyakim, duhen Asor.

¹⁴ Mngà Asor, duhen Sadok. Mngà ke Sadok, duhen Akim. Mngà Akim, duhen Ilyud. Mngà Ilyud, duhen Élyasar.

¹⁵ Mngà ke Élyasar, duhen Matan. Mngà Matan, duhen Jakub.

¹⁶ Mngà Jakub, duhen Jusif. Du se yóm tehe myehen ke Midi, Yé Jisas. Jisas se yóm bnoluy le Misaya, yóm deng nélék Dwata mò kmamal yóm klamangen.

¹⁷ Duhen yó, sfolò fat duléken mugod lemwót bè Abraham efet kól bè Dabid. Ne bud sfolò fat duléken se mugod lemwót bè Dabid efet kól bè yóm kegef le kul ebè Babilun yóm kdé kem tau Israél. Bud sfolò fat duléken se mugod lemwót bè yóm kegef le kul ebè Babilun efet kól bè yóm ksut Jisas Krays, yóm Misaya.

Ksut Jisas Krays

(Luk 2:1-7)

¹⁸ Ni se mò kewóten yóm tehe ksut Jisas Krays. Yóm yéén Midi, deng leninti yóm sotu sawang logi boluyen Jusif. Okóm yóm gu laan le là deng sgefet, tódò mlutut Midi mlan bè Tulus Dwata.

¹⁹ Nim Jusif deng leminti ke Midi ni, tau tedeng kloloen yó kem hlau Dwata, okóm bè nim kwen bnurut Midi ni, là mójóen ke wen gónó Midi myak bè gónón wen. Yó gónón tódô tô lemifut mit du skó bè yóm deng klintihen du.

²⁰ Yóm igoen tolo hemdem du yóm yó, tódô wen hógów Dwata gu bè longit hegfan béleén bè knahen, monen mò du, “Ó Jusif, semfu gu bè Dabid, béi hengaya myehen ke Midi abay se lemwót bè Tulus Dwata yóm bnututen.

²¹ Angat logi yóm ngaen, ne yó boluyem du Jisas, yakà du yóm lemwà yó kem kun tau gu lem salà le.”

²² Bè ni kem ni, deng tódô tahu edu yóm tehe tulón Dwata hlanan bè yóm sotu tehe gna tugoden, yóm monen,

²³ “Angat wen sawang libun tódô mlutut, ne mngà logi, ne boluy le du Imanyuwél* (yó lanen yóm boluyen yó, tendo nô béle tekuy Dwata).”

²⁴ Timbow mukat Jusif bè yóm ktungóen yó, tódô nimónen yóm deng monen mò du yóm hógów Dwata, ne tódô nan e nangay Midi, nwtien ebè gónónen.

²⁵ Okóm song sentungóen, deng sut yóm ngaen logi. Ne yó boluy Jusif du Jisas.

2

Kauy le ke Jisas yó kem tau lemwót fi gu dmata kdaw

¹ Bè Bitlihim tehe gónó Jisas sut, yóm sotu benwu udi bè prubinsya Judiya. Bè yóm kdaw yó, Hirod yóm tau hol geta bè yó. Timbow deng malú legen udi yóm ksut Jisas, wen kem tau hulung hménég blotik gdek bè syudad Jirusalim, lemwót le fi gu dmata kdaw. Wen snólók le bè yó kem tau bè yó, mon le,

² “Gónóhen seblà sut de yóm ngà mò angkat geta bè yó kem Ju? Deng ton me gu ditu béle me yóm blotik mò ilò yóm ksuten. Nim nógów me ni, na me e hnódó.”

³ Mung kungol Hirod du yóm mon le yó, ya tey ktafa nawan, ne senced se yó kem dumu tau bè Jirusalim, gbót tafa nawa le se kul.

⁴ Omin Hirod gotu semtifun yó kem tau geta bè yó kem gel demsù ebè Dwata ne yó kem tau gel tmlók hlau, snólóken béle le, monen, “Benwu du de gónóhen seblà sut yóm Misaya, yóm deng kun nélék Dwata?”

⁵ Mon le se mò du, “Bè Bitlihim gónóhen angkat sut, yóm sotu benwu udi bè prubinsya Judiya. Yakà deng wen yóm tehe snulat yóm sotu tehe gna tugod Dwata ekni, yóm monen,

⁶ Nim Bitlihim, sotu benwu udi glem bè yóm kun benwu Juda.

Balù yóm tey kudien, là kóen na a glaan bè yó kem syudad bè yó, yakà bè nim benwu udi ni gónón sut yóm tau mò malak yó kem dou tau Israél.”*

⁷ Bè yóm kungol Hirod du yóm tehe hsulat Dwata yó, ominen lemifut tminok yó kem tau hulung hménég blotik yó koni, snólóken béle le yóm kdaw kegfanan béle le yóm blotik ton le yó.

⁸ Timbow deng tngónen, ominen hógów kul ebè Bitlihim, monen mò kul, “Hlós ye sen, mógów ye kut ebè Bitlihim na ye e hnebel yóm ngà lomi sut yó. Kesok ton ye, na ye e tulón dou dini anì naw e gbót hnódó se do.”

⁹⁻¹⁰ Tahu se, lemwót le. Bè yóm tolo knò le bè lan, tódô bud ton le yóm blotik tehe gfan béle le bè benwu le. Ya tey kehlugal le bè yóm bud kton le du. Tódô tendo holun tukò gna kul efet htengen ta yóm gónó gónón nô yóm ngà.

¹¹ Yóm kkól le bè yó, tódô le husek elemen, ne ton le se yóm ngà lewu le Midi, yóm yéen. Uni le mton du, tódô le henmung mtud bukól klohoken ne ya tey kdóyon le du. Omin le makat yó kem kimu ali mebetes nwtit le mò basa le du. Wen se tahu blówónen, ne wen se yóm ali minggel boohen boluyen insinsu ne mira.

¹² Bè yóm kulék le, tólóng ne lan lolò le, abay se bud wen hekna Dwata kul anì là bud le mlán bè Hirod sok le mulék.

Klój le ebè Idyip le Jusif

¹³ Yóm kogol le mulék yó kem tau hulung hménég blotik yó, wen bud hógów Dwata gu bè longit bud hegfan bè kna Jusif, monen mò du, “Ó Jusif, btiki ne, géhé! nwtitem yóm ngà lewu le yéen etu bè Idyip. Tódô ye na nô ditu efet kól bè yóm bud khuléku kuy edini, yakà angkat hfebel Hirod du yóm ngà anì hfatayen.”

¹⁴ Tahu se, btik Jusif, ne kendel nwtien yóm ngà lewu le yéen, ne tódô le kem mógów kifu etu bè Idyip.

¹⁵ Ngang le nô bè yó efet matay Hirod. Ni se deng kdohoen yóm tehe mon Dwata bè Sulaten, hlanan bè yóm sotu tehe gna tugoden ekni, yóm monen, “Tnabahu yóm Ngau anì mulék gu bè Idyip.”

Kehfatay Hirod yó kem ngà

¹⁶ Timbow dilò Hirod yóm deng kegsukaten bè yó kem tau hulung hménég kógów blotik, ya tey sidek kebuten. Yó nmoen, gotu hfatayen kdéan gu logi tolo udi bè Bitlihim ne yó kem dumu benwu hmilol bè yó. Lemwót bè yóm ngà logi tolo

* 1:23 Isaya 7:14, 8:8,10.

* 2:6 Mika 5:2. 2 Samwél 5:2.

hulô efet kól bè yóm ngà logi deng lewu halayen, gotu hfatayen lu. Deng eles nsóhen yóm deng kegenen sut yóm blotik lemwót bè yóm ktulón le du du yó kem tau hulung hménég kógów blotik.

¹⁷ Bè yóm nmò Hirod yó, deng gónón dohò yóm tehe tulón yóm sotu tehe gna tugod Dwata ekni boluyen Jirimaya, yóm monen, ¹⁸ “Wen tey dnumu mkik bè yóm benwu boluyen Rama.

Ani monem dnumu nkik Rakél kem ngaen ne là kô wen gembek mifa du, abay se, deng le gotu matay yó kem ngaen.”*

Bud kesfulék le Jusif ebè Nasarit

¹⁹ Timbow deng matay Hirod, wen bud hógów Dwata gu bè longit na a hefan bè kna Jusif ditu bè Idyip, monen mò du,

²⁰ “Ó Jusif, btiki ne, nwitem mulék yóm ngà lewu le yéen ebè yóm kuy benwu bè Israél. Deng le gotu matay ne yó kem tau tehe tò hmatay du yóm ngà.”

²¹ Tahu se, btik Jusif, nwiten yóm ngà lewu le yéen, mulék le ebè Israél.

²² Timbow gungol Jusif, yóm ngà Hirod boluyen Arkilus tles mogot bè prubinsya Judiya, yó gónó Jusif likò bud nõ bè yó. Bud hekna Dwata ke Jusif ani hlôs ebè prubinsya Galili.

²³ Tahu se, ne bè yó gónó le nõ bè yóm sotu benwu udi boluyen Nasarit. Ni se deng gónón dohò yóm tehe mon yó kem tehe gna tugod Dwata ekni, yóm mon le, “Angat boluy le du tau lemwót bè Nasarit.”

3

Ktolok yóm Jan gel mabtays

(Mark 1:1-8; Luk 3:1-18; Jan 1:19-28)

¹ Bè yóm kdaw yó, sut yóm sotu tau boluyen Jan gel mabtays ditu bè yóm benwu laen hol tau menwu du bè prubinsya Judiya. Yó nmoen, gel hetngónen yóm Udél Dwata bè yó kem tau, yó monen mò kul,

² “Hegsel ye ne, knogol ye ne yó kem sidek gel nmò ye, yakà móyónen hto ne yóm buteng Dwata mogot tau.”

³ Nim Jan ni, du se gónón e gbak yóm mon yóm sotu tehe gna tugod Dwata ekni boluyen Isaya, yóm monen, “Wen sotu tau tmaba gu bè tum benwu laen hol tau menwu du.

Yó utóm tabahen, monen, ‘Eles hen-gifat ye yóm lan angkat lolò yóm gónó tekuy mogot.

Eles hentedeng ye yóm lan mò loloen.’ ”*

⁴ Nim Jan ni, yó nesen nmò le lemwót gu bè bul kamél ne yó hiletan kulit ógóf ne són tlangas ne tneb gel kenen.

⁵ Tey dê tau tendo gel mógów ebéléen na le e huungol yóm gel toloken. Wen se lemwót bè syudad Jirusalim, ne wen se gu bè klamangen prubinsya Judiya, ne wen se lemwót bè kem benwu hmilol yóm él Jurdan.

⁶ Ni kem tau ni, gotu benkas tulón le ke Jan yó kem salà le, ne bnabtays Jan lu bè yóm él Jurdan.

⁷ Timbow ton Jan yóm kógów le ebéléen yó kem Farisi dalang se yó kem Sadyusi na le e tò hbabtays béléen, tódó monen mò kul, “Ya nim yu, hol ye mkél bè ulal, gel henløyen ofi. Ilóu ofo kuy ke tò ye gewà lemen yóm angkat tafak Dwata tau ke olo ye hbabtays.

⁸ Ke deng knogol ye yó kem sidek gel nmò ye, hol hdiól ye bè kmò ye dé.

⁹ Ne bê ye abay tò ken-gel nawa yó dum kesfu ye gu bè yóm tehe Abraham ke yó tò lan ye gewà. Tódó tulónu kuy, balú ni he kem botu ni dé, botong gbek Dwata hembaling du tau mò semfu gu bè Abraham.

¹⁰ Ke hlingónu du yóm móyón ktafak Dwata kuy, hol lómón ke beyung deng eles mléd lem but yó kem koyu mò angkat sfeken kul. Ket koyu ke là gulit kbunghuen, angkat senfeken, ne tódó tudá elem ofi.”

¹¹ “Béléu do,” mon Jan, “él gel babtaysu kuy mò ilò yóm deng kehegsel ye. Okóm yóm huli do, yó kun kmò kbabtays yó kem tau mimón béléen, suen bélé le yóm Tulus Dwata. Bong yó kem tau là mimón le, ofi moen kul. Yóm tau huli do yó, tey mfasang sentahu. Là kóe knóón baluen ke heseke béléen.

¹² Hol lómón ke eles mit teef mò teefen yóm angkat knusuhen. Ne gotu otunen eta fol yó kem usoken. Lemwót yóm kafahen tódó ntemen bè yóm ofi laen kô dù tul katayen.”

Kehbabtays Jisas ke Jan

(Mark 1:9-11; Luk 3:21,22)

¹³ Bè yóm tolo lel Jan mabtays bè él Jurdan, sut béléen Jisas lemwót gu bè prubinsya Galili. Yó nógówen, nan e hbabtays ke Jan.

¹⁴ Okóm mom yó balà Jan du, monen, “Béi mom hbabtays béléu, ou dé bnabtaysem.”

¹⁵ Bnalà Jisas se, monen, “Kendolen ne. Hyu ke gotu nmò te yóm kóyó Dwata bélé te.” Tahu se, bnabtays Jan Jisas.

¹⁶ Timbow hahun gu lem él Jisas, tódó henmungun hnas bè longit, ne tódó tonen se yóm Tulus Dwata htuntun etahan gu bè longit, hol lómó kmoen obun, ne tódó mdef béléen.

¹⁷ Ne ominen wen mudél gu bè longit, monen, “Ni se hol dou Ngà tendo gónón nõ nawahu. Tey kligalu béléen.”

* 2:18 Jirimaya 31:15. * 3:3 Isaya 40:3.

4

*Ktilów Seitan ke Jisas**(Mark 1:12,13; Luk 4:1-13)*

¹ Bè yóm deng kehbabtays Jisas, omin yóm Tulus Dwata mit du etu bè yóm benwu laen dù tau menwu du. Ditu gónó Seitan tendo tó tmlíw du.

² Botong fat folò buteng Jisas là mken, ya tey sidek kbitilen.

³ Tódó sut béléen Seitan, ne monen mò du, “Ke tahu uu Ngà Dwata, henbalingem ken kun ni kem botu ni.”

⁴ Okóm yó balà Jisas du, monen, “Là kò yó du! Igoen deng mon du bè Sulat Dwata, ‘Là sòn du ken gónón mowil tau, okóm bè kdê yóm Udél Dwata se tahu hlowil du.’ ”*

⁵ Omin Seitan bud mit ke Jisas ebè Jirusalim. Niten ebè yóm hol gónón geta te ketef bè Gónó Dwata.

⁶ Ne ominen mon du, “Ke tahuhi Ngà Dwata, kmóhi lemwót bè ni kun, yakà sem deng monen du bè Sulat Dwata, monen, ‘Angat dók Dwata yó kem hógówen gu bè longit

mò na a smegef kóm anì là tódóen bè botu tihem.’ ”*

⁷ Bnalà Jisas se, monen, “Tahu se yóm monem yó, okóm wen sotu bud monen bè Sulat Dwata, monen, ‘Béem tnilów Dwata, yóm gónóhem mogot.’ ”*

⁸ Omin Seitan bud mit ke Jisas eta tfsù yóm tey bulul geta, ne gotu toloken du kdê yó kem benwu talak tonok ne yóm tey kehyuhen.

⁹ Mon Seitan mò ke Jisas, “Gotu hogotu kóm yóm kdéen ni, syan ke mtudi bukòl bè soluhu, ne ke béléu gónóm kmulu.”

¹⁰ Bnalà Jisas se, monen, “Mdóhi bè ni, Seitan! Yakà deng monen du bè Sulat Dwata, ‘Béem tnilów Dwata yóm gónóm mogot ne sòn du hol nimónem.’ ”*

¹¹ Tahu se, tódó tngak Seitan Jisas, ne sen-gengen se wen hógów Dwata gu bè longit gdek bè yó mò tmóbóng du.

*Kbut Jisas tmlók bè prubinsya Galili**(Mark 1:14,15; Luk 4:14,15)*

¹² Sotu kdaw bè yó gefet bè Jisas yóm deng kehblanggù Hirod ke Jan. Bè yóm kungolen du, tódó mulék ebè prubinsya Galili.

¹³ Hlós ebè kun benwu bè Nasarit, okóm là meneken bè yó. Bud hlós ebè Kapérnaum, ditu gónóhen hol nò. Nim Kapérnaum ni, sotu benwu bè kilil Lanaw Galili, glem lem yóm kul tehe tonok le Sibulun ne Naftali.

¹⁴ Bè yóm knó Jisas bè yó, deng gónón dohò yóm tehe udél Isaya ekni, yóm sotu tehe gna tugod Dwata, yóm monen,

¹⁵ “Yóm kun tonok tehe Sibulun, ne kun tonok tehe Naftali, kem benwu hnalak lan ebè mohin, benwu nô fatu yóm él Jurdan, hono benwu glem lem Galili, ne hono kem tau là Ju le nò du.

¹⁶ Hol lómón ke tau le nò lem gónón kmifu, okóm angkat wen tey layag ton le. Deng le golu elem hatay, okóm angkat hlayagen ebélè le yóm layag yó.”*

¹⁷ Nbuten bè yó ne, tmlók Jisas. Yó gel monen, “Hegsel ye ne, knogol ye yó kem sidek gel nmò ye, yakà móyónen hto ne yóm buteng Dwata mogot tau.”

*Kélék Jisas yóm tanay tau mò lemóló du**(Mark 1:16-20; Luk 5:1-11)*

¹⁸ Sotu kdaw bè yó yóm igò Jisas mentad ebè Lanaw Galili, tonen yó kem lewu tau setwoli hmuket le: Simun boluy yóm sotuhen, yóm gel bnoluy le Pitér ne Andru, yóm twolihen. Yó se kul sana gel nmò hmuket.

¹⁹ Tódó mon Jisas mò kul, “Ó kem tau hmuket, mung ye do ne. Wen tles hmou kuy, hebelu yu tau mò lemóló do.”

²⁰ Tahu se, kandel tódó tebel le huket le, ne mung le ke Jisas.

²¹ Ngang le bud mógów efet bud ton Jisas yó kem lewu tau setwoli, boluy le Jim ne Jan, hono ngà Sibidi. Tolo le nò lem ówóng le, mung kul mà le. Yó nmò le, bneteng le yó kem ksé huket le. Yóm kton Jisas kul, tódó ttabahen lu.

²² Tahu se, tódó tagak le bè yó yóm ówóng le ne mà le, mung le ke Jisas.

*Kkó Jisas yó kem des**(Luk 6:17-19)*

²³ Kewót Jisas bè yó, tódó lengeben prubinsya Galili. Yó nmoen, gel tmlók bè yó kem kul gónó le gel stifun yó kem Ju. Hetngónen kul yóm Tulón Hyu gbak ebè kun kogot tau Dwata, lelen gel hkó des yó kem tau, balù kihu kay des le.

²⁴ Deng tódó tfengen ebè klamangen prubinsya Sirya gónó le mungol du yóm nmò Jisas. Yó gónóm mon, gotu nwit le ebè Jisas kdê yó kem tau gemnóm des, yó kem tau semlaw kkólen bè yó kem tau lengel mata, ne yó kem tau snidaf, ne yó kem tau matay sfu lówó le, gotu hkó Jisas des le.

²⁵ Ya tey tau wen lemóló du lemwót gu bè klamangen Galili ne bè klamangen yóm benwu bnoluy le Sfól Benwu, ne bè syudad Jirusalim, ne bè klamangen Judiya ne yó kem dumu benwu sentu él Jurdan.

* 4:4 Hlau 8:3.

* 4:6 Lingón 91:11,12.

* 4:7 Hlau 6:16.

* 4:10 Hlau 6:13.

* 4:16 Isaya 9:1,2.

5

*Ktolok Jisas
(Luk 6:20-23)*

¹ Timbow ton Jisas yó kem tey tau wen, ominen mneged ete yóm sotu bulul udi ne bè yó gónón myón. Gotu le sbung e klohoken yó kem tau gel lemólò du,

² ominen mbut tmlòk kul, monen,

³ “Tey kehyuhen bélé le kul yó kem tau ke dilò le yóm kwen gónó le élél bè kehtahu le,

abay se deng le sana gmung ne bè yó kem tau nogot Dwata.

⁴ Tey kehyuhen bélé le kul yó kem tau ke wen lenangag le, abay se Dwata angkat mifa kul.

⁵ Tey kehyuhen bélé le kul yó kem tau ke là hegeta le knò le bè kem dumu le, abay se angkat guta le yóm deng fasad Dwata kul.

⁶ Tey kehyuhen bélé le kul yó kem tau ke hol nò bè nawa le mò du yóm kun kóyó Dwata,

abay se Dwata angkat hol hegsengel nawa le.

⁷ Tey kehyuhen bélé le kul yó kem tau ke hol knodu le kem dumu le, abay se angkat bud knodu Dwata lu se kul.

⁸ Tey kehyuhen bélé le kul yó kem tau ke laen dù belenen yóm kehedem le, abay se angkat ton le Dwata.

⁹ Tey kehyuhen bélé le kul yó kem tau ke hulung le semfyu kem dumu le, abay se angkat bnoluy Dwata lu kem kun ngà.

¹⁰ Tey kehyuhen bélé le kul yó kem tau ke hensidek le lu lemwót bè yóm kimón le ke Dwata, abay se deng le gmung ne bè yó kem tau nogot Dwata.

¹¹ Tey kehyuhen bélé ye,” mon Jisas, “ke henné le yu, ne ke hensidek le yu, ne ke dé sidek udél le eta ye lemwót bè yóm klólò ye do.

¹² Hol hnigal ye dé ke lómón yó kmò le kuy, abay se deng wen tey ofol deng eles fan Dwata kuy bè longit. Yóm keglayam ye yó, hol lómón sem yó ne yóm tehe kul keglayam yó kem tehe gna tugod Dwata ekni.”

*Yóm hlingón bè kahì ne layag
(Mark 9:50; Luk 14:34,35)*

¹³ Bud mon Jisas, “Yu kem tau lemólò do, hol lómón ke yu yóm kahì bè yó kem tau. Bede yóm kahì kesok deng mkó yóm khééten, là kò wen lanem bud hféét du ne. Laen kò bud muhen, tódò bot ne sensdà yó kem tau mógów.

¹⁴ Ne sotuhen, hol lómón ke yu yóm layag bè klamangen benwu. Yóm syudad nó ta bulul, laen kò dù gónón gseng.

¹⁵ Laen se kò tau hemtom solok ke tlek mom bud hnokoben. Kaem yó dé kmoen du, suen bè gónón mfatu anì lemayag ebè kdéén tau lem gónò.

¹⁶ Yake lómón yó se gel kmò ye bè yóm kuy layag. Hol nmò ye yóm hyu anì ton kem dumu tau, ne anì dóyón le yóm Mâ tekuy bè longit.”

Bud henblat Jisas yó kem tehe hlau Musis

¹⁷ Bud mon Jisas, “Bè ye tó hendem ke yó hendufu edini naw e kó yó kem tehe hlau Musis ne yó kem tehe gel tolòk yó kem gna tugod Dwata. Là kò yó du. Là kò kóhu kul. Nim nógówu edini ni, naw e dnohò yó kem deng tehe eles tolòk le yó.

¹⁸ Tódò tulónu kuy ktahuhen, bè yóm igoen tolo wen longit ne tonok, laen se kò mkó du yó kem tehe hlau Musis, balù sotu bè yó kem leneken, efet deng gotu dohò yó kem kdé tulónen.

¹⁹ Duhén yó, ke wen tau mulé du yó kem hlau yó, balù yó kem olo leneken, ne ke deng mom bud niten kem dumuhen tau mulé du, du se yóm hol glaen bè yó kem tau nogot Dwata bè longit. Okóm yóm tau mimón du yó kem hlau yó, ne lelen tmlòk du bè yó kem dumun anì nimón le se kul, angkat geta boluyen lem blóng yó kem tau nogot Dwata bè longit yóm tau yó.

²⁰ Tódò tulónu kuy,” mon Jisas, “song ye gmung bè yó kem tau nogot Dwata bè longit ke hol ye hgulit lemólò du yóm kun kóyó Dwata senta yóm kul kgulit yó kem tau tmlòk hlau ne yó kem Farisi.”

Bè keseflifót

²¹ “Deng hónò gungol ye se,” mon Jisas, “yóm sana hlau gnan, yóm monen, ‘Béi abay monok. Yóm tau monok, sal gel nwit le bè kukum.’

²² Okóm ni dou tulón kuy, yóm tau ke lenbuten kem dumuhen, angkat nwit le bè kukum. Yóm tau ke monen bè yóm dumuhen, ‘Laen dù muhem tau kóm,’ angkat nwit le ebè yóm tau gel hemdeng knukum yóm tau yó. Ne yóm tau ke monen bè yóm dumun, ‘Nungeli. Laen dù muhem tau,’ deng golu elem lanaw ofi ne yóm tau mudél yó.

²³ Yó gónóm mon, ke wen dsuem ebè Dwata, anien ke dengi kól bè yóm gónóhem demsú, okóm ke gtulón bè nawahem wen gónóm seglius bè dumum tau,

²⁴ nam na hlun tebel bè yó yóm dsuem, kendeli lemwót, mnihi seflifót bè yóm dumuhen seglius yó. Sok deng, ominem yó mulék nam e henfu demsú ebè Dwata.

²⁵ Sotuhén,” mon Jisas, “ke wen tau kmamo kóm, ne tó nwtén u bè yóm gónò skukum, tnanahi mit sefyu béléén gu laanen là deng gefet bè yó. Abay se ke dengi kól bè yó, ngem kà nwtén kóm ebè yóm tau gel fen

hemdeng kmukum kuy. Ne lemwót kun, blayen u bè fulis mò bmanngù kóm.

²⁶ Tódô tulónu kóm ktahuhen, là kói na a gewà ke là nam gotu gbayad du yóm salaem."

Ketgama yóm sindil

²⁷ "Deng hónô gungol ye," mon Jisas, "yóm sana hlau gnan, yóm monen, 'Béem ndà yehenem.'

²⁸ Okóm ni dou tulón kuy, balù bè olo ketngelem ebè yóm libun ke wen óyóem du gu lem, deng timbang snamukem ne, abay se deng deng bè yóm kehedemem du.

²⁹ Yó gónóm mon, ke mata kwananem mit kóm mò salà, tódô lensitem ne tudaem. Mom nyu béléem he ke lana sotu matahem olo ke nwiten u elem lanaw ofi.

³⁰ Sotun, ke sigel kwananem mit kóm mò salà, tódô kenlengem ne tudaem. Mom hyu béléem he ke lana sotu sigelem olo ke nwiten u elem lanaw ofi."

Bè keskó tau syehen

(Matyu 19:9; Mark 10:11,12; Luk 16:18)

³¹ "Bud sotun," mon Jisas, "monen bè yóm sana hlau gnan, 'Ke móyó skó bè yehenen yóm logi, hyu ke wen gónón fema mò ilò yóm deng kkhóhen du.'

³² Okóm yóm dou tulón kuy, là hyuhen yóm logi ke tódô kóhen yóm yehenen igoen là mdà du. Ke bud myehen dumu logi yóm libun yó, deng mdà yehen se kun, okóm yóm logi gna yehenen, du buten yóm kegsalaen. Ne yóm logi bud myehen du yóm libun yó, bud salaen bè Dwata se kun."

Bè ksafà

³³ "Ne sotun," mon Jisas, "deng hónô gungol ye yóm sotu hlau gnan tehe gel hlau yó kem fù tekuy, yóm monen, 'Ke wen deng fasadem bè Dwata, ne wen safà mung du, hol dnohoem.'

³⁴ Okóm ni dou bud tulón kuy, ke wen fasad ye, bè ye smafà. Bè ye abay safà longit, abay se bè yó gónó Dwata nò,

³⁵ duhen ke tonok, abay se bè yó gónó Dwata hmótól tihen, duhen ke Jirusalim, abay se yó kun benwu yóm Dwata hol geta bè kdéen.

³⁶ Ne bè ye abay tò safà kulu ye, yakem gbek ye se hbukay du duhen hfitem du balu sbalu bè yó kem wek ye.

³⁷ Tódô hen-el ye ke tahu, ne tódô mon ye 'là' ke là se tahuhen. Abay se ke mò ye safà, Seitan gónón gu lemwót yóm yó."

Bè kbeles

(Luk 6:29,30)

³⁸ "Sotuhén," mon Jisas, "deng hónô gungol ye yóm sotu hlau gnan, yóm monen, 'Ke wen hemsidek yóm kóm mata, tódô bud hemsidekem se yóm kun mata. Ne ke wen tau

temfok yóm kóm ngihi, tódô bud tenfokem se yóm kun ngihi.'

³⁹ Okóm ni bud dou tulón kuy, bè te abay bneles ke wen hemsidek tekuy. Mom yó nmò tekuy, ke wen temfê kut bè hifi te, bud bayà te du dolihén.

⁴⁰ Ne ke wen mtuk tekuy, ne yó nóyóen sotu kgal te, bud tennù tekuy sotu kgal sen.

⁴¹ Ne ke wen sendalù gmaga kut mit yóm kun nwit bè sotu kilumitru, tódô nwit tekuy béléen bè lewu kilumitru sen.

⁴² Ke wen tau mni bélé tekuy, benlay te. Ne ke wen tau tò mdóm bélé tekuy, hendóm te sen."

Kenbong tekuy nawa yó kem hmohon tekuy

(Luk 6:27,28, 32-36)

⁴³ "Ne sotun," mon Jisas, "deng hónô gungol ye yóm sotu hlau gnan, yóm monen, 'Kenbong nawahem yó kem dumuhem ne fen knutó nawahem yó kem hmohon kóm.'

⁴⁴ Okóm ni dou tulón kuy, kenbong nawa te yó kem hmohon tekuy ne hni te lu bè Dwata yó kem hemsidek tekuy,

⁴⁵ ani mkél tekuy bè yóm kut Mà bè longit. Ngem se kun, tódô gel homong hnóngen yóm kdaw ebè yó kem tau sidek nmò le. Senged se bè yóm kulón, là sòn du bè yó kem tau tedeng kmò le gónó Dwata hkulón du. Gomong snéen yó kem tau là tedeng kmò le.

⁴⁶ Bè ye abay tò hendón ke wen ofol blay Dwata kuy ke sòn yó olo kenbong nawa ye, sòn yó kem tau kembong nawa kuy. Balù yó he kem tau gel mtuk bwis, sana kul kesbong nawa se kul.

⁴⁷ Laen kò dù kayen yóm kuy kmò ke sòn yó hnódó ye, sòn yó kem hol kuy wè. Balù yó he kem tau là setngón ke Dwata, sana kul kesfódó se kul.

⁴⁸ Yó gónóm mon, hol ye hgulit, lómón kgulit yóm Mà tekuy bè longit."

6

Kmò któbóng tekuy kem tau élél

¹ "Ten-gama ye," mon Jisas, "ani là olo ye hegfán du bè gónón wen yóm gel keblay ye ebè Dwata. Ke yó olo tò mu ye du yóm gel keblay ye mò gónó ye megdóyón bè gónón wen, angat laen kò dù ofol blayen kuy yóm Mà tekuy bè longit.

² Duhen yó, ke wen blay ye bè yóm tau élél, bè ye abay hegfán lómón yóm kul gel nmò yó kem tau hemtedeng kmò. Tey gel kehegfán le du bè gónó le gel stifun ne gu bè lan bè gónón wen. Yó gónó le gel mò du ani dóyón tau lu. Tódô tulónu kuy ktahuhen, deng gotu guta le ne kul ofol yó kem tau yó bè yóm kdóyón tau kul.

³ Okóm ke tnóbóng ye yóm tau élél, bè ye abay hetngón, balù bè yóm hol dumuhem swè,

⁴ ani laen dù dumu tau temngón du. Ne yóm Mà tekuy bè longit, gotu tonen yóm là kehetngón ye du yó, ne du he angkat bemlay kuy ofol.

*Ktolok Jisas kul mni bè Dwata
(Luk 11:2-4)*

⁵ Ke mni ye bè Dwata,” mon Jisas, “bè ye dnalang kul kmò yó kem tau hemtedeng knò. Tey le móyò mdà mni bè Dwata lem gónó le gel stifun ne gu bè kilil lan bè gónón wen ani ton tau lu. Tódò tulónu kuy ktahuhen, deng gotu guta le ne kul ofol yó kem tau yó bè yóm kdóyón tau kul.

⁶ Okóm béle ye kuy, ke mni ye bè Dwata, ditu lem dfél ye gónó ye mò du, ne hyu tnikeb ye beng ye, ne mni ye bè yóm Mà tekuy bè longit, yóm là ton mata du. Ne yóm Mà tekuy yó, tódò tonen yóm là kehetngón ye du bè dumu tau, ne du he angkat bemlay kuy ofol.

⁷ Bè yóm kni ye, omin he ke ali sensulit ye udél ye lómón yóm kul gel nmò yó kem tau hemtahu bè yóm dwata kéng. Ofo kul ke yó gónón hmungol kul yóm kul dwata ke bè yóm ktahà kni le.

⁸ Bè ye dnalang yóm kul nmò yó. Kaem deng eles tngón yóm Mà tekuy bè longit yóm wen mu tekuy du gu laan tekuy là deng mni du béleén.

⁹ Duhen yó, ke mni ye bè Dwata, ni dé kmò ye du, mon ye,

‘Mà me bè longit, kóyò me ke kdéén tau hol madat yóm kóm boluy.

¹⁰ Kóyò me ke géhéel nogotem yóm klaman-gen.

Kóyò me ke hol nmò me te tonok yóm kóm kóyò, lómón yóm gel kmò le du dyò bè longit.

¹¹ Benlayem mi sfeng ken me ket haya.

¹² Hol hnifótem kum kem salà me, lómón yóm gel kehlifót me yó kem tau gem-salà béle me.

¹³ Béem bayà mi ebè yóm tilów mgel, bede hol kenlungem mi bè Seitan.’

¹⁴ Ke hnifót ye salà yó kem gamsalà béle ye, hnifót yóm Mà tekuy bè longit snéén yóm kuy salà.

¹⁵ Okóm ke là hnifót ye kul, là se hnifót Mà tekuy du bè longit yóm kuy salà.”

Kmò kfasting

¹⁶ “Bè yóm gel kfasting ye,” mon Jisas, “bè ye dnalang yóm kul kmò yó kem tau hemtedeng knò. Là kò le hgifat ani dilò tau béle le yóm kfasting le. Tódò tulónu kuy ktahuhen, deng gotu guta le ne kul ofol yó kem tau yó bè yóm kdóyón tau kul.

¹⁷ Okóm béle ye kuy, ke gel ye fasting, hyu ke gel ye hgifat mouf ne semwat

¹⁸ ani là dilò tau du béle ye yóm kmò ye du. Tek són Dwata dé temngón du, yóm Mà tekuy bè longit, yóm là ton mata du. Tódò

tonen yóm là kehetngón ye du bè kem dumu tau, ne du he angkat bemlay kuy ofol.

*Yóm kendengen bè longit
(Luk 12:33,34)*

¹⁹ Bè ye kat ali henyu te tonok yóm kendengen ye. Ke bè yó gónó ye hemyu du, gbek kaba hemsidék du, ne nké fak snéén yó kem dumuhen, ne gbek tau mnagaw husek elemen.

²⁰ Ni dé nmò ye, henyu ye bè longit dé yóm kendengen ye. Abay se ke ditu gónó ye hemyu du, laen kò dù kaba gembek hemsidék du, ne là kóén nké fak, ne laen dù hemnagaw du.

²¹ Yó se gónón nò kendengen ye, yó se gónón nò nawa ye.”

*Yóm hinged solok lówó
(Luk 11:34-36)*

²² “Yóm mata ye,” mon Jisas, “hol hinged solok lówó ye. Ke hyu mata ye, hol lómón ke lemayag lem lówó ye.

²³ Okóm ke là hyu yóm mata ye, hol lómón ke kmifu lem lówó ye. Hol ten-gama ye, déke laen dù layagen yóm lem lówó ye. Ke yó se kmoen, ya tey kget kifuhén.”

*Bè tekuy tnafa nawa kmò klowil tekuy
(Luk 16:13; 12:22-31)*

²⁴ “Laen dù tau,” mon Jisas, “ke lewu tau gónón mamo segeng gónón mò nmò. Déke mtukul knutó nawahen, ne mtukul se ken-bong nawahen. Déke mtukul fen nimónen, ne mtukul se fen sen-gilen. Dalang se kuy,” mon Jisas, “ke són filak ktes ye, là kò gbek ye mimón ke Dwata.

²⁵ Yó gónóhu mon du mò kuy,” mon Jisas, “bè ye abay tnafa nawa yóm kmò kken ye, ne yóm kmò kinum ye, duhen ke kmò knes ye. Sélét mom kken ye ne là gbek Dwata du, ani sem klowil ye du, Dwata tehe mò du. Ne sélét mom knes ye ne là gbek Dwata du, ani sem lówó ye yó du, Dwata tehe mò du.

²⁶ Tenngel ye dé yó kem onuk koyu. Laen kò hulu le, ne laen se kò dù bang nuta le, ne laen se kò dù fol le. Bede tódò wen gel htukóén kul yóm Mà tekuy bè longit. Milud he yó dum kuy, igoen bong kuy mu senta yó kem onuk koyu.

²⁷ Laen dù tau ke gbeken tódò htahà du udi ktahuhen lemwót bè ali ktafa nawahen klowilen.

²⁸ Ne moen de ke lenóngón ye nawa yóm kmò knes ye? Tenngel ye dé yó kem bulók lem bnes. Là kò le mò nmò kul, ne là se kò le mewel mò nes le.

²⁹ Okóm tódò tulónu kuy, balù yó hem ali kun kegeta Selumun ekni, ne yóm ali kwen kendengenen, ne yóm ali keklóón yó kem nes gel leseken, là kò nan e gsgenged du yóm kul keklóón yó kem bulók.

³⁰ Là kóen tahà se kul klowil yó kem bulók, olo le sut nim kdaw ni, ne bud le menes elem haya, ne tódô bot lu elem ofi. Ke minggel kmò Dwata kul yó kem bulók balù yóm tey kukol klowil le, mom milud he knesen kuy. Tey udi kehtahu ye nim yu.

³¹ Duhén yó, bè ye abay tnafa nawa yóm kmò kken ye ne yóm kmò kinum ye ne yóm kmò knes ye.

³² Ni se gel tnafa nawa yó kem tau là deng temngón ke Dwata. Okóm yóm Mà tekuy bè longit, deng eles tngónen yóm kwen mu ye du ni kem ni.

³³ Ni dé hol nmò ye. Hol hogot ye ke Dwata klowil ye, ne hol nmò ye yóm gel hmoen kuy. Ke yó se nmò ye, Dwata he angkat bemlay du kuy yó kem kdê wen mu ye du.

³⁴ Duhén yó, bè ye tnafa nawa yóm elem haya. Yó he kehedem ye du yóm yó ke deng bängen sut béle ye. Ke gel tnafa nawa ye yóm elem haya, olo ye mom bud temnú yó kem mgel deng gel sut béle ye ket haya.”

7

Bè tódô gel hendeng kun kmò sotu tau

(Luk 6:37,38, 41,42)

¹ “Bè ye tódô hendeng kul kmò kem dumu ye tau,” mon Jisas, “anì là hendeng Dwata du se yóm kuy kmò.

² Bè yóm gel kmò kehedeng ye yóm kul kmò kem dumu ye, bud lómón yó se angkat kmò kehedeng Dwata du yóm kuy kmò. Yó se nmò ye bè yó kem dumu ye, bud yó se angkat nmò Dwata béle ye.

³ Moen se ke snóló tennel ye huling kdumu ye igoen tolo wen bótóng geblekel lem yóm kuy mata?

⁴ Tedu kmò kton ye mkó du yóm huling kem dumu ye ke tolo wen yóm bótóng geblekel lem yóm kuy mata?

⁵ Yu kem tau hemtedeng knò. Na ye gna kó dé yóm tey geblekel lem yóm kuy mata anì hyu kton ye mkó du yóm huling kem dumu ye.”

⁶ Bud monen, “Bè ye duil tmulón yóm Udél Dwata bè yó kem tau gel hemné du, lómón ke blay ye bè ohu yóm kimu ali mebtés. Ngem kà mom nékéten kuy. Ne lómón ke blay ye bè sdó yóm ngom libun ali mebtés. Ngem kà gotu sninà ndaen du elem hitok.”

Bè là ktakas mni bè Dwata

(Luk 11:9-13)

⁷ Bud mon Jisas, “Ke wen hni ye bè Dwata, angkat guta ye. Ke wen hnebel ye, tódô ton ye. Ke mbal ye gu bak sut, tódô wen hotun kuy.

⁸ Ket tau ke wen hnihen bè Dwata, guta-hen. Ke wen hnebelen, tonen. Ke mbal gu bak sut, hotun Dwata.

⁹ Kmoen se kuy du, yu kem tuha, ke mni mambang béle ye yóm ngà ye, botu kô blay ye du?

¹⁰ Duhén ke mni utón él, ulal kô blay ye du? Là kô yó du.

¹¹ Balù yóm kuy là kgulit,” mon Jisas, “sana khulung ye bemlay kem ngà ye yóm hyu béle le. Milud he yóm Mà tekuy bè longit. Ke wen hni ye béleén, angkat wen tey hyu blayen kuy.

¹² Yó se nòyó ye nmò tau béle ye, yó se kuy nmò béle le. Ni se hol lemen yóm tehe hlau Musis dalang se yóm kul tolok yó kem gna tugod Dwata ekni.”

Yóm bak tikeb sikeb

(Luk 13:24)

¹³ “Hol hnusek ye yóm bak tikeb sikeb, abay se yóm bak tikeb ebè yóm lanaw ofi, tey lamang, ne tey mahil yóm lan edu, ne tey tau wen lemòlò du.

¹⁴ Okóm tey sikeb yóm bak tikeb ebè yóm klowil laen dù sónen, ne tey mgel lemòlò du yóm lan edu, ne là kóen hol wen tau mton du.”

Dilò bè kbunguhen yóm koyu

(Luk 6:43,44)

¹⁵ “Hol ten-gama ye yó kem tau tódô lembù tmugod ke Dwata. Hol lómó ktonem kul, lómón ke ubiha. Okóm bè yóm kmò le, hol le mkél bè yó kem ohu dlag.

¹⁶ Angat dilò ye lu bè kmò kekddol le. Hol lómón yóm hulu, sal gel dilò ye bè bungu le. Laen kó koyu semnual mungu soring. Ne laen se leteng mungu kmati.

¹⁷ Yóm koyu hyu, hyu se kbunguhen. Dalang se yóm koyu sidek, sidek se kbunguhen.

¹⁸ Yóm koyu hyu, là kóen na a sidek kbunguhen. Dalang se yóm koyu sidek, là kóen na a hyu kbunguhen.

¹⁹ Yóm koyu là hyu kbunguhen, tódô nofok kmò du, ne tudà elem ofi.

²⁰ Yó gónóm mon, tódô dilò ye bè kmò kekddol le yó kem tau lembù tmugod ke Dwata.”

Yóm tau kenbè Jisas

(Luk 13:25-27)

²¹ “Là kô kdéen du yó kem tau mon du ou yóm gónó le mogot, angkat gmung bè yó kem tau nogot Dwata,” mon Jisas. “Tek són olo gmung yó kem tau mimón yóm kun kóyó yóm Mà bè longit.

²² Kesok bängen hto yóm kdaw kkukum Dwata tau, angkat tey dé tau mon du mò do, ‘Ó Dwata, tehe gel hlan me bè kóm boluy yóm gel ktugod me ke Dwata. Bud hlan me bè kóm boluy se yóm tehe gel kehó me kem tulus seitan, ne yóm tehe gel kmò me yó kem hentaw ton.’

23 Okóm,” mon Jisas, “angit monu mò kul, ‘Là kò tngónu kuy. Hlayuk ye béléu, yu kem tau gel mò sidek.’”

Yóm hlingón bè yó kem lewu tau hàdà gónò (Luk 6:47-49)

24 “Duhén yó,” mon Jisas, “yó se tau hmungol udélu, ne nimónén, hol lómón ke du yóm tau hulung hedem hemdà gónò te botu.

25 Ne e demsù yóm tey kulón bong, ngangen ne dmunuk yóm él, ne mbel se yóm tey lenos bong. Tódò senloben yóm gónò yó, okóm là kò ghugónén du, abay se deng hdaen te botu.

26 Okóm yóm tau hmungol udélu,” mon Jisas, “ne là nimónén du, hol lómón ke du yóm tau là hulungen hedem, hemdà gónò talak helek.

27 Ne e demsù tey kulón bong, ngangen ne dmunuk él, ne mbel se yóm tey lenos bong, ne tódò senloben yóm gónò yó, ne tódò kendel hugón, ya tey sidek kegbaen.”

28 Yóm deng ktulón Jisas du kdé ni kem ni, tey kehtaw le du yó kem tau sbung,

29 abay se là mkélen bè yóm kul ktolok yó kem tau gel tmlok hlau bélélé. Ali mfangang yóm kun ktolok Jisas.

8

Kkó Jisas yóm des mifù (Mark 1:40-45; Luk 5:12-16)

1 Timbow deng kól gu lem bulul Jisas bè yóm ktoloken ditu, tey tau bud muluk huli du.

2 Wen tau gemnóm des mifù hlóni ebéléén, ne tódò tuden bukolen bè soluhén, ne hkodu béléén, monen mò du, “Ó Sér, ke yó dum móyói, kaem gbekem tódò hkó du nim desu ni.”

3 Tahu se, na e nenok Jisas yóm tau yó, monen, “Móyóe tmóbóng kóm. Mkó ne desém.” Ne tahu se, tódò sen-gengen se mkó béléén yóm des mifù yóm tau yó.

4 Mon Jisas mò du, “Hol béém abay tulón yóm deng nmou béléém ni. Tódói hekteng mógów ebè tum tau gel demsù ebè Dwata, nam e hetngel du lówóhem. Elesi se mit mò dsuem ani nmoem yóm sotu hlau Musis ekni mò gónó le milò du kem dumu tau yóm deng kkó yóm desém.”

Kehtóbongen bè Jisas yóm sotu tau kfitan lemwót bè Rom (Luk 7:1-10)

5 Ngang Jisas mógów efet kól bè Kapérnaum. Wen sotu tau kfitan nô bè yó, tau lemwót gu bè Rom. Senlongen Jisas ne hkodu béléén,

6 monen, “Ó Sér, wen sotu tau gel mò nmò béléu nô bè gónóu. Là buden dmemen doli lówóhen, ya tey sidek kegnómen du.”

7 Mon Jisas se mò du, “Yó ne, mógówe edyó naw e hkó béléén yóm desen.”

8 “Bè, Sér,” mon yóm kfitan yó koni. “Là knóónen ke tói motun bè dou gónò, yakà tauhe lemwót bè Rom dou. Olom tódò hemwit udél ne, kaem tódò mkó he tum desen.

9 Henknahu béléu se ke ou,” mon yóm kfitan. “Wen se kem tau geta sentahu gónóhu kmulu, ne gel nimónu. Ne wen se kem sendalù dou nalak, ne sal gel nimón le o. Sok monu mò yóm sotu, ‘Tu ne,’ tahu se, tódò kendel lemwót. Dalang se ke monu, ‘Géhéli,’ tódò kendel sut. Sok monu bè yóm heseku, ‘Nmoem nii,’ yó se tódò nmoen.”

10 Timbow gungol Jisas nim mon nim kfitan ni, tey kehtawen du, ne monen mò yó kem tau gel lemòlò du, “Tódò tulónu kuy ktahuhen. Laen dù tau tonu bè klamangen Israél ke lómón ni hol kehtahuhen béléu.

11 Ni tódò tulónu kuy. Bè yóm mò ken bong angat nmò Dwata bè longit bè yó kem tau nogoten, angat tey dè tau là Ju le lemwót fi gu dmata kdaw ne fi gu desdef, angat le gotu na a seyón mken bè tu kem tehe fù me Abraham ne Isak ne Jakub.

12 Okóm yó kem Ju, yóm hol bak mfun du yóm kogot Dwata tau, là kò le gmungul kul. Angat gotu tudà le lu ditu ebè yóm gónón ali kmifu, ne bè yó tendò gónó le heslaf dmumu mkik, ne sembéhé kakim.”

13 Ne bud beklil Jisas ebè yóm kfitan yó koni, monen mò du, “Muléki ne. Tonem bunguhen he yóm deng kehtahuhen.” Ne tahu se, tódò sen-gengen se mkó des yóm tau mò nmò bè yóm kfitan yó.

Kkó Jisas des yó kem tey tau wen (Mark 1:29-34; Luk 4:38-41)

14 Kewót Jisas bè yó, hlós ebè gónò Pitér. Kól bè yó, tódò glohen tuón Pitér libun gemnóm des kini là lembó.

15 Omin Jisas na a mogot bè sigelen, ne tódò sen-gengen se mkó yóm tey des kinien. Ominen hlingas btik, ne tódò kendel mò ken bè le Jisas.

16 Timbow deng sdef kdaw, tey dè tau lengel mata nwit le ebè Jisas. Hanà tek olo udél Jisas ebélélé le deng le sana gotu mó yó kem tulus seitan malak kul. Kkólen bè yó kem des yó kem dumu tau, gotu hkó Jisas.

17 Nim nmoem ni, deng gónóhen dohò yóm tehe udél Isaya, yóm sotu tehe gna tugod Dwata ekni, yóm monen, “Balú kihy des tekuy, gotu kóhen.”

Yó kem tau tò lemòlò ke Jisas (Luk 9:57-62)

18 Bud sotu kdaw bè yó, ton Jisas yóm ali kwen tau sbung ebéléén, monen mò yó kem gel lemòlò du, “Hlós tekuy ne efatu lanaw.”

19 Okóm wen sotu bè yó kem tau gel tmlok hlau sut béléén, monen mò ke Jisas, “Ó Sér, lolou uu balú kihy gónóm e mógów.”

²⁰ Mom yó balà Jisas du, monen, “Wen lefunges kul gel nulék yó kem bolos, ne mdengen kul sala yó kem onuk koyu, okóm yóm Ngà Tau, laen dù mdengen gónóhen hegnô.”

²¹ Bud wen sotu tau gel lemòlò du mon du mò du, “Ó Sér, naw na lebeng mà he, ominu yó lemòlò kóm.”*

²² Mon Jisas se mò du, “Tódò hebengem tu he kem kun dumu là hemtahu yóm maem. Okóm fen, loloem ou kóm.”

Keteflok Jisas yóm lenos

(Mark 4:35-41; Luk 8:22-25)

²³ Kogolen bè yó, omin Jisas motun elem yóm ówóng, mung le du yó kem gel lemòlò du.

²⁴ Bè yóm igò le mówóng talak lanaw, tódò mbel yóm tey lenos bong, ne botong tó glimun lewók yóm ówóng le. Okóm ke Jisas kun, deng mom fen tungò.

²⁵ Tódò le mógów ebéléen yó kem gel lemòlò du na le e bantik, mon le mò du, “Ó Sér, tnóbóngem mi. Hatay tekuy ni.”

²⁶ Bnalà Jisas se lu, monen, “Mò ye kat ali likò ni du? Tey udi yóm kehtahu ye.” Ominen yó tódò hboluk btik, ne mudél ebè yóm lenos ne yóm tey lewók, monen, “Botongen ne.” Ne tahu se, tódò sen-gengen se menek gu talak lanaw.

²⁷ Tey ketnga yó kem tau gel lemòlò du, mon le, “Tau du de ni? Balù yóm lenos ne yóm lewók, botong nimón le.”

Kehdò Jisas yó kem tulus seitan malak yóm lewu kem tau

(Mark 5:1-20; Luk 8:26-39)

²⁸ Timbow le gefet fatu lanaw bè benwu yó kem tau Girasin, wen lewu tau lengel mata semlong ke Jisas, lemwót le gu lem yóm kilib gónó le gel lembeng. Tey sidek klóbò le lemwót bè yó kem tulus seitan malak kul. Laen kò dù tau mlos gel mlan ebè yó.

²⁹ Timbow ton le Jisas ni kem lewu tau ni, ya tey sidek klangat le, mon le mò du, “Uu se Ngà Dwata. Tedu tó nmoem belé me ni du? Nam e kendel tó tna fak mi kò gu laanen là deng hto yóm hol bantangem mò du?”

³⁰ Bè yóm kdaw yó, kulel se kul keswól bè yó yó kem tey sdò wen, bede geblà klayuken belé le.

³¹ Ne yó hol henkodu le bè Jisas yó kem tulus seitan yó koni, mon le mò du, “Ke yó hendufem nam e hdó mi, tódò hfusekem mi ebè tu ne kem sdò tuu.”

³² Tahu se, hlus Jisas lu. Uni le tmagak yó kem lewu tau yó koni, tódò le husek ebè tu kem sdò. Kewót le se kul yó kem tey sdò wen, gotu le sedlu mlóy mosol ebè tubaw

kbu yóm lanaw, ne tódò le gotu gekmò elem lanaw, ne gotu le lemneb yóm kdé le.

³³ Kewót le se kul yó kem tau gel semgyok sdò, gotu le mlóy ebè yóm benwu moni bè yó. Gotu tulón le yóm kdé ton le, dalang se yóm deng nmò Jisas bè yó kem lewu tau tehe lengel mata.

³⁴ Mung kungol le du yó kem tau bè yóm benwu yó, tódò le gotu sguku ebè Jisas. Timbow le ston du, tey kehkodu le beléen ani tntagaken yóm benwu le.

9

Kkò Jisas des yóm tau matay sfu lówóhen (Mark 2:1-12; Luk 5:17-26)

¹ Bud kewót le Jisas bè yó, motun le elem yóm ówóng, mulék le efatu lanaw ebè yóm benwu gónó Jisas nò.

² Bè yóm kólò le ditu, tódò glo Jisas yóm tau deng matay sfu lówóhen, sentihang le ebéléen. Timbow ton Jisas yóm ali kehtahu le beléen, yó gónón tódò mon du ebè yóm tau matay sfu lówóhen, “Hol hgelem nawam, Man. Deng hñifótu ne yó kem salaem.”

³ Timbow gungol yó kem tau gel tmolok hlau yóm udél Jisas yó, mom yó hendem le, “Moen tau ni ke hsengeden knóen bè Dwata?”

⁴ Tódò tngón Jisas yóm nò lem hendem le, yó gónón mon du mò kul, “Moen de ke sidek kmò kehedem ye ebéléu?”

⁵ Là kóen na a mahil mon du, ‘Hñifótu ne yó kem salaem.’ Ne là se kóen mahil mon du, ‘Btiki, ne mógówi.’

⁶ Ni naw hton kuy yóm kwen kwalisen hmifót salà yóm Ngà Tau yóm igoen tolo nò te tonok.” Ne omin Jisas bud mudél ebè yóm tau deng matay sfu lówóhen yó, monen mò du, “M dai ne, Man, ne nitem yóm gónó le mit kóm yóó, ne muléki ebè gónóem.”

⁷ Ne tahu se. Tódò btik yóm tau yó koni, ne tódò mulék ebè gónóen.

⁸ Timbow ton yó kem tau sbung nim nmò Jisas ni, tó le likò, lel le dmóyon ke Dwata bè yóm tey kfasang blayen bè tau.

Ktaba Jisas ke Matyu mò lemòlò du (Mark 2:13-17; Luk 5:27-32)

⁹ Bud kewót Jisas bè yó, tódò tonen yóm sotu tau fen gel mtuk bwis boluyen Matyu, myón bè fsinaen. Bè yóm kton Jisas du, tódò monen mò du, “Ó Wè, loloem o.” Ne tahu se, mung kdà Matyu bè yó, loloen Jisas.

¹⁰ Bè yóm igò le Jisas ne yó kem gel lemòlò du mken bè gónó Matyu, tey dè bè yó kem dumu tau gel mtuk bwis dalang se yó kem dumu tau gemsalà, gbót seyón kul mken bè yó.

¹¹ Timbow ton yó kem Farisi nim ni, tódò le mógów ebè yó kem tau gel lemòlò ke Jisas,

* 8:21 Yó sotu lanen yóm udélen ebè Jisas yó, “Nan matay mà he, Sér, ominu lemòlò kóm.”

ne mon le mò kul, “Moen de yóm tau gónó ye gel htolok ke deng mom segbót mken bè yó kem tau yóó?”

¹² Mung kungol Jisas du yóm mon le yó, yó gónón mon du mò kul bede hningónen, “Yóm tau ke laen dù desen, là kô snoloen du kun yóm tau mulung. Són yóm tau wen desen mebel yóm tau mulung.

¹³ Hol hennagi ye dé lanen yóm sotu monen bè Sulat Dwata, ‘Keskodu dé yóm hol nóyóu bélé ye,’ mon Dwata, ‘là kô dsú du.’* Duhén ni se yóm nógówu edini ni,” mon Jisas, “là kô ttabahu kul yó du kem tau tedeng kmò le. Okóm yó ttabahu, yó kem tau gamsalà.”

*Ktolok Jisas lan yóm fasting
(Mark 2:18-22; Luk 5:33-39)*

¹⁴ Kogolen bè yó, sut le bè Jisas yó kem tau gel lemólò ke Jan yóm gel mabtays, wen snólók le béléén, mon le, “Ó Sér, bélé me kum, dalang se bè yó kem Farisi, gel wen kdaw me fasting. Moen de ke là gel nmò le du yó kem gel lemólò kóm?”

¹⁵ Ne bnalà Jisas lu, bede hningónen, monen, “Ke wen mò ken, là gbek le du ke là gbót le mken yó kem tau hol bak mulu yóm i goen tolo nó bélé le yóm logi myehen. Okóm angkat wen kdawen tódò kwa le du bélé le yóm logi myehen. Yó he kton ye kul fasting.”

¹⁶ Ne wen bud tulón Jisas kul bè yóm là kehyu sembool du yóm kun tolok bè yóm tolok gna, bede bud hningónen, monen, “Laen kô dù tau se ke namà kenséen yóm nes lomi mò klefengen yóm kgal bolok. Ke yó tó nmoen, ngem ke kemsong yóm nes lomi, tódò ksé yóm kgal bolok.

¹⁷ Ne sotuhen, laen kô dù tau ke ilihen elem yóm sning kulit ógóf deng legen yóm tifas hanà lomi. Kmoen yóm tifas yó ke kmodik, ne mom btù yóm gónóhen e mili du, abay se lemtò bè yóm deng kkodoken. Ne gotu gamà yóm tifas, ne baling sidek yóm gónóhen nò. Yó dé kun yóm tifas ke hanà tolo lomi, ilihem bè yóm sning kulit ógóf hanà tolo lomi snéen. Ke yó se kmoem du, là kóen btù yóm sning kulit ne là se gamaen yóm tifas.”

*Kehekó Jisas des yóm libun mdú nesen, ne kehlowilen yóm ngà libun deng mlef
(Mark 5:21-43; Luk 8:40-56)*

¹⁸ Yóm igò Jisas tolo tmulón du kul ni kem ni, wen sotu Ju wen glalen mógów ebéléén, ne tódò na a mtud bukol bè soluhen, ne monen mò du, “Ó Sér, wen yóm ngau libun deng lewaken nawan koni. Okóm holi mung do nam e nenok do ani bud mowil.”

¹⁹ Tahu se, tódò mung du Jisas ne yó kem gel lemólò du.

²⁰ Yóm igò le mógów mulit lan, wen sotu libun gemnóm des tenbalung mógów huli ke Jisas, ten-gafit nduen nesen. Abay se deng sfolò lewu halayen kegenen gemnóm du yóm desen.

²¹ Yó hendemen, “Baluen ke olohu gemdù nesen, kaem tódò mkó nim desu.”

²² Unin mdú du, beklil se Jisas, ne tódò tonen yóm libun yó, monen mò du, “Hgelem nawam ne, Lenibun. Yóm kehtahuhem béléu, yó se gónón mkó yóm desém.” Ne tahu se, tódò sennganen se mkó yóm desen.

²³ Ne omin Jisas hlós ebè gónó yóm tau wen glalen yó koni. Timbow le kól bè yó, husek elemen, ne tódò tonen yó kem tau stifun tó na a mung lembeng, lel tey kehebnes le. Mon Jisas mò kul, “Na ye hewà bè ni kdé ye.

²⁴ Là kóen deng matay he yóm ngà libun yó, tódò olon tungò.” Okóm deng mom són mò le hemkeng du yóm mon Jisas yó.

²⁵ Timbow gotu hefewaen yó kem tau, omin Jisas mógów elem dfél yóm ngà libun yó koni, ne nogoten sigelen, ne tódò kendel btik se yóm ngà.

²⁶ Tódò lengeben klamangen benwu le gónón e mból yóm deng nmò Jisas yó.

Kehton Jisas yó kem lewu tau butò

²⁷ Timbow bud lemwót bè yó Jisas, wen lewu tau butò kemtes huli du ne tmaba le ebéléén, mon le, “Ó Sér, sfu tehe Dabid, hol knoduhem mi.”

²⁸ Timbow kól lem yóm gónò gónón e solu Jisas, kól le se béléén yó kem lewu tau butò yó koni, ne wen snólók Jisas bélé le, monen, “Hentahu ye kó yóm kegbeku hton kuy?”

Bnalà le se, mon le, “Hentahu me se, Sér.”

²⁹ Omin Jisas mnok bè mata le, monen, “Yó ne, guta ye balaen ne yóm deng kehtahu ye yó.”

³⁰ Ne tahu se, tódò sen-geng le se bud mton. Ne tey kehget kmon Jisas du mò kul, “Bè ye abay tulón bè kihu tau nim deng nmou bélé ye ni.”

³¹ Okóm bè yóm kulék le, deng mom sensból le bè klamangen yóm benwu yó yóm deng nmò Jisas bélé le.

Khudél Jisas yóm tau umew

³² Hol le se lemwót yó kem lewu tau tehe butò yó koni, wen dumu tau bud gdek ebè Jisas, wen nwit le tau là buden gudél lemwót bè yóm tulus seitán malak du.

³³ Timbow hdó Jisas yóm tulus seitán nò béléén, tódò bud gudél se yóm tau yó. Tey ketnga le du yó kem tau sbung bè yó, mon le, “Là kô deng wen ton tekuy bè klamangen Israél deng mò du yóm kun nmò nim tau ni.”

³⁴ Okóm kul yó kem Farisi, mom yó kmon le du, “Kaem lemwót bè Seitán yóm kul

* 9:13 Husiya 6:6.

ogot yó kem tulus sidek, yóm kfasangen hdó tulus seitan yóm tau yó.”

Kkodu Jisas yó kem tau

³⁵ Kogolen bè yó, lemwót Jisas nan e gotu nauy yó kem benwu leembang kkólen bè yó kem benwu lemnek. Yó nmoen, nan e gel tmlolok bè yó kem gónó le gel stifun. Gel tulónen yóm Tulón Hyu lemwót bè kogot Dwata tau, luken hkó kentihen kay des yó kem tau.

³⁶ Bè yóm gel ktonen yó kem tey tau wen gel sbung ebéléen, tey kkoduhén kul, abay se tey dê gónó le glayam, ne laen kô dù tmóbóng kul. Lómó ktonen kul, lómón yó kem ubiha laen dù tau mdengen semgyok kul.

³⁷ Yó gónón mudél ebè yó kem gel lemolo du, bede hningónen, monen, “Tey nuta, okóm là holen wen tau muta.

³⁸ Hol ye mni bè Dwata dé yóm fun nuta anì wen tau hógówen mò na a muta.”

10

Kélék Jisas yó kem sfolò lewu mò gel hógówen

(Mark 3:13-19; Luk 6:12-16)

¹ Sotu kdaw bè yó, gotu htaba Jisas yó kem sfolò lewu gel lemolo du, ne gotu benlayen lu kwalis anì gbek le hdó yó kem tulus seitan ne hkó des, balù kihu klasihen.

² Yó boluyen kul aposol. Ni se boluy le: Simun yóm boluyen du Pitèr ne yóm twolihén Andru. Tmodol du Jim ne yóm twolihén Jan kem ngà Sibidi.

³ Omin le Filip ne Bartulumyu, ne Tumas, ne Matyu yóm tau gel mtuk bwis. Ne yóm sotu Jim ngà Elfiyus, ne Tediys,

⁴ ne yóm sotu Simun yóm tau tehe mung mofin yóm kul benwu, ne Judas Iskariyut yóm tau fen bemlay sumóng ke Jisas.

Khógów Jisas yó kem tau néléken

(Mark 6:7-13; Luk 9:1-6)

⁵ Kewóten bè yó ne, gotu hógów Jisas yó kem sfolò lewu tau néléken, ne wen hlauhen kul, monen, “Bè ye mógów ebè kul benwu yó kem tau là Ju le, dalang se ebè kul benwu yó kem tau Samarya.

⁶ Yó gónó ye e mógów ebè tu kem kwen tekuy tau Israél, abay se hol lómón tó le ubiha tabag.

⁷ Ne ye e tulón kul yóm mýón kehto yóm buteng Dwata mogot tau.

⁸ Hkó ye des yó kem tau semlaw, ne hlowil ye ke wen tau matay. Hkó ye yó kem gemnóm des mifú, ne hdó ye bè yó kem tau lengel mata yó kem tulus seitan malak kul. Deng wen blay Dwata kuy yóm là benli ye du. Duhen yó, ke wen tau angkat tnbóng ye, bè ye abay hbayad lu.

⁹ Bè nim kógów ye ni, bè ye abay mit filak.

¹⁰ Bè ye se abay mit bag, ne olon sotu kgal lesek ye, bè ye abay mit mò gewuhen. Bè ye mit tlumfà, duhen ke tuced. Abay se knóón bè yó kem tau mò nmò ke tódò benlay yó kem tau gónó le mò nmò ke wen gónó le élél.

¹¹ Ke sut ye bè yóm benwu bong duhen ke bè yóm benwu udi,” mon Jisas, “hol hnebel ye yóm tau mýò hmódó kuy. Béléen gónó ye mefet efet kól bè kulék ye.

¹² Ke motun ye bè yóm gónó, yó mon ye mò yó kem tau nô lemen, ‘Dwata he henek nawa ye.’

¹³ Ke hnódó le yu yó kem tau bè yóm gónó yó, angkat wen kenek nawa le. Okóm ke là hnódó le kuy, laen se kô kenek nawa le.

¹⁴ Ne ke wen benwu là hmódó kuy, ne ke là dog hnungol le kuy, tódò tnagak ye yóm benwu yó, olo ye tmótók kfung bè ti ye.

¹⁵ Tódò tulónu kuy ktahuhen, ke deng kól yóm kdaw kkukum Dwata tau, angkat tey bong ktafaken kul yó kem tau bè yóm benwu yó senta yóm ktafaken yó kem tau tehe alì mò sidek bè Sodom ne Gomora.”

Keglayam lemwót bè kehtahu

(Mark 13:9-13; Luk 21:12-17)

¹⁶ “Ngem,” mon Jisas, “bè nim khógówu kuy ni, lómón ke ubiha mógów elem blóng tu kem lóbò lem bnes boluyen wolf. Hol ye hfulung temgama, lómón yóm kul khulung temgama yó kem ulal. Ne hol hninggel ye knawa ye, lómón yóm kul klinggel knawa yó kem obun.

¹⁷ Eles ye temgama, abay se angkat wen kem tau kemfò kuy, nit le yu ebè yóm gónó skukum, ne nabid nfes le yu bè yó kem kul gónó gel stifun yó kem Ju.

¹⁸ Lemwót bè yóm klolò ye do gónó le angkat mit kuy bè solu yó kem gubérnor, ne bè yó kem tau hol geta. Yó se kdaw ye tnana hetngón du belé le yóm Tulón Hyu, dalang se ebè yó kem tau là Ju le.

¹⁹ Ke angkat kenfò le yu, bè ye abay tó tnafa nawa yóm mò kbalà ye kul, ne yóm kmò kudél ye ebélé le. Dwata he tmlolok du kuy yóm kmò kbalà ye kul sok kól yóm kdaw yó.

²⁰ Abay se là kô kuy udél du yóm angkat mon ye, okóm udél hmonen kuy yóm kun Tulus yóm Mà tekuy bè longit.

²¹ Bè yóm kdaw ye, angkat wen se tau setwoli, glef hekfò le yó kem kul dumu setwoli ne hfatay le. Ne wen se kem mà, glef hekfò le yó kem kul ngà ne hfatay le. Dalang se yó kem ngà, glef hekfò le kem kul tuha ne hfatay le.

²² Angat tey dê tau knutó nawa kuy lemwót bè yóm klolò ye do. Okóm yóm tau ke gbeken hambala du yó kem gónóhen glayam efet kól bè hol sónen, du se gmuta du yóm klowil laen dù tul sónen.

²³ Ke hnayam le yu bè sotu benwu, tódó ye mlóy ebè dumu benwu. Tódò tulónu kuy

ktahuhen, là kô na ye e deng gdeng du he yó kem hmuu kuy bè kdê yó kem benwu bè klamangen Israél, deng sana bud kól yóm Ngà Tau.

²⁴ Yóm tau ke hanà tolo dmalang, là kóen geta senta yóm tau tmllok du. Dalang se yóm tau mò nmò, là kóen geta senta yóm gónón mogot.

²⁵ Hyu nawahen yóm tau dmalang ke deng guliten yóm tau tmllok du. Ne yóm tau mò nmò, hyu nawahen ke deng guliten yóm amohen. Ke Seitan boluy le du yóm gónó ye mogot, milud he ksidek udél le ebélé ye, yu kem mogot béleu.”

Olon Dwata dé knikò tekuy

(Luk 12:2-7)

²⁶ “Bè ye hlikò bè tau,” mon Jisas. “Kdéen gebnos deng nmò tau, angkat gotu gfan. Duhen ke wen bunihen bè kem dumuhen, tódô gotu bud tngón.

²⁷ Bè yó kem gel tulónu kuy ke kifu, hol bud tulón ye ke kemdaw. Bè yó kem deng gel tulónu kuy sónen yu, hol bud tulón ye bè kdéen tau.

²⁸ Bè ye abay likò bè tau. Gbek le hmatay lówó ye, okóm yóm lóyóf ye, là kô gbk le hmatay du. Dwata dé hol tahu knikò ye, abay se gbeken hmatay lówó ye, ne gbeken se tmudà lóyóf ye elem lanaw ofi.

²⁹ Ngem yó kem ngà onuk bnes gel hbalù le, tek slad bli yóm lewu botù. Balù yóm kul là kebtes, là kóen na e tódô mosok ebè tonok yóm sotu ke là deng eles tngónen du yóm Mà tekuy bè longit.

³⁰ Milud he yó dum kuy. Balù yó he kem balu wek ye, deng gotu nsó Dwata.

³¹ Yó gónóm mon, bè ye abay hlikò. Bong ye mebtès se kuy senta yó kem tey dè ngà onuk bnes.”

Yóm tau là hmalà ke Jisas

(Luk 12:8,9)

³² Bud mon Jisas, “Yóm tau ke gel tulónen yóm kloloen do lem blóng kem dumun tau, angkat bud tulónu se kun bè solu Mà bè longit.

³³ Okóm yóm tau ke hnalaen yóm kloloen do lem blóng kem dumuhen, angkat bud hnala se do bè solu Mà bè longit.”

Klolò ke Jisas gónón sekla nawa tau

(Luk 12:51-53; 14:26,27)

³⁴ “Ilóem ofo kuy ke yó hendufu edini ke naw e sensotu nawa tau te tonok. Là, yó hendufu naw e semkla nawa.

³⁵ Lemwót bè yóm kógówu edini, gotu sekla nawa le yó kem tau smà ne tau syè ne tau stuón.

³⁶ Deng mom yó hol hmohon du yóm sotu tau, duhen yóm kun fes lówó.

³⁷ Yóm tau ke loloen o,” mon Jisas, “okóm ke ali henlom nawahen kem tuhahen, kéngen yóm kloloen do yó. Dalang se ke ali henlom nawahen kem ngaen, kéngen yóm kloloen do.

³⁸ Yóm tau ke loloen o, okóm là eles tnihangen du yóm kun kros, kéngen yóm kloloen do.*

³⁹ Yóm tau knamaen klowilen, angkat lana béleen yóm klowilen yó. Okóm yóm tau là knamaen du yóm klowilen, angkat gutahen yóm klowil laen dù sónen.”

Yóm ofol angkat blay Dwata

(Mark 9:41)

⁴⁰ “Bè nim khógówu kuy ni,” mon Jisas, “yó se tau hmódó kuy, lómón ke ou hnódóhen. Ne yó se tau hmódó do, lómón ke hnódóhen yóm deng hógów do.

⁴¹ Yóm tau ke hnódóhen yóm tau hógów Dwata, abay se dilóen yóm khógów Dwata du, angkat tódô senged se yóm ofol blay Dwata kul yóm lewu le. Ne yó se tau hnódóhen yóm tau hyu kmoen, abay se dilóen yóm kehuyhen, tódô senged se yóm ofol blay Dwata kul yóm lewu le.

⁴² Tódô tulónu kuy ktahuhen, baluen he ke tek olon él tñaw hinum ye yóm sotu tau gel lemólò do, yóm tau ali glaen bè kdéen, abay se dilò ye yóm kloloen do, angkat dohò wen ofol blay Dwata kuy.”

11

Kehsólók Jan ke Jisas

(Luk 7:18-35)

¹ Timbow deng kehlaui Jisas yó kem sfolò lewu gel lemólò du yó koni, ominen lemwót na a tmllok bè yó kem dumu benwu hmilol bè yó.

² Ngangen mból yóm gel nmò Krays efet gefet bè Jan lem blanggu, yóm Jan gel mabtays. Timbow gungolen, ominen wen bè yó kem gel lemólò du hógówen ebè Jisas

³ anì snólók le béleen ke deng duhen du ne yóm tau hógów Dwata tehe gel tulónen, duhen ke na le na nangat he?

⁴ Bè yóm ksólók le du bè Jisas, bnalaen se lu, monen, “Mulék ye ne, ne ye e tulón ke Jan yó kem deng gungol ye ne yóm deng ton ye.

⁵ Yóm tau butò tódô bud mton, yóm tau hikot bud gógów, yóm tau wen des mifú gnómen gotu mkó, yóm tau bokong bud mungol, yóm tau matay bud mowil. Ne soutuhen, yóm Tulón Hyu lemwót gu bè Dwata deng gefet bè yó kem tau élél.

⁶ Hlialal kun yóm tau ke là megewu nawa-hen do.”

⁷ Kogol yóm kulék le gu bè Jisas yó kem tau hógów Jan yó, omin Jisas tmlulón ke Jan lem blóng yó kem tey tau sbung, monen, “Bè yóm

* **10:38** Yóm kros mon Jisas yó, hningónen yóm là klikò le matay bè yóm klolò le ke Jisas.

tehe gel kógów ye ebè Jan bè yóm benwu laen hol tau menwu du, tedu se yóm tò nóyò hnebel mata ye béléen du? Yóm bnes tendo mung mgafil bè lenos kò? Là kò yó du.

⁸ Tedu se tò hnebel mata ye du? Yóm tau knóón knesen kò? Là kò yó du. Tek són yó gónó ye mton du yóm tau knóón knesen, tek són lem gónò bong yóm tau hol geta.

⁹ Tedu se hol hnebel mata ye du bè yóm tehe gel kógów ye ebéléen yó? Tau tugod Dwata kò? Tahu se, tau tugod Dwata yóm Jan. Okóm yóm nmoen, mkay senta yóm kun nmò yóm tugod Dwata,

¹⁰ yakà du du gónón e dohò yóm tehe hsulat Dwata ekni, yóm monen, 'Wen hógówu tukò gna kóm

mò eles hemgifat du yóm angkat lanem.*

¹¹ Tódò tulónu kuy ktahuhen," mon Jisas, "laen dù tau talak tonok ke geta senta Jan. Okóm ke deng kól yóm kdaw kogot Dwata tau, balù yó he kem tau ali glaan bè kdéan tau nogot Dwata, angkat geta senta Jan.

¹² Lemwót bè yóm kbut Jan tmlोक efek kól nim kmoen ni, tey sidek tò kseng le du yóm kogot Dwata tau. Yó kem tau ali lóbò tò mò du.

¹³ Yóm kogot Dwata tau ni, deng eles gegna ne ktulón le du yó kem tehe gna tugod Dwata ekni, dalang se ke Musis bè yóm kun hlau efek kól bè yóm kun kdaw Jan.

¹⁴ Ke yó dum móyò ye hemtahu du yóm tehe tulón le yó, kaem Jan yóm Ilaydya, yóm tehe gel mon le bud semfulék.

¹⁵ Yóm tau wen klinguhen, hol hmungol."

¹⁶ Bud mon Jisas, "Tedu de knò kehlingónu kuy yu kem tau kmoen ni? Yó gónóhu e hkél kuy, hol ye mkél bè yó kem ngà là mdengen bè fedyan, tnaba le yó kem dumu le, mon le,

¹⁷ 'Deng me hningón mulu, ne lel me tembol, là kò ye dog madal. Ne deng me hningón modung, lel me lemanu, là kò ye dog langag.'

¹⁸ Ngem yó dém kkól Jan lem blóng ye," mon Jisas, "gel fasting se kun, ne là kò ninumen du kun yóm ninun lóbò. Okóm deng mom slón ye du, 'Tau wen malak du.'

¹⁹ Bè yóm deng kkól yóm Ngà Tau, gel mken se kun ne gel minum lómón se yóm kuy. Okóm mom senlón ye, gel mon ye, 'Ngem dé yóm tau yóó, bong kkenen, ne bong kinumen. Deng mom niten swè yó kem tau gel mtuk bwis ne yó kem dumu tau gemsalà.' Ewenem," mon Jisas, "sana kegfanan bè klowil yóm tau mimón yóm khulung Dwata mit tau."

Kudél Jisas yó kem tau là dog hegsel

(Luk 10:13-15)

²⁰ Omin Jisas mudél kul yó kem tau bè yó kem benwu tehe gónóhen gel mò du yó kem

dè hentaw ton gel nmoen, abay se là kò le hegsel, ne là kò knogol le du yó kem sidek gel nmò le.

²¹ Yó monen mò kul, "Angat tey tafak ye, yu kem tau bè Kurasin. Ne tey tafak ye se kuy, yu kem tau bè Bitsayda. Ke deng tehe ton yó kem tau là Ju le bè Tayal ne bè Sidon ni kem hentaw ton deng nmou lem blóng ye ni, ngem kà tódò le lemsek nes sakù, ne bnulus le kohù lówò le mò ilò yóm deng kehegsel le, ne yóm deng kkgol le yó kem sidek tehe gel nmò le.

²² Tódò tulónu kuy ktahuhen, sok kól yóm kdaw angkat kkukum Dwata tau, botong kéng he yóm ktafaken yó kem tau là Ju le bè Tayal ne bè Sidon yóm angkat ktafaken kuy.

²³ Dalang se kuy yu kem tau bè Kapérnaum. Ilóem kmon ye ke gefet bè longit yóm ali kehegeta ye knò ye. Ngem kà angkat tódò tudà Dwata kuy elem lanaw ofi he. Ke deng tehe ton yó kem tau là Ju le bè yóm tehe benwu Sodom ekni yó kem hentaw ton nmou lem blóng ye ni, hol mou kun ne ke là hegsel le se kul, ne là kò genlà Dwata kul.

²⁴ Tódò tulónu kuy ktahuhen, sok kól yóm kdaw angkat kkukum Dwata tau, botong kéng he yóm ktafaken yó kem tau bè Sodom yóm angkat ktafaken kuy."

Yóm fasad Jisas ebè yó kem tau deng hemtahu béléen

(Luk 10:21,22)

²⁵ Bè yóm keseyón le Jisas yó, tódò mni bè Dwata, monen, "Ó Mâ, uu se mogot longit ne tonok. Tey kdóyónu kóm, abay se deng wen heglilebem bè yó kem tau laen dù tngónen, okóm bè yó kem tau wen tngón le, là kò heglilebem du bélè le.

²⁶ Duhen yó se, Mâ, yóm kóm kóyò kehlan du."

²⁷ Omin Jisas bud mudél ebè yó kem gel lemolu du, monen, "Deng gotu hkem Mâ do yóm kdéan. Laen kò tau temngón du yóm Ngà Dwata, tek són yóm Maen. Ne là kò wen tau temngón du yóm Maen, tek són yóm Ngaen, ne tek són yó kem tau deng néléken mò gónóhen hetngón du.

²⁸ Mógów ye ebéléu dé, yu kem tau miteg lemwót bè yóm keblat yóm gel nbò ye. Fen henwósu bélè ye yóm blat yó.

²⁹ Tles nbò ye dé yóm dou nbò, ne hol ye dmalang béléu, abay se ganag nawahu, ne là kóe hegeta knò. Ke yó se kuy nmò, là kò ye na e bud miteg.

³⁰ Abay se tey mahil mit du yóm dou hwit kuy, ne là kóen blat yóm tles dou hbò kuy."

12

Ktolok Jisas lan yóm Kdaw Kehegnò

(Mark 2:23-28; Luk 6:1-5)

* 11:10 Malakay 3:1.

¹ Sotu kdaw bè yó, lemwót le Jisas ne yó kem gel lemòlò du, mlan le hlalak yóm tniba, bede geblà bè yóm Kdaw Kehegnò. Ne tey kbitil yó kem gel lemòlò du, yó gónó le ma bungu halay mò nteb le.

² Timbow ton yó kem Farisi, mon le mò ke Jisas, “Tengelem dé yó kem gel lemòlò kóm, deng mom nulé le yóm hlau tekuy bè yóm Kdaw Kehegnò yóm nmò le yó.”

³ Bnalà Jisas lu, monen, “Deng hónò senfala ye yóm tehe nmò Dabid ne yó kem kun tau bè yóm tehe kbitil le.

⁴ Tódò husek bè Gónò Dwata Dabid, ne nwhan yóm mambang deng blay le ebè Dwata, ne ominen mken du dalang se yó kem kun tau. Blaem bè yóm hlau tekuy, là kóen hyu kken tau hkawang du yóm mambang yó, tek sòn yó kem gel demsù ebè Dwata gel mken du. Ewenem, là kò duón Dwata du kul yóm kken le du.

⁵ Ne sotun,” mon Jisas, “deng hónò senfala ye snéen bè yóm tehe snulat Musis gbak ebè yó kem tau gel demsù ebè Dwata. Bè yóm Kdaw Kehegnò, tódò henlel le mò nmò bè Gónò Dwata se kul, okóm là se kò duón Dwata du kul.

⁶ Tódò tulónu kuy, deng wen kól lem blóng ye yóm mfasang senta yó kem dé hlòlò le kuy bè Gónò Dwata.

⁷ Wen yóm monen bè Sulat Dwata, ‘Keskodu dé yóm hol nóyóu bélè ye, là kò dsu du.* Ke deng tngón ye lanen yóm udél Dwata ni, là kò ne ye e tódò hensalà yóm tau laen dù bang salaen.

⁸ Yóm Ngà Tau, du se wen kwalisen fen tmolok du kuy yóm hyu mò du bè yóm Kdaw Kehegnò.”

*Kkó Jisas des bè Kdaw Kehegnò
(Mark 3:1-6; Luk 6:6-11)*

⁹ Omin Jisas bud lemwót bè yó, ne hlós ebè yóm gónó le gel stifun yó kem Ju.

¹⁰ Wen sotu tau nò bè yó kimoy doli sigelen. Ne wen se kem dumu tau nò bè yó mebel le lan le dmuón ke Jisas, mon le mò du, “Gsalà bè yóm hlau tekuy kò yóm hkó des bè yóm Kdaw Kehegnò?”

¹¹ Bnalà Jisas se lu, monen, “Tedu kmò ye du se kuy ke kulel kebtangen lem sol ngelem yóm ubiha ye bè Kdaw Kehegnò, là henmung nalu ye du kò?”

¹² Milud he yó dum tau, abay se bong muhen senta yóm ubiha. Yó gónóm mon, là gsalà tekuy du yóm ku hlau ke wen tau tnóbóng tekuy bè yóm Kdaw Kehegnò.”

¹³ Omin Jisas mudél ebè yóm tau kimoy sigelen yó koni, monen mò du, “Bentolem sigelem.” Ne tahu se, bentolen, hol lómón ke laen dù tehe desen, lómón yóm dolihen.

¹⁴ Okóm yó kem Farisi, tódò le gotu lemwót, ne sensatul le yóm kmò khatay le ke Jisas.

Yóm tau kun nélék Dwata

¹⁵ Tódò tngón Jisas yóm tó khatay le du, yó gónón tmagak yóm benwu yó. Tey dê tau bud lemòlò du, ne gotu hkóhen des yó kem tau semlaw.

¹⁶ Ne tey kget kehlahuhen kul anì là tulón le du bè dumu tau yóm deng nmoen bélè le.

¹⁷ Bè nim nmò Jisas ni, deng gónón dohò yóm tehe udél Dwata deng tulón yóm sotu tugod Dwata ekni boluyen Isaya, yóm monen,

¹⁸ “Ni se yóm tau tóbóng lówóhu, yóm deng néléku.

Tey bong nawahu du, ne tey kligalu béléen.

Angat tódò suu béléen yóm dou Tulus, ne angat heglalagen bè yóm kdéan tau yóm ktedeng kogotu kukum.

¹⁹ Là kò yó du gungol ye béléen ke mit sgés bè kem dumu tau, duhen ke gel heté.

Ne là kò gungol ye du htétél bè gónón wen.

²⁰ Bè yóm któbóngen tau, là kò tennù tenfoken du yóm hulu deng metngù, ne là tennù hnatayen du yóm solok sónmoen mudof.

Okóm henlelen yóm któbóngen kul efet hol gfan yóm kukum tedeng nogoten.

²¹ Béléen gónón mgel nawa yóm kdéan tau.”*

*Kemgis Jisas senta Seitan
(Mark 3:20-30; Luk 11:14-23)*

²² Ne ominen wen sotu tau nit le ebè Jisas, tau butó lelen umew lemwót bè yóm tulus seitan malak du. Tódò hdó Jisas yóm malak du, ne tódò gudél se yóm tau, ne bud mton.

²³ Ya tey ketnga le du yó kem tau sbung bè yó, mon le, “Déke ni yóm mon le semfu gu bè yóm tehe Dabid.”

²⁴ Timbow gungol yó kem Farisi nim mon le ni, mom mon le, “Là kò yó du. Kaem Seitan yóm htulus du yó, yakà sòn du Seitan kul ogot yó kem tulus sidek.”

²⁵ Tódò tngón Jisas yóm nò lem hendem le, ne yó gónón mon du mò kul, “Yóm benwu tendo mesgólól nawa tauhen, ne ke sónmò le sfatay, angat meglà. Balù yóm sotu gmónò, ke là ssotu nawa le, ne ke sónmò le sfatay, angat le tódò seglef.

²⁶ Duhen yó, ke sónmò le sfatay yó kem tau nogot Seitan, deng mesgólól ne nawa yó kem tau nogoten, ne yó se angat gónó le meglà.

²⁷ Ke mon ye lemwót bè Seitan yóm kehdóhu tulus sidek, wen snólóku bélè ye. Tedu se gónón lemwót yóm kehdó le tulus seitan yó kem gel lemòlò kuy? Tau du de gel htulus kul? Ke là lemwóten bè Seitan

* 12:7 Husiya 6:6. * 12:21 Isaya 42:1-4.

yóm kul kegbek hdó tulus sidek, yó se gónón gdílò yóm ksalà kehedem ye.

²⁸ Là kóen na a lemwót bè Seitan yóm kehdóhu tulus sidek, okóm tódò lemwót bè yóm kehtulus Dwata do yóm kegbeku mò du. Ne ni gónó ye temngón du yóm deng kkólen lem blóng ye yóm kogot Dwata tau.

²⁹ Yóm kul ogot yó kem tulus seitan,” mon Jisas, “hol lómón yóm tau kemgis. Laen kò dù tau gusek elem gónóen na a ma yó kem kimuhen ke là nan gna nfét du yóm tau kemgis yó. Ke deng gféten, yó he kegwahen yó kem nóyóen lem gónóen. Hol lómón yó se yóm deng nmou bè Seitan.

³⁰ Yóm tau là mungen do, hnohonon ou. Yóm tau là tnóbóngen do semtifun yó kem tau, deng du se fen semkla kul.

³¹ Yó gónóhu mon du mò kuy, hnífót Dwata yóm tau balù kihu salà nmoen, ne balù kihu udélen sidek gbak ebéléen. Okóm là kò hnífóten du ke sidek kbaken ebè yóm Tulus Dwata.

³² Ne hnífót Dwata yóm tau ke sidek kbaken ebè yóm Ngà Tau. Okóm là kò hnífóten du ke sidek kbaken ebè yóm Tulus Dwata. Ke yó nmò yóm tau, laen kò tul kkóhen taken yóm salaen yó.”

*Dilò bè kbunguhen yóm koyu
(Luk 6:43-45)*

³³ Bud mon Jisas mò kul, “Yóm koyu hyu, hyu se kbunguhen. Ne yóm koyu sidek, sidek se kbunguhen. Tódò ket koyu mungu, sal dilóem bè kmò kbunguhen ke hyu duhen ke sidek.

³⁴ Ya nim yu kem tau, knawa ye ulal. Yó gónón sidek kebkó ye, abay se hono sidek yóm nò lem hendem ye. Yó se nò lem hendem yóm tau, yó se sut bè sumóngen.

³⁵ Yóm tau hyu, hyu kebkóhen lemwót bè yóm hyu gel suen lem hendemen. Yóm tau sidek, sidek kebkóhen lemwót bè yóm sidek gel suen lem hendemen.

³⁶ Tódò tulónu kuy,” mon Jisas, “bè yóm kdaw kkukum Dwata tau, angkat gotu snólóken bélé le yóm kdéen deng tehe gel benkó le laen dù muhen.

³⁷ Yakà lemwóten bè yóm tehe gel benkó ye gónó Dwata lemwót knukum kuy, ke angkat tnfaken yu duhen ke là.”

*Tò hmò le ke Jisas yóm hentaw ton
(Mark 8:11,12; Luk 11:29-32)*

³⁸ Ne wen bè yó kem tmolok hlau ne bè yó kem Farisi mudéi ebè Jisas, mon le, “Ó Sér, kóyó me ke moi kum yóm hentaw ton.”

³⁹ Bnalà Jisas se lu, monen, “Tey sidek yó kem tau kmoen ni. Balù udi ke wen nawa ye ebè Dwata. Móyó ye kò ke wen hentaw ton nmou lem blóng ye? Laen kò dù bud nmou ne. Tek són nmou lem blóng ye, són yóm hentaw ton tehe ton le bè Juna ekni, yóm sotu tehe gna tugod Dwata.

⁴⁰ Bè yóm tlu buteng Juna nò lem blutut yóm tey utón bong lem mohin, yó hniagaden yóm tlu butengen angkat nò lem lebeng yóm Ngà Tau.

⁴¹ Bè yóm kdaw angkat kkukum Dwata tau, tódò le sbung mdà bè yó se kul yó kem tau là Ju le lemwót bè Ninibi, ne angkat nsel le yu. Anam yó ne, tek olo Juna he yóm tehe hetngón du kul yóm udéi lemwót bè Dwata, ewenem yó, sana kehegsel le, ne tódò tnagak le yóm sidek gel nmò le. Ne deng wen yóm mkay senta Juna deng kól lem blóng ye bè ni, okóm deng mom henda ye.

⁴² Bè yóm kdaw angkat kkukum Dwata tau, angkat mdà bè yó se kun yóm tehe libun boi là Juhen lemwót bè benwu Siba, ne nselen yu. Tehe gloken milo lemwót gu bè kun benwu là sekna lanen na a hemklingu ke Selumun, yóm tehe sotu tau hol geta bélé tekyu ekni, yóm ali hulung hmau. Ne deng wen ne yóm mkay senta Selumun deng kól lem blóng ye bè ni, okóm deng mom henda ye.”

Bud kesfulék yóm tulus seitan ebè yóm tau tehe nalaken

(Luk 11:24-26)

⁴³ “Ke deng mdó bè yóm tau yóm tulus seitan gel malak du, yó lanen semibet gu lem bnes mebel gónón e hegnò. Okóm ke laen dù bang tonen,

⁴⁴ yó mon yóm tulus seitan yó, ‘Na bud mulék dé ebè yóm tehe gónóhu lemwót.’ Tahu se. Bè yóm kkólen bè yó, tódò tonen laen kò dù nò du, deng mólos, ne minggel kestifesen yóm tehe gónóhen nò yó.

⁴⁵ Ominen na tódò bud lemwót, nan e nangay hitu dumuhen bud nò bè yó, bede yóm ali sidek egem le sentahen. Tikóng le deng kól, tódò le husek bè yóm tau gónó le nò. Yó gónóm mon, mom mkay senta yóm gna tehe ali ksidek kegnómen du. Lómón yó se yóm angkat gfà le yó kem tau gel mò sidek nim kmoen ni.”

*Kebel le ke Jisas le yéen ne kem twolihen
(Mark 3:31-35; Luk 8:19-21)*

⁴⁶ Bè yóm tolo lel Jisas mudéi ebè yó kem tey tau sbung ebéléen, sut le se bè yó le yéen ne yó kem twolihen, tò le móyó stulón du, okóm olo le tódò mdà bè lewaen.

⁴⁷ Ne wen tmulón du ke Jisas, monen, “Tu dé le yéem ne kem twolihem, mdà le bè lewà, móyó le stulón kóm kun.”

⁴⁸ Mom yó balà Jisas kul, monen, “Wen se dumu yéu, ne wen se dumu twolihiu.”

⁴⁹ Ominen yó temdok ebè yó kem tau gel lemólò du, monen, “Ngem ni kem tau nii, hol lómón ke yéu ne hol lómón ke twolihiu.

⁵⁰ Abay se yóm tau mimón yóm kun kóyó Mà bè longit, hol lómón ke twolihiu ne libunu ne yéu.”

13

Yóm hlingón bè yóm tau smohul

(Mark 4:1-9; Luk 8:4-8)

¹ Bè yóm kdaw yó, lemwót bè gónô Jisas, mógów etu bè kilil yóm lanaw, ne myón ne tmolok bè yó.

² Ya tey tau genged bud stifun ebéléen. Botong lemwót Jisas motun eta yóm ówóng, ne bè yó gónón myón. Fen le nô bè kilil lanaw kul yó kem tey tau wen.

³ Tey dê tulónen kul, bede sal hlanan bè hlingón, monen, “Wen sotu tau nan e sohul bnéken bè dnaduhén.

⁴ Bè yóm ksohulen du, wen se temsik ebè lan, ne sut yó kem onuk koyu, ne tódô gotu trukô le.

⁵ Wen se sohulen gdek elem lusok botu ebè yóm gónón laen hol tonoken. Là kóen legen deng sana tmowok, abay se là mfól tonoken.

⁶ Okóm timbow sut kdaw bè yóm deng ktowoken, tódô kendel menes, abay se monem là holen ngelem dolilen.

⁷ Ne bud wen se sohulen gdek e talak yóm gónón angkat mfól kluon. Ne tmowok se, tódô mung senok bè yó kem kluon, okóm deng mom limes kun yóm ngà towok halay lem blóng le.

⁸ Okóm wen se sohulen gdek ebè gónón hyu tonok. Timbow gefet, ya tey kfól bunguhen. Wen se kanguyen mungu lematu, wen se mungu nem folò, wen se mungu tlu folò.”

⁹ Omin Jisas bud mon du mò kul, “Yóm tau wen klinguhen, hol hmungol.”

Yóm gónó Jisas gel hmíngón du yó kem gel toloken kul

(Mark 4:10-12; Luk 8:9,10)

¹⁰ Kogolen bè yó, mógów le ebè Jisas yó kem gel lemólò du, wen snólók le béléen, mon le, “Moen de ke gel hningónem yóm gel ktolokem yó kem tau?”

¹¹ Bnalà Jisas se, monen, “Wen yóm là heglileb Dwata du bè kem dumu tau bè yóm kmò kogoten tau, okóm deng heglileben bélé ye.

¹² Yóm tau ke wen deng gwahen, angkat tendo bud gel tennú Dwata béléen aní hol mdengen yóm gwahen. Okóm yóm tau là suen du lem hendemen yóm deng gungolen, balú yóm udi tehe tngónen, angkat bud kó Dwata béléen.

¹³ Yó gónóhu na gel hmíngón du yóm gel tulónu kul, abay se bè yóm kton le du, là kó dog dilò le du. Ne bè yóm kungol le du, là kó dog glileb le du.

¹⁴ Yó deng gónón dohò yóm tehe mon yóm sotu gna tugod Dwata ekni boluyen Isaya, ‘Anien he ke gungol le, là kó glileb le du. Anien he ke ton le, là kó dilò le du.

¹⁵ Abay se là móyô le dmalang ni kem tau ni, deng mom nseng le klingu le, deng le mom hidong.

Ke bè le nmò yó dum yó, dilò le yóm gel ton le ne glileb le lanen yóm gel gungol le.

Ngangen ne efet le mimón béléu,’ mon Dwata, ‘ne gotu hnifótu yó kem salá le.’*

¹⁶ Okóm kuy tey hyu,” mon Jisas, “abay se dilò ye yóm gel ton ye, ne tngón ye lanen yóm gel gungol ye.

¹⁷ Tódô tulónu kuy ktahuhen, tey dê kem tehe tugod Dwata ekni dalang se yó kem dumu tau Dwata, gel tó hendeen le mton du yóm kuy deng ton nim kmoen ni, okóm là kó ton le du. Tô hendeen hnungol le se kul yóm kuy deng gungol ni, okóm là kó gungol le du.”

Hnigad yóm tau smohul

(Mark 4:13-20; Luk 8:11-15)

¹⁸ “Ni hnungol ye,” mon Jisas, “yóm lan yóm hningónu yó koni bè yóm tau smohul.

¹⁹ Ke wen tau mungol du yóm tulón bè kmò kogot Dwata tau, ne là dog hendem le du lanen, hol lómón ke yóm bnék temsik ebè lan. Tódô sut Seitan, nwahen bélé le yóm udél deng gungol le.

²⁰ Bong yóm bnék gdek elem lusok botu, hol lómón ke yó kem tau hmungol yóm Udél Dwata, ne tódô kendel hentahu le, ne tey ktimu óyô le du.

²¹ Okóm là kóen dmlil, tek likót le tó hemtahu. Timbow wen gfá le duhen ke wen hlayam sut bélé le lemwót bè yóm tó kehtahu le, tódô kendel gkogol le yóm tó kehtahu le yó.

²² Bong yóm bnék gdek elem yóm angkat gónón mfól kluon, hol lómón ke yó kem tau hmungol du yóm Udél Dwata, okóm dé bnukú nawa le bè klowil le, ne gfét nawa le bè kebel le kendengen le. Yó gónón limes yóm kehtahu le, ne laen kó dù bunguhen.

²³ Okóm yóm bnék gdek ebè gónón hyu tonok, hol lómón ke yó kem tau hmungol du yóm Udél Dwata, ne glileb le. Tey kbungu le kul, wen se mungu lematu, ne wen se mungu nem folò, ne wen se tlu folò.”

Yóm hlingón bè yóm kluon gbol lem halay

²⁴ Bud wen hningón Jisas bélé le, monen, “Yóm kogot Dwata tau, lómón yóm tau na a smohul yóm bnék hyu bè dnaduhén.

²⁵ Sotu kifu bè yó, igò le lemnga tungó yóm kdé le, tódô sut yóm hohon yóm tau fun dnadu nan e bud nulit sohul bè dnadu yóm lem kluon, ominen bud mulék.

²⁶ Ne ominen tmowok yóm halay, ne tmowok se kun yóm lem kluon. Timbow

* 13:15 Isaya 6:9,10.

deng nbuten mosò yóm halay, yó he kdilò le du yóm kluon deng gbol lemen.

²⁷ Timbow ton yó kem tau gel mò nmò bè yóm tau fun dnadu yó, omin le kendel mógów ebéléen, ne mon le mò du, ‘Ó Sér, i goen se tey tilob yóm bnék sohulem bè dnaduhem, moen se tu du ke wen gbol lemen?’

²⁸ Bnalà yóm tau fun dnadu, monen, ‘Yóm tau hmohon do mò du yóm yó.’

Ne mon yó kem tau mò nmò béléen, ‘Tedu kmò me du du? Gotu kendut me kò yóm deng gbol bè yó?’

²⁹ ‘Tagad he,’ mon yóm tau fun dnadu, ‘déke mom gomong gekdut ye yó dum halay.

³⁰ Na ye tódò hbungu lemen he yó kem halay. Sok kól bè angkat kutahu du, gna hekdutu yó kem tau muta yó kem kluon yó, gotu benkes lu ne ntem le. Omin yó he muta yó kem halay, ne omin ye mogut kul ebè fol.’

*Yóm hlingón bè yóm lem hulu ali lemnek
(Mark 4:30-32; Luk 13:18,19)*

³¹ Ne bud wen sotu hningón Jisas béle le, monen, ‘Yóm kogot Dwata tau, hol lómón yóm lem hulu deng hulu yóm sotu tau bè tñibahen,

³² yóm lem hulu ali lemnek bè kdéen. Okóm ke deng tmowok yóm huluhen yó, tey bong, ne baling koyu, ne gotu le smala gu te hangahen yó kem onuk koyu.’

*Yóm hlingón bè yóm bulung henok mam-
bang
(Luk 13:20,21)*

³³ Ne bud sotu hningón Jisas béle le, monen, ‘Sotu gónó tekuy e hmingón du yóm kogot Dwata tau, hol lómón ke yóm libun mò mambang. Balù tek udì bulung henok boolean bè yóm tey arina deng hnéféen, botong gbeken henok du yóm kbongen.’

*Gel hlan Jisas bè hlingón yó kem tulónen
(Mark 4:33,34)*

³⁴ Kdé yó kem tulón Jisas yó kem tey tau sbung, sal gel hlanen bè hlingón. Laen dù tulónen kul ke là hningónen du.

³⁵ Ni se deng gónón dohò yóm udél yóm sotu tau tugod Dwata ekni, yóm monen, ‘Angat gel hningónu yó kem gel tulónu kul. Angat tulónu kul yó kem tehe là deng tngón le du lem wót bè hol kbut benwu.’*

Tennefyóm kluon gbol lem halay

³⁶ Kewót Jisas bè yó, tñagaken yó kem tey tau wen, ominen husek elem gónò. Mógów le ebéléen yó kem gel lemòlò du, ne mon le mò du, ‘Tulónem kum kun lanen yóm hningónem bè yóm halay wen kluon gbol lemen.’

³⁷ Tahu se, tulón Jisas kul, monen, ‘Yóm tau sohulen yóm bnék hyu bè dnaduhem, duhen yóm Ngà Tau.

³⁸ Ne yóm dnadu, hningónen yóm klaman-gen benwu. Ne yóm bnék hyu yó, duhen yó kem tau deng nogot Dwata. Yó hningón yóm kluon gbol lemen, duhen yó kem tau deng nogot Seitan.

³⁹ Ne yóm hohon smohul du yó, duhen Seitan. Yóm deng kgefet yóm halay, hningónen yóm hol són kdaw. Ne yó kem tau muta, duhen yó kem hógów Dwata gu bè longit.

⁴⁰ Bè yóm kekdut le yó kem kluon gbol lemen, ne yóm ktem le kul, hol lómón yó se yóm angkat kmoen bè yóm hol són kdaw.

⁴¹ Angat dók yóm Ngà Tau yó kem hógówen gu bè longit anì gotu kó le yó kem kdéen tau gel mit kem dumu le mò sidek, dalang se yó kem dumu tau gel mò sidek, gotu kó le lu.

⁴² Gotu tudà le lu elem lanaw ofi. Ditu gónó le heslaf dmumu mkik, ne sembébé kakim.

⁴³ Okóm kul yó du kem kun tau Dwata, hol lómón angkat keslinang le mata kdaw ke sok le deng kól ditu bè yóm benwu nogot Mà le bè longit. Yóm tau wen klinguhen, hol hmungol.’

Yóm hlingón bè yóm kimu labi

⁴⁴ ‘Sotu gónó tekuy e hmingón du yóm kogot Dwata tau,’ mon Jisas, ‘hol lómón ke yóm kimu labi deng tódò ton yóm sotu tau talak yóm dnadu, yóm kimu tehe lebeng yó kem tau gnan ekni. Bè yóm ktonen du, bud lebengen se kun. Ya tey kligalen mulék. Tódò gotu himot hbaluen yó kem kdé nò béléen anì geblihen yóm tonok gónón mton yóm kimu labi.’

*Yóm hlingón bè yóm kimu libun boluyen
pérlas*

⁴⁵ ‘Sotuhem,’ mon Jisas, ‘sotu gónó tekuy e hmingón du yóm kogot Dwata tau, hol lómón ke yóm sotu tau mebel yóm kimu libun ali mebetes boluyen pérlas.

⁴⁶ Timbow wen tonen sotu ali tilob, ominen mulék, ne gotu himot hbaluen yóm kdé kendengenen anì geblihen yóm pérlas tonen yó.’

Yóm hlingón bè yóm huket

⁴⁷ ‘Sotu bud gónó tekuy e hmingón du yóm kogot Dwata tau,’ mon Jisas, ‘hol lómón ke yóm huket tudà le e talak lanaw, ne tey dè kay utón él tawanen.

⁴⁸ Timbow deng hnok yóm huket, omin le demyol du ete kembu. Yó nmò le, sentólóng le yó kem utón tawan huket le. Lemwót yó kem utón hyu, sù le lu lem timbà. Ne fen gotu bot le yó kem utón sidek.

⁴⁹ Hol lómón yó se mò kmoen sok kól bè yóm hol són kdaw. Lemwót yó kem hógów

* 13:35 Lینگón 78:2.

Dwata gu bè longit, gotu sentólóng le yó kem tau gel mò du yóm hyu bè yó kem tau gel mò du yóm sidek.

⁵⁰Yó kmò le yó kem tau sidek nmò le, gotu tudà le lu elem lanaw ofi. Ditu gónó le ali heslaf dmumu mkik, ne sembéhé kakim.”

Yóm hlingón bè yóm kimu labi ne kimu lomi

⁵¹Snólók Jisas bè yó kem gel lemólò du, monen, “Gotu glileb ye kò lanen ni kem hningónu ni?”

Mon le se, “El, Sér, glileb me.”

⁵²Bud mon Jisas, “Yóm tau gel tmlók hlau gnan, ke deng gfi bè kogot Dwata tau, hol lómón ke du yóm tau wen kimu labihen, ne wen kimu lomihen deng denfélén bè gónónen mò gónóhen gel ma yóm wen muhen du.”

Kekbé le ke Jisas bè Nasarit, yóm hol kun benwu

(Mark 6:1-6; Luk 4:16-30)

⁵³Timbow deng gotu deng ktulón Jisas du kul ni kem gel hningónen ni, ominen lemwót bè yóm benwu yó, bud mulék ebè hol kun benwu.

⁵⁴Yóm kkólen bè yó, tódò na a tmlók bè yóm gónó le gel stifun yó kem Ju. Ya tey ketnga le du yó kem tau hmungol du, mon le, “Gónón ma du ketngónen tmlók nim tau ni? Ne gónón lemwót yóm ktulusen mò du yó kem hentaw ton gel nmoen?”

⁵⁵Igoen se du ngà yóm tau gel mò gónó. Ne igò sem Midi du yóm yéen. Ne du se twogu le Jim ne Jusif ne Simun ne Judas.

⁵⁶Ne yó kem libunen, nõ le gu bè ni. Gónón lemwót de yóm tey khulungen nim tau ni?”

⁵⁷Ne yó se gónó le kembè du.

Mon Jisas mò kul, “Yóm tugod Dwata, laen kò dù madat du bè yóm hol kun benwu. Dalang se yó kem hol kun fes lówó, là kò nadat le du. Tek sòn yó kem dumu tau bè tólóng benwu madat du.”

⁵⁸Lemwót bè yóm là kehtahu le du, là holen wen hentaw ton nmò Jisas bè yó.

14

Kegbelen bè nawa Hirod yóm tehe kehfa-tayen ke Jan gel mabtays

(Mark 6:14-29; Luk 9:7-9)

¹Bè yóm kdaw yó, gefet bè Hirod yóm gubérnor bè Galili, yóm gel nmò Jisas.

²Bè yóm kungolen du, monen mò yó kem tau smugung béléen, “Deng duhen yó se yóm Jan tehe gel mabtays, deng bud mowil. Yó gónón wen ktulusen gembek mò du yó kem hentaw ton gel nmoen.”

³⁻⁴Yó gónó Hirod mon du yóm yó, abay se du yóm tehe hekfò ke Jan, lelen hfét du, ne heblanguen. Yó gónón mò du béléen yóm yó, lanen tehe mólów du bè yóm tehe kalawen ke Hirudiyas, yehen yóm twolihen

boluyen Filip. Tehe gel monen mò ke Hirod, “Deng nuléhem yóm hlau tekuy yóm kalawem yehen twolihem yó.”

⁵Bè yóm kungol Hirod du yóm udél Jan yó, hol kóyóen ke tò kendel hfatayen Jan, okóm likò bè yó kem Ju, abay se dilò le hol tugod Dwata yóm Jan.

⁶Ni se tehe kmoen yóm katay Jan. Bè yóm tehe kkól yóm kdaw gel kehligal le du yóm tehe ksut Hirod, hadal le yóm ngà Hirudiyas libun lem blóng yó kem tey tau deng sbung bè yó. Ya tey kehyu nawa Hirod.

⁷Wen fasaden yóm ngà madal yó, monen, “Balù kihu nóyóem, blayu kóm.” Gloken smafá béléen he.

⁸Lemwót se yóm ngà, snólóken bè yéen ke tedu yóm hnihen bè Hirod. Ne yó mon yéen mò du monem mò ke Hirod, “Kulu Jan dé blayem do, hyónem do te huyów.”

⁹Timbow gungol Hirod yóm yó, ya tey sidek kegbeng lemen. Okóm lemwót bè yóm deng safaen bè yóm ngà yó, lel le mungol du yó kem tey tau wen bè yó, yó gónón tódò hemlus du béléen yóm hnihen.

¹⁰Tahu se, tódò heklengen lihól Jan lem blanggù.

¹¹Omin le mit kuluhen ne hyón le te huyów, blay le bè yóm ngà libun. Ne lemwót se kun, blayen ke yéen.

¹²Lemwót lówó Jan, fen nwa yó kem gel lemólò du, ne lebang le. Timbow deng kebeng le du, omin le mógów ebè Jisas, tulón le du kdéen.

Kehken Jisas yóm limu libu kem logi

(Mark 6:30-44; Luk 9:10-17; Jan 6:1-14)

¹³Bè yóm kungol Jisas du yóm deng glum-fak Jan, kewót le bè yó sòn lu smakay ówóng etu fatu lanaw bè yóm gónón tinof. Ne e gungol yó kem tau yóm kewót le Jisas yó, tódò le lemwót se kul gu bè kul benwu, gotu le tmonok mentad lihól lanaw na le e lenebet Jisas.

¹⁴Timbow dmuung le Jisas, tódò tonen yó kem tey tau wen deng gna ebè yó. Ya tey kkoduhen kul, gotu hkóhen yó kem des le.

¹⁵Timbow deng kimel, mógów le ebè Jisas yó kem gel lemólò du, mon le, “Deng kimel ne ni, lelen là moni bè tau nim benwu ni. Dókem lu dé ni kem tey tau ni ebè tu kem benwu hmilól anì na le e bemli ken le.”

¹⁶“Omin he,” mon Jisas. “Tódò yu ne hemken kul.”

¹⁷Mon le se, “Ê, sòn nõ bélé me bè ni, tek sòn limu botù mambang ne lewu tedek utón él!”

¹⁸“Nit ye edini kun,” mon Jisas.

¹⁹Tahu se. Omin Jisas gotu hyón yó kem tau bè yóm gónón ukol bnes. Ne nwhan yóm limu botù mambang ne lewu tedek utón él, ne temngel ebè longit, mni bè Dwata. Ominen kembéng yóm mambang,

ne oguhen yó kem gel lemólò du anì sagid le ebè yó kem tau.

²⁰ Tódò kdê le se gotu mken ne gotu le bsow. Timbow deng kken le, gotu sentifun yó kem gel lemólò ke Jisas yóm lukas ken le, botong sfólò lewu abi.

²¹ Yó kwen kem logi mken, botong limu libu. Là homong nsó le du kem libun ne kem ngà.

Kógów Jisas te él

(Mark 6:45-52; Jan 6:15-21)

²² Kogolen bè yó, gotu hotun Jisas elem ówóng yó kem gel lemólò du, hegnahen lu efatu lanaw, ominen yó hulék yó kem tau.

²³ Timbow le deng gotu lemwót, lemwót se ke Jisas kun elem bulul tek sotuhen lanen na a mni bè Dwata. Ngangen nõ bè yó lem bulul efet kifu tek sotuhen.

²⁴ Blaem yóm ówóng snakay yó kem gel lemólò du, deng kól talak lanaw. Ya tey keglayam le nan e senlong lu yóm tey lenos bong.

²⁵ Song sut bélé le Jisas deng móyón mwas, tódò mógów ta él ebélé le.

²⁶ Bè yóm kton le du yóm kógówen ta él, ya tey sidek klikò le, ofo kul mon du ke busaw. Botong le gotu lematig.

²⁷ Omin Jisas kendel mudél ebélé le, monen, “Hgel ye nawa ye dé. Ou ni. Bè ye abay hlikò.”

²⁸ Hebkó se ke Pitér, monen, “Ó Sér, ke tahu uu se yó, hógówem o edyó kun ta él.”

²⁹ “Géhéli sen,” mon Jisas.

Mung tódò kekmó Pitér ta yóm ówóng le, tódò mógów ta yóm él etu bè Jisas.

³⁰ Okóm tímbow gnómen yóm tey kgel yóm lenos, tey sidek klikoen, ne tódò sen-gengen se tó lemneb elem él. Ne botong gdawaten Jisas, monen, “Tnóbóngem o, Sér.”

³¹ Omin Jisas kendel kemfò du bè sigenen, monen, “Tey udi kehtahuhem nim uu. Moen du ke megewu nawam do?”

³² Ne omin le motun elem yóm ówóng, ne tódò teflok se yóm lenos.

³³ Yó kem dumu gel lemólò ke Jisas nõ lem yóm ówóng yó, botong tud le bukol le bè soluhen, mon le, “Tahu uu se yóm Ngà Dwata.”

Kkó Jisas des yó kem tau bè Ginésarit

(Mark 6:53-56)

³⁴ Ngang le mówóng efet le dmuung fi fatu yóm lanaw bè yóm benwu boluyen Ginésarit.

³⁵ Bè yóm kkól le bè yó, tódò kendel dilò le se Jisas yó kem tau bè yó, ne omin le gotu hetngón du bè yó kem benwu hmilol yóm deng kegdek Jisas bélé le. Tahu se, gotu nwit le ebè Jisas yó kem tau gemnóm des bélé le.

³⁶ Henkodu le béléen baluen ke olo le gemdù kilil nesen yó kem tau gemnóm des. Tahu se, tódò kdéen tau gotu mdù nesen, tódò le gotu bud hyu.

15

Yóm tolok kem tau gnan

(Mark 7:1-13)

¹ Ne wen kem Farisi ne yó kem gel tmlोक hlau mógów ebè Jisas, lemwót le bè syudad Jirusalim. Wen snólók le béléen, mon le,

² “Moen de kul yó kem gel lemólò kóm ke là lolò le du yó kem hlau yó kem tehe fù tekuy ekni? Là dog le na molob tdok gu laan le là deng mken.”

³ Bnalá Jisas se lu, monen, “Wen se do snólók bélé ye. Moen se kuy du ke là lolò ye du yóm hlau Dwata, mom yó lolò ye yóm hlau lenbù nmò ye?”

⁴ Igò Dwata se mon du bè Sulaten, ‘Nadatem maem ne yéem.’ Ne sotuhen, ‘Yóm tau ke sidek kbaken ebè maen ne yéen, tódò hnatay kmò du.’*

⁵ Okóm yóm kuy gel tolok,” mon Jisas, “là kóen sidek kun ke mon te bè kem tuha tekuy, ‘Yóm tó blayu kuy, deng mom blayu ke Dwata.’

⁶ Bè yóm ktolok ye yó, là kóen sidek ke là bud nadat te kem tuha tekuy. Ni se gónón gfan yóm klaen dù mu ye du yóm hlau Dwata. Són lolò ye yóm kuy hlau lenbù nmò.

⁷ Tey tau hemtedeng knó nim yu. Deng yu se gónón e gbak yóm tehe udél Isaya, yóm monen,

⁸ ‘Són bè sumóng gónó le madat do ni kem tau ni, mon Dwata, okóm yóm nawa le tey mayuk béléu.

⁹ Laen kó dù muhen yóm gel ktaba le ebéléu, abay se són hlau lenbù nmò tau yóm gel tolok le,

okóm bè ktolok le du, hol lómón ke hlau lemwót béléu.’**

Yóm gónón là mólós bè Dwata yóm tau

(Mark 7:14-23)

¹⁰ Ne bud senbung Jisas ebéléen yó kem tey tau wen, monen mò kul, “Ni hol hnungol ye anì ngón ye.

¹¹ Là kóen lemwót bè yó kem kihu sungit yóm tau mit du là mólós bè Dwata. Okóm yó mit du là mólós, duhen yóm sidek kebkó gel btang bè sumóngen.”

¹² Kogol yóm kudél Jisas yó, mógów le ebéléen yó kem gel lemólò du, ne mon le mò du, “Tey sidek kebut le kóm yó kem Farisi tu koni lemwót bè yóm monem ebélé le.”

¹³ Ne bnalá Jisas lu, bede hningónen, monen, “Yóm hulu là kun hulu du yóm Mà bè longit, angat tódò kenduten.

* 15:4 Kehewà 20:12, 21:17, Hlolò 20:9, Hlau 5:16. * 15:9 Isaya 29:13.

14 Tódô bayà ye lu yó kem Farisi yó. Hol lómón ke tau le butô tô nalak le kem dumu le butô. Ke salak honon butô, kaem angat le gotu geblos elem sol."

15 Omin Pitér mudél ebè Jisas, monen, "Tulónem kum dé lanen yóm deng monem là mólós yó koni."

16 Mon Jisas se, "Ílóm laen deng tngón ye kô kuy senta yó kem dumu tau?"

17 Là tngón ye du kô balù kihu sungit yóm tau, tódô hlós elem blututen, ominen yó bud gel lemwà gu lem lówóhen.

18 Okóm yóm sidek kebko gel btang bè sumóng yóm tau, hono lemwót lem hendemen, ne yó se mit du là mólós bè Dwata.

19 Kdè yó kem nmò sidek, hono lemwót bè kehedem tau, lómón yóm monok, ne mdà yehen, ne mò samuk, ne mnagaw, ne mò kéng, ne yóm tódô gel semtulón dumu tau.

20 Yó se yó kem nmò gónó tau là mólós bè Dwata. Tek élél yóm là na kolob tdok gu laan là deng mken."

*Kéhtahu yóm sotu libun là Juhen
(Mark 7:24-30)*

21 Bud kewót Jisas bè yó, hlós ebè yóm benwu moni bè Tayal ne Sidon.

22 Timbow le kól bè yó, wen sotu libun là Juhen lemwót bè yó mógów ebéleén, libun semfu gu bè tau Kanan. Tódô hgelen udélen tmaba ke Jisas, monen, "Ó Sér, sfu tehe Dabid, hol knoduhem ou. Wen yóm ngau libun lengel matahen, ne tey sidek kehlayamen du yóm gel malak du."

23 Okóm bà sekteb ke bnalà Jisas. Omin le mógów ebéleén yó kem gel lemolò du, mon le mò du, "Yake tódô hulékem yóm libun yó, sónmoen tendo hebnes huli tekuy."

24 Omin Jisas mudél ebè yóm libun, monen, "Tek són ebè yó kem tau Israél gónó Dwata e hógów dou, yakà mkél le bè yó kem ubiha tabag."

25 Okóm tódô hegluduk bè ti Jisas yóm libun yó, monen, "Hol tnóbóngem o sen, Sér."

26 Bud bnalà Jisas, bede hningónen, monen, "Là hyu mbot du bè kem ohu yóm kul ken kem ngà."

27 Bud mon yóm libun, "Tahu se yóm monem yó, Sér. Okóm balù yó he kem ohu, sal gel ken le yó kem ubang ken gel btang gu te lemisa yóm tau funen."

28 Omin Jisas mon du mò du, "Tey bong kehlahuhem, Lenibun. Yó ne, deng gutahem ne yóm hnihem béléu." Tahu se, tódô sengengen se mkó des yóm ngà yóm libun yó.

Kéhkó Jisas des yó kem tau

29 Bud kewót Jisas bè yó mentad hilol Lanaw Galili, ominen hlós elem bulul, ne myón bè yó.

30 Bè yóm knóen bè yó yó, tey dê tau bud mógów ebéleén. Gotu nit le ebéleén yó kem tau tugó, ne yó kem tau butô, ne yó kem tau

tiked, ne yó kem tau umew, ne tey dê kem dumu tau gemnóm des snéen. Gotu sù le lu klohok ti Jisas, ne gotu kóhen se yó kem des le.

31 Tey ketnga le du yó kem tau yóm kton le yó kem umew bud le gudél, yó kem tau tiked gotu bud hyu, ne yó kem tau tugó gotu bud mekteng kógów le, yó kem tau butô gotu bud mton. Ya tey kdóyon le ke Dwata, yóm kul gónó hemtahu yó kem tau Israél.

*Kehken Jisas yóm fat libu kem logi
(Mark 8:1-10)*

32 Omin Jisas tmaba ebè yó kem gel lemolò du, ne monen mò kul, "Tey klayuk nawahu kul ni kem tau ni. Deng tlu kdaw le ni ne nó béléu bè ni, laen kô dù bud ken le. Ne là se mógóe tódô hulék kul là mken, kô lenmek le gu bè lan."

33 Mon yó se kem gel lemolò du, "Bang tô gónó tekuy ma du mò hken kul bè nim benwu laen hol tau menwu du ni yó kem tey tau wen ni?"

34 Bud mon Jisas se, "Hilu botù de mambang nò bélé ye?"

Mon le se, "Tek hitu botù ne wen ngà utón élen."

35 Omin Jisas gotu hyón kul yó kem tey tau wen.

36 Ne nwahen yóm hitu botù mambang ne yóm udi utón él, ne nan mmi bè Dwata. Tikóng deng knihen, ominen kembéng du, ne hsagiden yó kem gel lemolò du.

37 Gotu le mken kdè le, ne tódô le gotu gemtu. Timbow deng kken le, gotu sentifun yó kem gel lemolò du yóm lukasen, botong hitu abi.

38 Yó kwen tau mken, botong fat libu logi, là homong nsó le du kem libun ne kem ngà.

39 Omin Jisas gotu hulék yó kem tau. Lemwót kun bud motun elem yóm ówóng, mógów etu bè yóm benwu glem lem Magadan.

16

*Kóyó le ke wen hentaw ton nmò Jisas
(Mark 8:11-13; Luk 12:54-56)*

1 Sotu kdaw bè yó, wen yó kem Farisi ne yó kem Sadyusi mógów ebè Jisas na le e tô tnilów, mon le mò du, "Moi kum kun yóm hentaw ton mò gónó me hemtahu du yóm khógów Dwata kóm."

2 Okóm yó balà Jisas kul, monen, "Ke deng sdef kdaw, sal gel mon ye, 'Angat mnóng kdaw ke haya, yakà hulò but longit.' Ne tahu se.

3 Ne ke hlafus, sal gel mon ye, 'Angat kmulón ni kdeng, yakà hulò but longit.' Ne tahu se. Tey ye hulung milò du yó kem gel ton ye bè longit, mon Jisas. Okóm là hulung ye temnef du yóm dê hton Dwata kuy nim kmoen ni.

4 Hol monu sidek tau nim yu! Bà udi ke wen nawa ye ebè Dwata. Mòyò ye kò ke wen hentaw ton nmou lem blóng ye? Laen kò dù bud nmou ne, tek sòn nmou lem blóng ye, sòn yóm hentaw tehe ton le bè Juna ekni." Ominen tódò tmagak kul.

Ketgama yóm kul gel ktolokyó kem Farisi ne yó kem Sadyusi
(Mark 8:14-21)

5 Timbow le deng kól fi fatu yóm lanaw le Jisas, tódò gbel bè nawa yó kem gel lemólò du yóm klaen dù mambang nit le mò bnotu le.

6 Ne wen udel Jisas ebélè le, monen, "Hol ten-gama ye yóm kul bulung henok mambang yó kem Farisi ne yó kem Sadyusi."

7 Stulón le sòn lu yó kem gel lemólò du, mon le, "Yó dô gónón mon du yóm yó, yakà klifót tekuyu du mit mambang."

8 Tódò tngón Jisas yóm sentulón le, yó gónón mon du mò kul, "Moen de ke sentulón ye yóm là kegwit ye bnotu? Tey udi kehtahu ye.

9 Efet ni he là deng glileb ye du dilóu yóm gel nmou. Hentulón ye nawa dé yóm kekbéngu limu botù mambang bè yóm limu libu kem logi, hilu abi de lukasen deng sentifun ye?

10 Ne yóm le kekbéngu hitu botù mambang bè yóm fat libu kem logi, bud hilu abi lukasen?

11 Là kò na e mambang du tendoken yóm tulónu yó koni. Mò ye là gmileb du du yóm monu? Hol ten-gama ye yóm kul bulung henok mambang yó kem Farisi ne yó kem Sadyusi."

12 Omin le yó he temngón du sundu bulung henok mambang du yóm tendoken, okóm yóm kul ktolok yó kem Farisi ne yó kem Sadyusi.

Kdilò Pitér ke Jisas yóm Misaya, yóm deng kehkamal Dwata du yóm klamangen
(Mark 8:27-30; Luk 9:18-21)

13 Bud kewót Jisas bè yó, hlós le etu bè yóm benwu moni bè yóm syudad boluyen Sesiya Flipay. Bè yóm kkól le bè yó, snólók Jisas yó kem gel lemólò du, monen, "Tedu de kul kmò kehedem du yó kem dumu tau yóm Ngà Tau?"

14 Mon le se, "Wen se mon du, Jan kun yóm tehe mabtays. Mon kem dumu, Ilaydya kun. Sotu tò kmon le du, Jirimaya kun, duhen ke wen bè yó kem dumu tugod Dwata ekni."

15 Ne mon Jisas se mò kul, "Kòm kuy se du? Tedu se kuy kmò kehedem do du?"

16 Fen bnalà Simun Pitér, monen, "Uu se yóm Misaya, yóm Ngà yóm Dwata laen kò dù tul katayen."

17 Mon Jisas se mò ke Pitér, "Tey hyu kóm Simun ngà Jan, abay se là lemwóten bè tau yóm kdilòem do, okóm tódò lemwót bè Mà bè longit.

18 Ni tódò tulónu kóm, lemwót bè yóm udélem yó gónóhu moluy kóm Pitér, yó lanen botu. Ne bè nim botu ni gónóhu mbut hbegele yóm kehtahu le béleu yóm kdéen tau hem-tahu bè klamangen benwu. Balù yóm hatay, là kò gatuen kul.

19 Yó hmou kóm, blayu kóm yó kem kungsi bè yóm kwalisem bè yóm benwu nogot Dwata. Yó se nmò kenbéem talak tonok, yó se angkat bud kenbé Dwata bè longit snéen. Ne yó se nmò là kenbéem du, là se kenbé Dwata du bè longit."

20 Tey mget ktulón Jisas du yó kem gel lemólò du ani là tulón le du bè dumu tau ke du yóm Misaya.

Tanay ktulón Jisas yóm angkat keglayamen ne katayen

(Mark 8:31-9:1; Luk 9:22-27)

21 Nbuten bè yó ne, tódò gel hnakang Jisas tmulón du bè yó kem gel lemólò du yóm angkat keglayamen, monen, "Là gbeku du ke là mógówe ebè Jirusalim. Bè yóm kkólu bè yó, angkat hnayam le o yó kem tuha gónó tekuyu gel galak, ne yó kem tau geta gel demsù ebè Dwata, ne yó kem tau gel tmlok hlau. Ngang le mò du efet hfatay le ou. Okóm bè getluhen kdaw, angkat bud hlowil Dwata o."

22 Omin Pitér mit ke Jisas hlayuk udi, ne bnólówen, monen mò du, "Teya he yó, Sér. Yake béen dohò kut yóm monem yó."

23 Beklil se Jisas ebè Pitér, monen, "Hlayuki béleu, Seitan. Béem tò henseng yóm nógówu. Là kóen lemwót bè Dwata yóm kehedemem yó, kaem kehedem tau te tonok."

24 Ne bud mon Jisas mò yó kem gel lemólò du, monen, "Ke wen tau mòyò lemólò do, song hyu ke tódò tebelen yóm kun kóyò, ne eles tnhangen yóm kun kros, ne ominen yó lemólò do.*

25 Yóm tau ke knamaen klowilen, angkat lana béleen yóm klowilen yó. Okóm yóm tau ke là knamaen du klowilen lanen lemólò do, angkat gutahan yóm klowil laen dù sónen.

26 Anien he yóm tau ke gotu gfunen klamangen benwu, laen kò dù ofolen du yóm deng gfunen yó ke lana béleen yóm klowil laen dù sónen. Ke lana béleen yóm klowil yó, laen kò dù bud gónón ma du yóm mò tlesen.

27 Yakà angaten bud semfulék edini yóm Ngà Tau," mon Jisas. "Bè yóm kesfuléken yó, gfan béleen yóm tey kegeta Maen, ne gotu le mung du yó kem gel hógów Dwata gu bè longit. Bè yóm kdaw yó, tódò gotu blayen yó kem tau yóm balà yóm tehe deng gel nmò le.

* 16:24 Yóm kros mon Jisas yó, hningónen yóm là klikò le matay bè yóm klólò le du.

28 Tódô tulónu kuy ktahuhen, angkat wen he béle ye bè ni gmafit mton du yóm bud kesfuléken edini yóm Ngà Tau mò kmamal yóm klamangen.”

17

*Kesfli kton le ke Jisas
(Mark 9:2-13; Luk 9:28-36)*

1 Timbow deng bud nem kdawen bè yó, lemwót Jisas mneged ebè yóm sotu bulul geta, nwtien Pitér ne yó kem lewu tau set-woli Jim ne Jan, tek sónen lu.

2 Bè yóm knò le bè yó, tódô sfli kton le ke Jisas. Yóm lem uyóhen hol lómón nóng mata kdaw, ne yóm nesen tódô gotu smi-nang bukay.

3 Ne tódô hetnga ton le se Musis ne Ilay-dya, stulón le ke Jisas.

4 Mung tódô kudél Pitér ebè Jisas, monen, “Hyu ni, Sér, deng me nõ bè ni. Ke móyói, hdae tlu lowig, sotu kóm, sotu ke Musis, sotu se ke Ilaydya.”

5 Yóm igò Pitér tolo mudél, tódô lememekek eta le yóm tey lobun sminang bukay, tódô gungol le yóm mudél gu lemen, monen, “Ni se hol dou Ngà, gónón nõ nawahu. Tey klugalá béleén. Hol gel hnungol ye.”

6 Bè yóm kungol le yóm udel yó, tódô le gotu hegluduk lemfen bè tonok yó kem tau mung ke Jisas, ya tey sidek klikò le.

7 Okóm mógów ebélè le Jisas, ne nenoken lu, ne monen mò kul, “Mda ye dé. Bè ye mom hlikò.”

8 Omin le tukóng eta, laen kò dù bud tau ton le, tek són Jisas.

9 Bud kewót le bè yó, mulék le mosol. Tey kget kmon Jisas du mò kul, “Hol bè ye tagad tulón yóm deng ton ye yó koni ke là nan na mowil yóm Ngà Tau.”

10 Snólók le bè Jisas yó kem tau mung du yó koni, mon le, “Tahu kò yóm gel mon yó kem tmlok hlau, nan gna kól he yóm tehe Ilaydya, ominen kól yóm Misaya?”

11 Bnalà Jisas se, monen, “Tahu se yó, nan gna kól yóm Ilaydya mò eles hemtifés yóm kdéén.

12 Okóm tódô tulónu kuy,” mon Jisas, “deng sut se Ilaydya, okóm laen kò dù tau dmiól du. Tódô nmò le béleén yóm kul knóyó. Senged se yóm angkat nmò le bè yóm Ngà Tau, angkat tey kehlayam le du.”

13 Ne tódô tngón yó kem tau mung du yó, ebè Jan yóm tehe gel mabtays gónón gbak yóm tulón Jisas ni.

Hdó Jisas yóm tulus seitán malak yóm ngà

(Mark 9:14-29; Luk 9:37-43a)

14 Tikóng le deng bud semfulék ebè yó kem tey tau sbung le Jisas, wen sotu tau sut béleén, tódô tuden bukolen bè soluhen, monen mò du,

15 “Ó Sér, hol knoduhem yóm ngau, wen desen snidaf. Ya tey sidek kehkengkelen ke sok gel sut béleén. Wen se gónón gel mugod elem ofi duhen elem él.

16 Deng nitu ebè yó kem gel lemolò kóm, okóm là gbek le du.”

17 Omin Jisas mudél, monen, “Yu kem tau kmoen ni, ali ye hemda. Gel sekban yóm kehedem ye. Deng tey kegenu ne nõ lem blóng ye, ne deng tey kehlawihu nawahu béle ye. Nitem edini kuy yóm ngaem.” Tahu se, niten ebéléén.

18 Tódô hdó Jisas yóm gel malak yóm ngà yó, ne sen-gengen se tódó hyu yóm ngà.

19 Kogolen bè yó, mógów le ebè Jisas yó kem gel lemolò du, tek són lu, mon le mò du, “Moen de kum ke là gbek me hdó yóm tulus seitán malak tum ngà tu koni?”

20 Mon Jisas se, “Abay se tolo udi kehtahu ye. Tódô tulónu kuy ktahuhen, ke bnotù tekuy yóm kehtahu ye, anien ke olon senged bè kutit yóm lem hulu boluyen mustard, botong gbek ye tódó mon du bè yóm bulul nii, ‘Milihi etuu.’ Nénégem kà tódóén mili. Laen kò dù là gbek ye du.

21 Okóm yóm tulus seitán malak yóm ngà yó koni, tek sotu hdó du, tek són yóm kni ye bè Dwata, mung du yóm kfasting ye.”

Yóm gewu dulék Jisas eles tmlón du yóm angkat katayen

(Mark 9:30-32; Luk 9:43b-45)

22 Sotu kdaw bè yó, gotu le stifun bè Galili yó kem gel lemolò ke Jisas, ne mon Jisas mò kul, “Angat blay le elem tdok yó kem tau yóm Ngà Tau

23 mò hfatay le. Okóm bè getluhen kdaw, bud hlowil Dwata.” Bè yóm ktulón Jisas du kul nim ni, ya tey sidek keblat nawa le du yó kem gel lemolò du.

Yóm kbayad Jisas bè Gónó Dwata

24 Timbow le gefet bè Kapérnaum le Jisas ne yó kem gel lemolò du, wen kem tau fen gel mtuk yóm bayad bè Gónó Dwata kól bè Pitér, snólóken, monen, “Gel mayad kò kun yóm tau gónó ye gel htolok yó?”

25 Mon Pitér se, “Igò se.” Kewót Pitér bè yó, husek elem gónó le.

Unihen husek, tódó kendel wen snólók Jisas béleén, monen, “Ó Simun, tedu kóm kehedem du nim ni? Bè ni te tonok, tau du se fen gel mayad bwis bè yóm tau hol geta, kem ngaen kò, duhen ke yó kem tau knamalen?”

26 Bnalà Pitér se, monen, “Yó kem tau knamalen.”

Mon Jisas se, “Ke lómón yó, là dog le mayad ne yó, yó kem hol kun ngà.

27 Okóm là huhen ke hebut tekuy lu ni kem tau mtuk ni. Yake lemwóti dé ebè lanaw na a dmulé. Nwahem yóm utón él

tanay semkot ne yóm filak mgel tonem lem baken, yó se mò kut bayad lewu te.”

18

Yóm hol geta bè yó kem tau nogot Dwata (Mark 9:33-37; Luk 9:46-48)

¹ Bè yóm kdaw yó, mógów le ebè Jisas yó kem gel lemòlò du, snólók le béléen, mon le, “Tau du se hol geta bè yó kem tau nogot Dwata?”

² Bè yóm kbalà Jisas kul, wen ngà tnabahren ebéléen, hdaen lem blóng le,

³ monen, “Ngem nim ngà nii, là kò ktesen du yóm kegetahen. Tódò tulónu kuy ktahuhen,” mon Jisas, “ke là tenles ye du yóm kuy kehedem lómón yóm kun kehedem nim ngà ni, là kò ye na a gmung bè kogot Dwata tau.

⁴ Duhen yó, yóm tau là hegetahen knóen bè kem dumuhen lómón yóm kun nmò nim ngà nii, du se yóm hol geta bè yó kem tau nogot Dwata.

⁵ Ne ke wen tau hmódó yóm sotu ngà lómón yóm ngà nii mlan bè dou boluy, lómón se ke o ne yóm hnódóhen.”

Ketgama yóm sindil

(Mark 9:42-48; Luk 17:1,2)

⁶ Bud mudél Jisas, monen, “Ke yó nmò yóm sotu tau, ke lem wót béléen gónóhen là bud hemtahu béléu yóm sotu ngà, mom hyu bè yóm tau yó he ke tódò bot elem mohin gu laanen là deng wen ngà hebtangen, tléwéng bè liholen yóm botu bong gónó le gel gmaling mò heblaten etlaan.

⁷ Tey kodu le yó kem tau talak tonok, abay se tey dè mit kul là hemtahu. Sal gel sut bè tau se yóm yó, okóm angkat tey tafaken yóm tau mò du.

⁸ Yó gónóm mon, ke doli sigelem duhen ke doli tihem mit kóm là hemtahu, hyu ke tódò kenlengem, ne botem. Mom hyu béléem he ke lana béléem doli tihem duhen ke doli sigelem syan ke gutahem yóm klowil laen dù sónen. Laen kò ofolem du yóm klewu tihem ne klewu sigelem ke deng mom niten uu elem lanaw ofi, yóm ofi laen kò dù tul katayen.

⁹ Ke sotu matahem mit kóm là hemtahu, tódò lensitem, ne tudaem. Mom hyu béléem he ke lana sotu matahem syan ke gutahem yóm klowil laen dù sónen. Laen kò dù ofolem du yóm klewu matahem ke deng mom tudà le uu elem lanaw ofi.”

Yóm hlingón bè yóm ubiha tabag

(Luk 15:3-7)

¹⁰ “Hyu ke béen abay wen hen-gnok ye bè ni kem ngà nii. Tódò tulónu kuy, eles wen yó kem hógów Dwata tendo gel nô bè Mà bè longit fen gel semgyok kul.

¹¹ Yó hol nógówen elem benwu yóm Ngà Tau, nan e tnóbóng yó kem tau deng lana.

¹² Mò kehedem ye du se kuy? Ke wen tau mfun lematu ubiha, mò kmoen du de ke sotu lana bélé le? Ngem kà nan na tebel du yó kem syóm folò syóm bè yóm gónón hótób kul talak bilil nan e hnebel yóm sotu tabag bélé le.

¹³ Bè yóm ktonen du, tey kligalen. Tódò tulónu kuy ktahuhen, tey bong he kligalen du yóm sotu lana deng tonen senta yó kem syóm folò syóm là lanahan.

¹⁴ Senged se knawa yóm Mà tekuy bè longit. Là kóen mógów ke sotu bè yó kem ngà lómón ni ke tô lana bè soluhen.”

Ktolok Jisas yóm kmò keseflifót

¹⁵ “Ke wen gónón gemsalà béléem yóm dumuhem hemtahu, tódò mógów ebéléen, ne sentulón ye sòn yu lewu ye yóm salaan béléem. Ke hnungolen uu, bud mulék hyu yóm keswè ye.

¹⁶ Okóm ke là hnungolen kóm, miti sotu duhen ke lewu tau mò dumuhem bè yóm bud kógówem ebéléen anì gloloem yóm deng monen bè Sulat Dwata, yóm monen, “Ke wen gónóm tmifú dumum tau, hyu ke wen lewu duhen ke tlu tau mò fen hmungol du yóm monem.”

¹⁷ Okóm ke là dog hnungolen kul, tódò gotu tulón ye yóm kdéen bè gónó le gel stifun yó kem Ju. Okóm ke là dogen hmungol balú yóm deng kwit ye du bè gónó le gel stifun yó kem Ju, hol lómón kmò ye ebéléen, lómón yóm kmò ye ebè yó kem tau là hemtahuhen bè Dwata, ne bè yó kem dumu tau gemsalà.”

Yóm gel kenbé ye, ne yóm là kenbé ye du

¹⁸ “Tódò tulónu kuy ktahuhen,” mon Jisas, “yó se nmò kenbé ye talak tonok, angkat bud kenbé Dwata bè longit snéen. Yó se nmò là kenbé ye du, là se kenbé Dwata du bè longit snéen.

¹⁹ Ni mò hol sù ye bè nawa ye. Arien ke tek lewu tau mni bè Dwata, ne deng ssotu nawa le mni du yóm hni le, tódò blay Mà bè longit kul yóm hni le béléen yó.

²⁰ Baluen he ke tek lewu duhen ke tlu tau stifun mlan bè dou boluy, senged knóu bélé le.”

Yóm hlingón bè yóm tau là hñifóten ke dumuhen

²¹ Omin Pitér mógów ebè Jisas, wen snólóken béléen, monen, “Ó Sér, ke sónmoen gemsalà béléu yóm dumuhu, hilu duléku de hmifót du? Hitu duléku kò?”

²² Bnalà Jisas se, monen, “Là tek hitu dulékem du, okóm hitu folò duléken hitu kehñifótem du.

²³ Abay se yóm kogot Dwata tau, hol lómón yóm sotu hningónu ni. Tehe yu ekni, wen sotu tau hol geta kun mtuk bayad bè yó kem tau gel mò nmò béléen.

²⁴ Yó tanay nit le ebéléen yóm sotu tau mutóng deng hilu kati filak.

²⁵ Okóm yóm tau ni koni, laen kô gónón ma mò bud bayaden du yóm tey utóngen yó. Yó tódô tô nmò yóm tau hol geta béleén, tódô tô hbaluen mò klifen, mung du yehenen ne kem ngaen, kkólen bè yó kem kimuhen mò mayad du yóm nutóngen.

²⁶ Okóm tódô na a kendel mtud bukól bè solu yóm tau hol geta yóm tau yó, monen, 'Nam hanay kut nawam, Sér, angkat gotu bnayadu he yó yóm utóngu béleém.'

²⁷ Tahu se, tódô bud mulék koduhen du yóm tau hol geta yóm tau yó koni. Tódô hñifóten béleén yóm utóngen yó koni, ne tódô hewaen snéen.

²⁸ Timbow deng gewà yóm tau yó koni, bud gleeten se yóm sotu dumuhen mò nmò tehe mutóng béleén, bede olo hilu filak yóm kun utóng. Ominen tódô mogot du nan e nmò hemlong du, monen, 'Géhél bnayadem ou ni.'

²⁹ Okóm yóm dumuhen yó, tódô na a hegluduk bè solu yóm gónón mutóng, monen, 'Nam hanay kut nawam, Wè, angkat gotu bnayadu he yó yóm utóngu béleém.'

³⁰ Okóm là kóen dog móyó yóm tau mtuk yó, mom heblanguen efet gbayaden yóm utóngen béleén.

³¹ Timbow ton yó kem dumu tau mò nmò bè yóm tau hol geta yó, ya tey sidek kegnóm le du. Omin le mógów ebè yóm tau hol geta béle le, ne gotu tulón le du kdéen.

³² Kewót yóm tau hol geta, bud htabahen yóm tau yó koni. Mung ktonen du, monen, 'Tey hesek laen dù mu yóm uu. Deng hñifótu béleém yó kem tey utóng bongem lemwót bè yóm kehkoduhem béleu.

³³ Moen de ke là knoduhem du kedu-muhem lómón yóm deng dou kkodú kóm?

³⁴ Ya tey sidek kebut yóm tau hol geta yó koni. Tódô heblanguen mò tafaken du efet gbayaden yóm hol són utóngen."

³⁵ Bud mon Jisas, "Lómón sem ni ne angkat nmò Mà bè longit béle ye ket kuy ne sotu ke là tahu hñifót ye yó kem dumu ye gemsalá béle ye."

19

*Ktolok Jisas bè keso tau syehen
(Mark 10:1-12)*

¹ Timbow deng ktulón Jisas ni kem ni, ominen bud lemwót, tñagaken prubinsya Galili, mógów etu bè yó kem dumu benwu bè prubinsya Judiya fi fatu yóm él boluyen Jurdan.

² Tey tau wen bud huli du, ne gotu hkó Jisas yó kem gemnóm des béle le.

³ Yóm kónen bè yó, wen kem Farisi mógów ebéléen, wen snólók le béleén mò dalil gónó

le dmuón du, mon le, "Là sideken bè hlau tekuy kô ke skó bè yehenen yóm tau balú kihu buten?"

⁴ Bnalà Jisas lu, monen, "Deng hónô senfala ye yóm monen bè Sulat Dwata. Bè yóm hol kbuten nmò Dwata yóm tau, logi ne libun.*

⁵ Yó mon Dwata,

'Yó gónóm mon, gtagaken maen ne yéén yóm logi ne setnú le yóm tuha libunen,

ne baling le ssotu yóm lewu le yó.*

⁶ Yó gónóm mon, là kô le bud stólóng ne yó kem tau syehen, deng le baling ssotu ne. Duhen yó, yóm deng kun sensotu Dwata, béen abay wen tau bud semkó kul."

⁷ Bud snólók le béleén yó kem Farisi, mon le, "Ke lómón yó, moen se ke tehe snulat Musis yóm sotu hlau, yóm monen, 'Ke móyó skó bè yehenen yóm logi, nan ne wen sulat gónón fema mò iló yóm deng kkóhen du?' "*

⁸ Bnalà Jisas se, monen, "Yó gónó Musis smulat du yóm hlau yó, lemwót bè yóm ali kehlo nawa ye mò sidek se. Okóm bè hol kbuten, là kô na a kóyó Dwata du se yóm skó bè yehen.

⁹ Tódô tulónu kuy," mon Jisas, "yóm logi ke kóhen yehenen igoen se là mdà du ne ke bud myehen dumu libun, yó nmoen yóm tau yó, deng ndaen ne yóm libun gna yehenen."

¹⁰ Mudél le se kul yó kem gel lemolò ke Jisas, mon le, "Ke là se gbek me skó bè yehen me, dog myehen ne yó."

¹¹ Bnalà Jisas se lu, monen, "Là kdéen du tau gembek du yóm là myehen. Són gónón gembek du ke tódô Dwata mò du.

¹² Sal stólóng se yóm but gónó le là myehen kem tau. Wen se là myehenen, abay se wen iget le lemwót bè ksut le. Wen se là myehenen lan le kmafyn kul. Wen se là myehenen lemwót bè kimón le yóm hmò Dwata kul. Yó se tau gembek lemolò du ni kem monu ni, hol loloen."

Kni Jisas kul bè Dwata yó kem ngà lemnék

(Mark 10:13-16; Luk 18:15-17)

¹³ Wen se kem tau mit ngà ebè Jisas ani na le e hnok du, ne ani hñihen lu bè Dwata. Okóm yó kem gel lemolò ke Jisas, mom bnólów le lu.

¹⁴ Okóm mon Jisas, "Heflós ye lu edini yó kem ngà yó, bè ye abay henseng lu. Abay se yó kem tau nogot Dwata, hol le mkél bè knawa ni kem ngà lómón ni."

¹⁵ Omin Jisas gotu mnok kul ne mni béle le bè Dwata, ominen hlós ebè yóm gónón e solu.

* 19:4 Tekang Kbuten 1:27 ne 5:2.

* 19:5 Tekang Kbuten 2:24.

* 19:7 Hlau 24:1.

*Yóm lomi tau wen kendengenen
(Mark 10:17-31; Luk 18:18-30)*

¹⁶ Sotu kdaw bè yó, wen sotu tau mógówu ebè Jisas, monen, “Ó Sér, wen snólóku béléem. Tedu de yóm hyu mò nmou ani gotahu yóm klowil laen dù sónen?”

¹⁷ Bnalà Jisas se, monen, “Moen de ke snólókem béléu yóm hyu? Tek són Dwata yóm hyu. Ke hendeenem yóm klowil laen dù sónen, hol nimónem yó kem kun hlau Dwata.”

¹⁸ Mon yóm tau yó, “Hlau du de, Sér?”

Bud mon Jisas se, “Béi monok. Béi mda yehen. Béi mnagaw. Béi tmifú kéng.”

¹⁹ Nadatem maen ne yéem. Kenbong nawahem kem dumuhem lómón kbong nawahem yóm kóm knò.*

²⁰ Bud mudél se yóm lomi tau yó, monen, “Deng gotu lolou yó kem yó, Sér. Tedu de duen?”

²¹ Bud bnalà Jisas se, monen, “Ke móyó hol gult, tu ne muléki nam e hbalù kdé nò béléem, ne blayem bè tu kem élél yóm blihen. Ke yó nmoem, angat wen tey kendengenem bè longit. Ne lemwót yó dum kóm, loleom ou.”

²² Timbow gungol nim lomi lemnok ni koni yóm udél Jisas ebéléen yó, tódò lemwót, ya tey sidek keblat nawahen, abay se nalihen yóm tey kendengenen.

²³ Omin Jisas mudél ebè yó kem gel lemólò du, monen, “Tódò tulónu kuy ktahuhen, tey mgel bè yóm tau wen kendengenen ke tó hogoten ke Dwata klowilen.”

²⁴ Bud nulitu bélé ye. Tey mgel bè yóm tau wen kendengenen ke tó hogoten ke Dwata klowilen. Mom mahil he yóm kamél ke hfusek te bè yóm sol dalum.”

²⁵ Bè yóm kungol le du yó kem gel lemólò ke Jisas yóm monen yó, tey ketnga le du, mon le, “Ke lómón yó, tau du de gembek gmuta du yóm klowil laen dù sónen.”

²⁶ Temngel ebélè le Jisas, monen, “Ke bè tau, là gbeken du. Okóm bè Dwata, laen dù là gbeken du.”

²⁷ Omin Pitér mudél se kun, monen, “Ngem ni dém mi, Sér, glok me tódò gemtagak yóm kdéen lan me lemólò kóm. Bang tó ofol me se kum du?”

²⁸ Mon Jisas se mò kul, “Tódò tulónu kuy ktahuhen, ke deng kól yóm lomi benwu, ne ke deng bangan myón bè yóm gónóhen myón kmamal yóm Ngà Tau, wen snéen gónó ye myón kmamal bè yó, yu kem sfolò lewu gel lemólò du ni. Angat ye fen mogot kukum bè yó kem sfolò lewu bung tau semfu gu bè yóm tehe Israél.

²⁹ Ket tau, ke gloken gemtagak gónóhen, ne yó kem dumuhen setwolli, ne yó kem tuhahen, kkólen bè yó kem ngaen, duhen

ke tonoken lanen lemólò do, lematu dulék Dwata he bud hulék du ebéléen yóm deng gtebelen yó. Ne lelen yó he angat gmuta du yóm klowil laen dù sónen.

³⁰ Bede angat tey dé bè yó kem tau deng gegna nim kmoen ni, angat le bud ghuli bè yóm kdaw yó. Ne yó kem ghuli nim kmoen ni, angat le bud gegna bè yóm kdaw yó.”

20

Yóm hlingón bè yó kem tau mò nmò

¹ Bud mon Jisas mò kul, “Yóm kogot Dwata tau, hol lómón ke yóm sotu tau lamang grép huluhen. Sotu kdaw, tódò temkifu lemwót na a mebel tau mò nmò bè yóm huluhen yó.

² Tahu se, wen tau tonen, ne eles sentulón le gna yóm kmò ksukéyen kul sendaw. Ominen yó hewót kul mò nmò.

³ Timbow deng sóól mneged kdaw, ominen bud lemwót ebè fedyan yóm tau fun hulu, wen tau tonen bliwel mdà gu bè yó laen dù nmò le.

⁴ Ne monen mò kul, ‘Ke móyó ye, ne ye e mò nmò béléu bè huluhu. Henyuhu he ksukéyu kuy.’

⁵ Tahu se, na le e mò nmò yó kem tau yó. Timbow deng gtungu kdaw, bud mebel tau yóm fun hulu. Ne bud sóól mosol kdaw, bud yó se nmoen.

⁶ Timbow móyónen sdef kdaw, ominen bud lemwót, ne tolo wen he dumu tau mdà gu bè yó bè fedyan, snólóken bélé le, monen, ‘Moen ke tódò ye mdà bè ni laen dù nmò?’

⁷ Bnalà le se, mon le, ‘Laen dù tau hmò kum nmò.’

Bud monen se mò kul, ‘Mò ye nmò béléu dé bè huluhu.’ Tahu se, na le e mò nmò.

⁸ Timbow deng seklewet bè yó, ominen mon du mò yóm tau snaligen, ‘Tnabahem ne yó kem tau mò nmò, ne snukéyem lu. Gna snukéyem yó kem tau huli sut, ngangen efet kól bè yó kem tau tanay sut.’

⁹ Tahu se, gna bnayaden yó kem tau hol són huli sut. Tódò blayen kul yóm sukéy geblà bè yóm sukéy le sendaw.

¹⁰ Ngangen ne snukéyen yó kem tau gna sut bè yó. Ofo kul ke bong kul sukéy, okóm là. Tódò senged se.

¹¹ Bè yóm kton le du, tey kekulón le du yóm tau fun hulu yó,

¹² mon le mò du, ‘Yó kem tau huli sut yó, là dengen legen he yóm kul kmò nmò, hanà tek sotu uras le. Blaem nim kum, deng sendaw me ni ne htanggas bè nóng kdaw, tódò kóem gotu hsengedem sukéy me.’

¹³ Bnalà yóm tau fun hulu yóm sotu tau mudél ebéléen, monen, ‘Ó Wè, là kó lenugihu kóm. Igò tekuy sem deng hyu semtulón du du eginu yóm sukéy ye sendaw.

* 19:19 Kehewà 20:12-16, Hlolò 19:18, Hlau 5:16-20.

¹⁴ Nwa ye ne yóm sukéy ye, ne mulék ye. Tódò dou kóyò hsendeng du yóm kun sukéy yóm tau huli sut bè yóm kuy.

¹⁵ Ilóem laen dù dou kwalis mò du yóm dou kóyò bè yóm dou filak? Nófò ye kó yóm kкодóduh yó kem tau huli mò nmò? ”

¹⁶ Ne bud mon Jisas mò kul, “Yó kem ghuli ni kmoen ni, angat bud gegna. Ne yó kem gegna ni kmoen ni, angat bud ghuli.”

Getlu dulék Jisas tmulón du yóm angat katayen

(Mark 10:32-34; Luk 18:31-34)

¹⁷ Bè yóm tolo ksubò le Jisas ebè Jirusalim, niten hlayuk udi yó kem sfolò lewu gel lemòlò du, wen tulónen kul sónen lu, yó monen mò kul,

¹⁸ “Ngem nim kógów tekuy ebè Jirusalim ni, sok kuy kól ditu, angat eted le yóm Ngà Tau elem tdok yó kem geta bè yó kem gel demsù ebè Dwata, ne yó kem tau gel tmolok hlau. Yó angat kukum le du, hatay.

¹⁹ Ne angat blay le elem tdok yó kem tau là ju le. Tey kehlowon le du, ne lel le mfes du, ngangen efet tnutuk le bè kros. Bede bè getluhen kdaw, tódò bud hlowil Dwata.”

Yóm tò hni tuha libun Sibidi bè Jisas

(Mark 10:35-45)

²⁰ Timbow kogolen bè yó, mógów bè Jisas tuha libun Sibidi, mung du lewu ngaen logi. Tódò tuden bukolen bè solu Jisas, wen tò nýò hnihen béleen.

²¹ Ne mon Jisas se mò du, “Moem de?”

Monen se, “Wen tò hnihu béleém dé, Sér. Kesok deng kól du yóm kegetahem, kóyóu ke fasadem dou ke angat le myón klohokem ni kem lewu ngau ni, sotu fi bè kwananem ne sotu se fi bè iwóngem.”

²² Bnalà Jisas se, bede mudél ebè yó kem lewu ngaen, monen, “Là kò tngón ye du yóm hni ye yó. Gbek ye hembala du kò ke ye gemfà du yóm angat glumfaku?”

Mon le se, “Gbek me.”

²³ Mon Jisas, “Tahu se, angat glumfak ye se yóm dou glumfak. Okóm laen dù kwalisu mélék du yóm tau myón fi bè kwananu ne fi bè iwóngu. Dwata se mò du yóm yó. Deng wen ne eles néléken mò angat hyónen bè yó.”

²⁴ Timbow gungol yó kem sfolò gel dumu le lemòlò ke Jisas yóm hni yó kem lewu tau setwoli yó, ya tey sidek kebut le kul.

²⁵ Omin Jisas gotu bud semtifun kul, monen mò kul, “Deng hónò tngón ye ne kul kmò yó kem tau hol geta talak tonok, tey gel kdansók le yó kem tau nogot le. Ne yó kem tau mogot kukum, tey gulé kwit le yóm kukum nogot le.

²⁶ Okóm bélé ye kuy, là kò yó du yóm hyu bélé ye. Ke wen sotu bélé ye móyò ke du baling geta bè kem dumuhen, yake hol nõ béleen yóm nawa yóm tau gel tóbóng lówó.

²⁷ Ne ke wen bélé ye móyò ke du hol gegna bè kem dumuhen, yó dé kmoen lem blóng ye, lómón ke du yóm klifen ye.

²⁸ Yakà lómón ni du se yóm kun nmò yóm Ngà Tau. Là kò yó du nógówen edini ke fen na a hdatù lem blóng kem tau. Okóm yó nógówen mò na e tmóbóng kul. Angat hamaen yóm kun klowil mò msok yó kem tey dê tau gu lem hatay.”

Kehton Jisas yó kem lewu tau butò

(Mark 10:46-52; Luk 18:35-43)

²⁹ Timbow le bud lem wót gu bè Jiriku le Jisas ne yó kem gel lemòlò du, ya tey tau wen bud mung du.

³⁰ Ne wen lewu tau butò myón bè kilil lan. Tikóng gungol le yóm klan Jisas bè yó, tódò kendel henmung le tmaba, mon le, “Ó Sér, sfu tehe Dabid, hol knoduhem mi.”

³¹ Okóm deng mom senbólów le lu yó kem tey tau bè yó, mon le, “Bè ye abay hebnes tmaba.” Tnódónem mom hennoli le tmaba, “Ó Sér, sfu tehe Dabid, hol knoduhem mi.”

³² Timbow gungol Jisas yóm ktaba le, tódò hegsud mdà, ne ominen tmaba kul ebéleen, monen, “Tedu de yóm tò hmò ye do?”

³³ Mon le se, “Htonem mi, Sér.”

³⁴ Ya tey kкодóduh Jisas kul yó kem tau yó, ominen mnok bè mata le. Tódò sen-gengen se yóm bud kton le, ne tódò henmung lolò le Jisas.

21

Khódó le ke Jisas bè Jirusalim

(Mark 11:1-11; Luk 19:28-40; Jan 12:12-19)

¹ Ngang le Jisas mógów ne yó kem gel lemòlò du efet le moni bè Jirusalim. Deng le gefet bè yóm sotu benwu udi boluyen Bitfid, nõ lem henfek yóm Bulul Ulib. Bè yóm kól le bè yó, wen lewu bè yó kem gel lemòlò du hógów Jisas tukò gna kul,

² monen mò kul, “Mógów ye do etu bè tum benwu udi ditu tuu. Sok ye kól ditu, angat wen ton ye asnu fét hanà malak nati. Tódò ntó ye, nit ye do edini.

³ Ke wen tau smólók kuy, mon ye, ‘Wen muhen du yóm gónó tekuy mogot.’ Kaem tódò kendel hlusen kuy.”

⁴ Ni se deng gónóhen dohò yóm tehe snulat yóm sotu tehe tugod Dwata ekni, yóm monen,

⁵ “Hol tulón ye yó kem tau menwu bè Sayun, mon ye,

Ngem deng sut yóm tau hol geta bélé ye, tau là kóen hegeta knò, smakay asnu.

Snakayen yóm nati asnu.”*

⁶ Tahu se, lem wót yó kem lewu hógówen yó koni, tódò nmò le se yóm deng mon Jisas mò kul.

* 21:5 Sikaraya 9:9.

⁷ Nalak le ebè Jisas yóm asnu, mung du ngà natihen, afid le du dumu nes le, ne hsakay le ke Jisas.

⁸ Ne tey dê bè yó kem tey tau mung ke Jisas, gotu nból le mulit lan yó kem dumu nes le. Wen se bélé le ma doun koyu, gotu hlasà le mulit lan mò gónó le hegfan yóm kadat le du.

⁹ Tódó le gotu mensag yó kem tau tukô gna du ne yó kem fen tukô huli du, mon le,

“Hol dóyón tekuy yóm semfu bè yóm tehe Dabid. Dwata he hol tmóbóng du nim tau deng hógówen ni. Hol dóyón tekuy dé Dwata.”*

¹⁰ Timbow deng kól bè Jirusalim Jisas, ya tey ketnga le du yó kem kdéen tau menwu bè yó, snólók le, mon le, “Tmau du de ni?”

¹¹ Bnalà yó kem tey tau sbung, mon le, “Ni se yóm Jisas, yóm tugod Dwata lemwót bè Nasarit, yóm sotu benwu bè prubinsya Galili.”

Klo Jisas yó kem tau hembalù lem Gónó Dwata

(Mark 11:15-19; Luk 19:45-48; Jan 2:13-22)

¹² Tódó hlós elem Gónó Dwata Jisas, tódó glohen yó kem tey tau bemli ne yó kem tey tau hembalù lemen. Yó nmoen, nan e gotu lo lu. Gotu lugoden yó kem lemisa yó kem tau gel lemuluk filak. Dalang se yó kem gónó le gel myón yó kem tau hembalù kfati, gotu lugoden.

¹³ Mon Jisas mò kul, “Igò Dwata deng mon du bè Sulaten, ‘Yó muhen yóm dou Gónó mò gónó le gel mni ebéléu yó kem tau.’ Okóm,” mon Jisas, “deng mom henbaling ye gónó le nõ yó kem tau gel mnagaw.”*

¹⁴ Bè yóm igò Jisas nõ bè yó bè Gónó Dwata, tódó le gotu mógów ebéléen yó kem tau butò ne yó kem tau tugò, ne gotu hkó Jisas yó kem des le.

¹⁵ Okóm yó kem geta bè yó kem gel demsù ebè Dwata ne yó kem gel tmlók hlau, gotu le mom lembut bè yóm kton le yó kem hentaw ton nmò Jisas ne bè yóm kungol le yó kem ngà tendo dmóyón du bè yó lem Gónó Dwata. Yó tendo mon le, “Hol dóyón tekuy dé yóm sfu yóm tehe Dabid.”

¹⁶ Mudél le ebè Jisas yó kem tau lembut du yó koni, mon le, “Gungolem kó udél tu kem ngà?”

Mon Jisas se, “Gungolu se.” Ne bud monen, “Là deng gesfala ye du kó yóm sotu tulónen bè Sulat Dwata, yóm monen,

‘Ó Dwata, balù yó kem ngà kólen bè yó kem ngà tolo hebón, deng tolókem lu anì hol tódó yóm kdóyón le kóm.’ ”*

¹⁷ Timbow deng yóm kudél Jisas yó koni, ominen tmagak kul, hlós ebè Bitani, ne ditu gónón tungò.

Kudél Jisas yóm koyu fig
(Mark 11:12-14, 20-24)

¹⁸ Timbow hayahen bè yó, tódó bud temkifu Jisas mulék ebè syudad Jirusalim. Yóm tolo knóen bè lan, gnómen ne kbitilen.

¹⁹ Ne wen tonen sotu koyu mdà kilil lan boluyen fig. Omin Jisas mógów etu, nénégen ke wen bunguhen, okóm laen duen, tódó hono doun. Omin Jisas mudél ebè yóm koyu yó, monen, “Nbuten ni là kói na e bud mungu.” Tódó sen-gengen se mékeng yóm koyu yó.

²⁰ Ya tey kehtaw le du yó kem tau gel lemólò ke Jisas yóm kton le du yó, mon le, “Kiholen kendel tódó gotu mékeng nim koyu ni?”

²¹ Mon Jisas mò kul, “Tódó tulónu kuy ktahuhen, ke wen kehtahu ye, ne ke là megewu nawa ye, gbek ye snéen mò du yóm nmou bè nim koyu ni. Là sónen du yó gbek ye, gbek ye snéen tódó mdók nim bulul nii anì mdó bè ni, ne mili elem mohin, botong tódó nimónen nyu.

²² Ke wen kehtahu ye, balù kihu hni ye bè Dwata, guta ye.”

Ksólók le yóm kwalis Jisas
(Mark 11:27-33; Luk 20:1-8)

²³ Bud mulék ebè Gónó Dwata Jisas. Yóm igoen tolo tmlók bè yó, sut le béléen yó kem geta bè yó kem gel demsù ebè Dwata ne yó kem tuha gónó le gel galak, mon le mò ke Jisas, “Wen kó kwalisem mò du ni kem deng nmoem bè ni? Tau du se bemlay kóm kwalis mò du?”

²⁴ Bnalà Jisas se lu, monen, “Wen se dou snólók béle ye. Ke tngón ye balaen, tulónu kuy se yóm gónón lemwót yóm dou kwalis mò du yóm deng nmou bè ni.

²⁵ Ni snólóku béle ye. Bè yóm tehe gel kbabtays Jan yó kem tau, gónón lemwót de kwalisen mò du? Lemwót bè Dwata kó, duhen ke tódó lemwót bè kem tau?”

Omin le na stulón són lu yó kem tau smólók ke Jisas yó koni, mon le, “Tedu kmò kbalà tekuy du du? Ke mon tekuy se lemwót bè Dwata, dô monen, ‘Moen de ke là hentahu ye du?’

²⁶ Ke bud mon tekuy se lemwót bè tau, déke mom wen sidek nmò le béle tekuy yó kem tau, abay se bè kul kehedem du, hol tau tugod Dwata yóm Jan.”

²⁷ Omin le malà ke Jisas, mon le, “Là kó tngón me du balaen yóm snólókem yó.” Ne bud mon Jisas se, “Ke là tngón ye du balaen yóm dou snólók, là se tulónu du kuy gónón

* 21:9 Lingón 118:25,26 ne 148:1.

* 21:13 Isaya 56:7, Jirimaya 7:11.

* 21:16 Lingón 8:2.

lemwót yóm dou kwalis mò du yóm deng nmou bè ni."

Yóm hlingón bè yó kem lewu ngà logi set-woli

²⁸ Omin Jisas bud mon du mò kul, "Tedu de kmò kehedem ye du nim nii? Wen sotu tau lewu ngaen logi. Lemwót yóm mà le, mógów ebè yóm ngaen twogu, ne monen mò du, 'Ó ngà, nam e mò kut nmò bè gónó mulu grép dé kemdaw ni.'

²⁹ Okóm mom mon yóm ngaen twogu yó, 'Bée dou.' Okóm legen udi bè yó, tenlesen hendemen ne tódô lem wót etu.

³⁰ Ominen bud mógów ebè yóm ngaen són twoli, ne senged se yóm kmonen du. Ne mon yó sem ngaen, 'El, mógówe kdeng Mà.' Okóm là sem dogen dohò."

³¹ Bud mon Jisas, "Mahi du de belê le mimón ke mà le?"

Ne mon le se, "Yóm ngaen twogu."

Omin Jisas bud mon du mò kul, "Tódô tulónu kuy, mom gna mung bè yó kem tau nogot Dwata yó kem tau gel mtuk bwis, ne yó kem libun hdóyón. Là kuy, là kô ye na a gmung.

³² Ngem yó dém le ksut Jan lem blóng ye yóm tau gel mabtays. Tey kehetngónen du kuy yóm lan hyu belê ye, okóm là kô ye dog himón. Deng mom yó mimón du yó kem tau gel mtuk bwis ne yó kem libun hdóyón. Igò ye sem deng gotu mton du nim ni, ewenem là kô tenles ye du kehedem ye, là kô dog hentahu ye du yóm gel tulón Jan kuy."

Yóm hlingón bè yó kem tau mogot nmò là kulit

(Mark 12:1-12; Luk 20:9-19)

³³ "Ni hnungol ye," mon Jisas, "wen bud sotu hningónu belê ye. Wen sotu tau lamang huluhen yóm sotu kay mungu boluyen grép, ne lenabaten gu hilolen. Ne ominen mò yóm angkat gónó le kemmes élen, ne nmoen snéen yóm gónó geta mò gónó le gel nô yó kem tau mentey du. Ne mdengen se kem tau hogoten du yóm huluhen, ominen lem wót milo ebè yóm sotu benwu.

³⁴ Tikóng deng kól bè kbunguhen yó kem huluhen yó, wen kem tau dóken ebè yó kem tau deng tehe hogoten du anì hwit le ebéléen yóm kun bad.

³⁵ Timbow le kól ditu yó kem tau dóken, deng mom yó nmò le belê le, tódô sensogot le lu. Tey sidek kboug le yóm sotun, ne hnatay le yóm sotuhen, ne sentudà le botu yóm sotuhen.

³⁶ Ominen bud wen tau hógów yóm tau fun hulu yó koni, malù le wadag. Senged snéen kmò le kul yó kem tau mogot hulu.

³⁷ Bè yóm hol sónen, yó nmò yóm tau fun hulu, tódô hógówen yóm ngaen logi, monen, 'Kaem ni se yóm nadat le, yakà ngau du.'

³⁸ Okóm timbow ton yó kem tau mogot hulu yóm ngaen yó, mom mon le, 'Yó nii yóm ngà yóm tau fun hulu. Lemwót kuy ne, na tekuy e hnatay anì gfun tekuy yóm tonok angkat nfunen.'

³⁹ Tahu se. Tódô sensogot le yóm ngaen, ne tudà le hulé labat ne ditu gónó le hmatay du."

⁴⁰ Omin Jisas bud mon du mò kul, "Ke deng kól bè yó yóm tau fun hulu, tedu se angkat nmoen bè yó kem tau deng tehe snaligen yó?"

⁴¹ Bnalà le se, mon le, "Angat gotu hnatayen lu yó kem tau sidek nmò le yó, ne bud hogoten tu kem dumu tau hyu keblay le bad bè ket kgefeten."

⁴² Omin Jisas bud mon du mò kul, "Tahu se yóm mon ye. Deng gsfala ye kô kuy yóm tehe mon Dwata bè Sulaten,

'Wen botu deng senkbê yó kem tau hdà gónó, ofo kul ke laen dù muhen.

Anì monem, yó se yóm hol tahu botu mò hembegele du yóm gónó hdà le.

Yó se yóm deng nmò Dwata, ne tey kehtaw tekuy du yóm nmoen yó.*

⁴³ Tódô tulónu kuy," mon Jisas, "lemwót bè yóm kekbê ye du yóm botu yó, là kô ye bud gmung ne bè yó kem tau nogot Dwata. Yó bud tles nogoten yó kem tau mò du yóm nóyóen.

⁴⁴ Yóm botu monu yó koni, ke wen tau btang etahen, tódô gotu mfutul lówóhen. Ne ke wen tau gdilanen, tódô gotu lemuna."

⁴⁵ Ne tódô tngón yó kem geta bè yó kem gel demsù ebè Dwata ne yó kem Farisi yóm kegbaken ebélê le yó kem hningón Jisas yó.

⁴⁶ Yó nmò le, tódô tô kendel kenfô le, okóm likò le yó kem tey tau wen sbung bè yó, yakà hentahu le du hol tugod Dwata yóm Jisas.

22

Yóm hlingón bè yóm mò ken bong bè gónó mulu

(Luk 14:15-24)

¹ Bud wen tulón Jisas kul hlanan bè hlingón, monen,

² "Yóm kogot Dwata tau, hol lómón yóm tau hol geta, wen ken bong nmoen bè lówó yóm ngaen logi.

³ Timbow deng hto yóm butengen mò du, ominen hógów yó kem tau mò nmò beléen anì na le e nangay tu kem tau deng tinoken. Okóm mom là dog le móyò mógów yó kem tau deng tinoken yó.

⁴ Ominen wen dumu tau bud hógówen etu belê le, monen mò kul, 'Tulón ye kul deng deng ne yóm ken nmou. Deng wen kem

* 21:42 Lingón 118:22,23.

safi tnetéu, dalang se yó kem ngà safi mabù, deng gotu tnetéu. Deng gotu deng ne kdéén. Géhél le do edini ne bè nim ken bong nmou bè lówó yóm ngau logi.’

⁵ Okóm yó kem tau deng tinoken yó, là kò le dog hekmón, mom henle le yóm kul nmò. Lemwót sotu, mógów ebè numahen, ne lemwót sotu, mógów ebè tindaen.

⁶ Ne yó nmò yó kem dumu, mom sensogot le yó kem tau dók yóm tau hol geta, deng mom senboug le lu, ne hnatay le lu.

⁷ Ya tey sidek kebut yóm tau hol geta. Tódò hógówen yó kem sendaluen nan e hfatay lu yó kem tau monok yó, gotu htemen yóm kul syudad.

⁸ Ominen bud tmba yó kem tau mò nmò béléén, monen, ‘Deng gotu deng ne kdéén. Yó kem tau deng gna tò tinoku, là kóen knóón kken le du kul nim ken nmou ni.

⁹ Mógów ye kut bè tu kem lan lamang, gotu tmba ye kihu tau ton ye ebè nim ken bong nmou.’

¹⁰ Tahu se, kewót yó kem tau dóken, gotu le mógów ebè tu kem lan lamang, gotu sentifun le yó kem tau ton le. Wen se bélé le kem tau hyu kmò le. Wen se kem tau gel mò sidek. Gotu sentifun le lu efet tódò meskel lem yóm gónò gónó le mò ken bong yó.

¹¹ Ominen mógów elem blóng le yóm tau hol geta mò ken yó koni nan e kenlò lu. Okóm wen tau tonen lem blóng le bè yó là lemseken yóm nes gel lesele le bè gónò mò ken. Mung kudélen ebéléén yóm tau hol geta yó koni, monen,

¹² ‘Knmò khusekem elemen kóm du Wè, igoem là lemsek du yóm nes bè gónò mò ken?’ Ne là se kóen gudél yóm tau yó.

¹³ Omin yóm tau hol geta yó, mók yó kem tau gel mò nmò béléén, monen, ‘Ni nfét ye sigelen ne tihen, bot ye etu bè lewà bè gónón ali kmifu ani bè yó gónón tendo heslaf ne dmumu mkik, ne sembéhé kakim.’ ”

¹⁴ Bud mon Jisas, “Hol lómón yó se yóm nmò Dwata. Tey dê tau tinoken, okóm là holen wen néléén.”*

Ksólók le yóm kmò kbayad bwis bè yóm tau hol geta bè Rom

(Mark 12:13-17; Luk 20:20-26)

¹⁵ Bè yóm kungol kem Farisi du yó kem tulón Jisas yó koni, omin le lemwót mebel lan le gemkfô du bè kudélen.

¹⁶ Yó nmò le, wen tau dók le ebéléén, hono kem tau gel lemólò kul, ne wen se bélé le kem kun tau Hirod. Timbow le kól bè Jisas, mon le mò du, “Ó Sér, tódò tngón me sal gel tahu yóm gel tulónem bè yóm kun kóyó Dwata bè tau. Ne laen dù klikoem tmulón du, abay se laen dù tau mtukul henlom nawahem.

¹⁷ Wen tô snólók me béléén,” mon le. “Gsalà bè hlau tekuy kò yóm gel kbayad te bwis ebè Sisar, yóm tau hol geta bè Rom mogot tekuy? Mò kehedemem du se kóm?”

¹⁸ Okóm tódò tngón Jisas se yóm tô atul le, ne yó monen mò kul, “Tey tau hemtedeng knò nim yu. Moen de ke tò tnilów hnolot ye ou?”

¹⁹ Tolok ye do kun yóm filak mgel mò bayad bwis bè yóm tau hol geta yó.” Tahu se, wen tolok le du.

²⁰ Ne yó monen, “Tulad du de nô du nim filak ni? Ne boluy tau du nô du?”

²¹ Mon le se, “Sisar.”

“Na,” mon Jisas, “ke Sisar se funen, tódò blay ye ke Sisar yóm kun, ne blay ye ke Dwata se yóm kun.”

²² Ya tey ketnga le du yóm kbalà Jisas kul yó. Tódò le lemwót, tngak le Jisas.

Ksólók le yóm bud klowil tau gu lem hatay (Mark 12:18-27; Luk 20:27-40)

²³ Segeng bè yóm kdaw yó, wen se bè yó kem Sadyusi sut bè Jisas. Ni kem tau ni là kò hentahu le du ke angkat bud hlowil Dwata yó kem tau deng matay.

²⁴ Wen se kul snólók bè Jisas, mon le, “Ó Sér, tehe gel mon Musis, ke matay yóm logi igò le là deng mngà yóm yehenen, yóm twolihen tmodol béléén bud lemólò yóm kun yehen ani wen ngaen béléén mò kun sfu yóm twoguhen.*

²⁵ Na,” mon le, “tehe yu ekni, wen hitu kem logi ssotu sut le menwu lem blóng me. Ne myehen yóm hol twogu bélé le, bede mom kendel matay igoen là deng wen ngà le. Ne yóm twolihen tmodol béléén bud lemólò yóm yehenen.

²⁶ Okóm bud matay snéen kun gu laanen là deng wen ngà le. Ne senged se yóm getlu twolihen. Ngang le stuffi slólò efet kól bè yóm ghitu le, ne senged gotu katay le.

²⁷ Ngangen efet matay se kun yóm libun.

²⁸ Ni snólók me béléén ni,” mon le, “bè yóm angkat kehlowlil Dwata tau elem hulin kdaw, mahil du bélé le bud gemyehen du yóm libun yó? Blaem deng tehe gotu sentufi le myehen du yóm hitu le.”

²⁹ Bnalà Jisas se lu, monen, “Tey salà yóm kehedem ye. Yó duónen, là tngón ye du yóm nô lem yóm Sulat Dwata, ne là se tngón ye du yóm kfasang Dwata.

³⁰ Bè yóm angkat kehlowlil Dwata kem tau deng matay, laen kò dù bud angkat syehen, abay se angkat le mkél bè yó kem hógów Dwata gel nô bè longit.

³¹ Ne bè yóm snólók ye bè angkat bud klowil tau, là deng gesfala ye du kò yóm tehe tulón Dwata kuy bè Sulaten? Yóm monen,

* **22:14** Yó sotu lanen yóm mon Jisas ni, “Tey dê tau tinok Dwata, okóm là holen wen yóm móyó mung.” * **22:24** Hlau 25:5,6.

³² ‘Ou se sana kul Dwata le Abraham ne Isak ne Jakub.’ Bè yóm udél Dwata yó gónó ye temngón du yóm deng bud kehlowil Dwata kul. Abay se yóm Dwata, du se Dwata yó kem mowil, là bè yó kem là mowilen.”*

³³ Yóm kungol le yóm ktolok Jisas, ya tey ketnga le du yó kem tey tau wen sbung bè yó.

Yóm hlau Dwata ali bong muhen bè kdéen
(Mark 12:28-34; Luk 10:25-28)

³⁴ Timbow gungol yó kem Farisi yóm klaen dog gmò le bè Jisas yó kem Sadyusi, omin le stifun se kul,

³⁵ ne wen sotu bélè le yóm gel tmlok hlau, tô tmlów smólók ke Jisas se kun, monen,

³⁶ “Ó Sér, mahi du bè yó kem hlau Dwata yóm hol bong muhen bè kdéen?”

³⁷ Bnalà Jisas se, monen, “ Kenbong nawahem Dwata, yóm gónóhem mogot. Hottuhem nawahem ebéléen, ne hol hendemem yóm kun kóyô.*

³⁸ Yó se,” mon Jisas, “yóm hlau Dwata ali bong muhen bè kdéen, yóm hol tanayen.

³⁹ Ne gewuhen yóm ali bong muhen skél du, duhen yóm monen, ‘Kenbong nawahem kem dumuhem lómón yóm kbong nawahem yóm kóm knò.*

⁴⁰ Ni kem lewu hlau Dwata ni, hol kanguy yóm kdé tehe hlau Musis, ne yóm kdé tehe gel htugod Dwata yó kem gna tugoden ekni.”

Yóm ksólók Jisas kul
(Mark 12:35-37; Luk 20:41-44)

⁴¹ Ne wen snólók Jisas bè yó kem tey Farisi sbung bè yó, monen mò kul,

⁴² “Tedu kuy kmò kehedem du yóm Misaya? Gónón gu semfu du?”

Mon le se, “Semfu gu bè Dabid.”

⁴³ Bud mon Jisas, “Okóm tedu kmò kesfuhen gu bè Dabid du? Igò Dabid se tehe moluy du gónóhen mogot, hmonen du yóm Tulus Dwata,

⁴⁴ ‘Ni se udél Dwata ebè yóm gónóhu mogot, yó monen mò du,

Myóni bè ni dé fi bè kwananu.

Angat gotu ndau lu laan yó kem hmonhon kóm.*

⁴⁵ Yóm Misaya myón bè kwanan Dwata yó, yó kboluy Dabid du ‘Gónóhu mogot.’ Tedu se tô kmò klanen du ke mom du yóm bud semfu gu bè Dabid?”

⁴⁶ Laen dù gembalà du nim snólók Jisas ni. Tódò nbuten bè yó ne laen kò dù bud mlos smólók ke Jisas.

23

Kekbè Jisas yóm kul gel nmò yó kem Farisi ne yó kem tau gel tmlok hlau

(Mark 12:38,39; Luk 11:43, 46; 20:45,46)

¹ Bud mudél Jisas ebè yó kem tey tau sbung ne ebè yó kem gel lemólò du, monen,

² “Yó kem gel tmlok hlau ne yó kem Farisi, wen se kul glal tmlok du yóm hlau Musis.

³ Yó gónóm mon, hol nimón ye ne hol lolò ye yóm kdé tolók le kuy. Okóm hol bê ye abay lolò yóm kmò kekdol le, abay se olo le beyen tmlok du kuy yóm hlau, là kò lolò le du.

⁴ Ya tey sidek keblaten yó kem hlau gel hbò le kem tau, okóm kul, balú gdù, là kò le tmóbóng mit du yóm blat gel hbò le kuy yó.

⁵ Tódò kdé yóm nmò le, són hnebel le yóm ksalú tau kul. Ngem dé kbongen yóm Udél Dwata snulat bkés bè uyó le ne bè sigel le, lel le tey htahà hlumfung bè kilil nes le.

⁶ Ke bè gónò mò ken, kóyò le ke hol le myón desyung. Dalang se bè gónó gel stifun, kóyò le ke myón le bè gónó le myón yó kem tau hol nadat.

⁷ Dalang se ke mógów le ebè fedyan, kóyò le ke hol nadat tau lu ne ke tnaba le lu ‘Tau tmlok.’

⁸ Okóm kuy du,” mon Jisas, “hol bê ye abay móyò ke tnaba le yu ‘Tau tmlok.’ Kaem gotu ye setwoli yóm kdé ye, ne tek sotu yóm tmlok kuy.

⁹ Ne hol béen abay wen tnaba ye ‘Mà’ bè yó kem tau genlal ye te tonok. Abay se tek sotu Mà ye, duhen yóm Mà tekuy bè longit.

¹⁰ Bè ye abay móyò ke tnaba le yu ‘Gónó mogot,’ abay se tek sotu gónó ye mogot, sónen yóm Misaya.

¹¹ Yóm tau hol geta bélè ye, yake yó dé kmoen lem blóng ye, lómón ke du yóm tau gel mò nmò bélè ye.

¹² Yó se tau hegetahan knóen, angat heglaan Dwata. Okóm yóm tau heglaanen knóen, angat hegeta Dwata.”

Kbólów Jisas yó kem tau gel hemtedeng knò

(Mark 12:40; Luk 11:39-42, 44, 52; 20:47)

¹³ Bud mudél Jisas, monen, “Angat tey tafak ye yu kem tau tmlok hlau ne yu kem Farisi, yu kem tau gel hemtedeng knò. Lómón ke deng mom kenda du ye yóm bak dól bè yóm kogot Dwata tau. Là se kò ye dog gusek kuy, ne deng mom henseng ye yó kem tau móyò mung.

¹⁴ Angat tey tafak ye yu kem tau tmlok hlau ne yu kem Farisi, yu kem tau gel hemtedeng knò. Yu se kem tau fen gel smukat yó kem libun bolu ani gfun ye gónó le, lel ye ali

* 22:32 Kehewà 3:6. * 22:37 Hlau 6:5. * 22:39 Hlolò 19:18. * 22:44 Lingón 110:1.

gel htahà kni ye bè Dwata. Yó se gónó Dwata ali hemsidek du yóm angat ktafaken kuy.

¹⁵ Angat tey tafak ye yu kem tau tmolok hlau ne yu kem Farisi, yu kem tau gel hemt-edeng knò. Glok ye mifal mohin mógów bè yó kem dumu benwu mayuk na a mèbel bà tek sotu tau mò lemòlò kuy. Bè yóm kloloen kuy, deng mom mkay senta yóm ksidek yóm kuy nmò yóm kun ksidek nmò. Yó gónóm mon, knóón belé ye nò lem lanaw ofi.

¹⁶ Angat tey tafak ye yu kem tau butò tò malak kem dumuhen butò. Bè kuy ktolok, ke wen tau safaen yóm Gónò Dwata, anien ke nuléhen yóm safaen yó, mom mon ye là sideken. Okóm ke yó safaen yóm tahu blówón nò lem yóm Gónò Dwata, mom mon ye là hyuhen ke nuléhen safaen.

¹⁷ Tey ye nungel, butò ye. Ilóem kmon ye ke bong muhen yóm tahu blówón senta yóm Gónò Dwata. Là kò yó du. Yó gónón baling mólós bè Dwata yóm tahu blówón yó, abay se deng nò lem Gónóen.

¹⁸ Ne bud sotu gel tolok ye, ke safà yóm tau yóm gónò demsù ebè Dwata, bud mon ye là sideken ke nuléhen. Okóm ke safaen yóm dsuen ebè Dwata, gel mon ye là hyuhen ke nuléhen yóm safaen yó.

¹⁹ Tey ye butò. Ilóem kmon ye ke bong muhen yóm dsù ye ebè Dwata senta yóm gónó ye gel demsù du. Là kò yó du. Yó gónón baling mólós yóm dsù, abay se deng nò bè yóm gónó le demsù du ebè Dwata.

²⁰ Yó gónóm mon, ke safà yóm tau yóm gónò demsù ebè Dwata, gomong safaen snéen yóm dsuen.

²¹ Ke safaen Gónò Dwata, deng gomong safaen snéen Dwata, yóm nò lemen.

²² Ke safaen longit, deng gomong safaen ne yóm bangkù gónó Dwata myón kmamal yóm klamangen, ne gomong snéen Dwata, yóm myón taken.

²³ Angat tey tafak ye yu kem tau tmolok hlau ne yu kem Farisi, yu kem tau gel hemt-edeng knò. Balù yó kem som lemnaw ye, sana keblay ye ke Dwata yóm gesfoloen. Okóm deng mom knogol ye yó kem hlau bong muhen, duhen yóm hlau bè ktedeng kmò, ne bè keskoddu, ne bè kessalig. Laen dù gónón sidek yóm keblay ye ke Dwata yóm kun ólól, okóm bè ye klifót yó dum hol bong muhen.

²⁴ Yu kem tau butò tò malak kem dumuhen butò, tey klolò ye du yó kem hlau lemnek, okóm là nimón ye kul yó kem hlau ali bong muhen.

²⁵ Angat tey tafak ye yu kem tau tmolok hlau ne yu kem Farisi, yu kem tau gel hemt-edeng knò. Ke hningónu yóm kmò ye, lómón yóm tngayan ne yóm huyów olo ye molob taken, là lemen. Igoen yóm nò lemen, tódò hono yóm deng gnaga ye lemwót bè yóm keseglom ye.

²⁶ Tey ye butò, yu kem Farisi. Na ye gna nolob lemen dé yóm tngayan ani baling mólós taken snéen.

²⁷ Angat tey tafak ye yu kem tau tmolok hlau ne yu kem Farisi, yu kem tau gel hemt-edeng knò. Hol ye mkél bè yóm lungun tilob bentulà bukay taken, okóm lemen hono tiol tau matay, hono unged bolok.

²⁸ Hol lómón yó se yóm kuy kmò. Tey tilob yóm gel hton ye bè tau, okóm yóm lem hendem ye hono kéng ne hono sidek.”

*Angat ktafak Dwata kul
(Luk 11:47-51)*

²⁹ “Angat tey tafak ye yu kem tau tmolok hlau ne yu kem Farisi, yu kem tau gel hemt-edeng knò. Tey tilob yóm gel nmò ye bè yóm tehe gónó le lembeng yó kem tugod Dwata ekni, ne tey keheklóon ye yóm tehe gónó le lembeng yó kem tau tehe tedeng kmò le.

³⁰ Ne gel mon ye ke tehe ye deng tau se kuy ekni bè yóm kul kdaw le tehe fù tekuy, là kò ye na a gbót se kuy hmatay yó kem tehe gna tugod Dwata.

³¹ Lemwót bè yóm udelé ye yó gónón gdilò yóm hol kesfu ye bè yó kem tau tehe mò des yó kem tehe tugod Dwata ekni.

³² Yó ne, henfu ye yóm nmò tehe nbut yó kem tehe fù ye, yóm là deng gdeng le du.

³³ Ya nim yu kem tau knawa ulal, hono ye semfu gu bè yó kem tau knawa ulal. Tedu kmò kegewà ye lemen du yóm deng kglu ye elem lanaw ofi?

³⁴ Tódò tulónu kuy, angat wen kem tau bud hógówu elem blóng ye, yó kem tau tugod Dwata, ne yó kem tau hulung hedem, ne yó kem tau hulung tmolok. Tódò wen belé le hnatay ye, wen se tnutuk ye bè kros, ne wen se nfes ye lem gónó ye gel stifun, ne mom ktes ye lu ebè yó kem dumu benwu gónó le e mlóy.

³⁵ Yó angat guta ye du yóm nmò ye yó, gotu duón Dwata kuy yóm tehe katay le bnonok yó kem tau tedeng kmò le, lemwót bè katay Abél bnonok, yóm tau ali tedeng kmoen, efet kól bè yóm kbonok le ke Sikaraya yóm tehe ngà Berakiya. Tódò kem hnatay le igoen tolo mógów lem blóng yóm Gónò Dwata ne yóm gónó le gel demsù ebè Dwata.

³⁶ Tódò tulónu kuy ktahuhen, angat tna fak Dwata yu, yu kem tau kmoen ni, bè yóm kdé deng tehe matay bnonok.”

*Kkodu Jisas yó kem tau bè Jirusalim
(Luk 13:34,35)*

³⁷ “Yu kem tau menwu bè syudad Jirusalim, sal gel hnatay ye yó kem tau tugod Dwata, ne hnatay sentudà ye botu yó kem tau hógów Dwata ebélè ye. Deng hilu duléku ne tò móyò sembung kuy, lómó tò kmou kuy, lómón yóm mlon gel kenleken elaan hafaken yó kem ngaen, okóm là kò ye dog móyò.

³⁸ Yó se gónó Dwata tódó mayà du yóm Gónón lem blóng ye.

³⁹ Tódó tulónu kuy, là kô tagad na ye bud ton dou he ke là nan kól yóm kdaw angkat kmon ye du, 'Dwata he hol tmóbóng du yóm tau deng hógówen.' **

24

*Angat kegbà yóm Gónó Dwata
(Mark 13:1,2; Luk 21:5,6)*

¹ Kewót Jisas bè yó, tngaken yóm Gónó Dwata. Yóm igoen tolo mógów, ten-gaftit yó kem gel lemólò du, tolok le du yó kem gónó mteg hmilol yóm Gónó Dwata.

² Omin Jisas mon du mò kul, "Hol tenngel ye dé yóm kdê ton tekuy ni. Tódó tulónu kuy ktahuhen, angkat kól yóm kdawen laen kô dù tebel bè ni kem beng botu nii, tódó gotu lenusok le."

*Ilô yóm hol són kdaw
(Mark 13:3-13; Luk 21:7-19)*

³ Ngang Jisas mógów efet kól bè Bulul Ulib, ne myón bè yó. Omin le mógów ebéléen yó kem gel lemólò du, són lu, snólók le béléen, mon le, "Ó Sér, kilón kdohoen yóm deng tulónem kum yó koni? Tedu de ilô me du yóm bud ksutem ne yóm hol són kdaw?"

⁴ Bnalà Jisas lu, monen, "Hol ten-gama ye ani laen dù tau gónó ye gsukat.

⁵ Abay se angkat dê tau sut tò hlingu béléu. Yó angkat mon le, 'Ou se yóm Misaya.' Ne tey dê tau gsukat bélé le.

⁶ Angat wen gungol ye tau sgida moni bélé ye, ne wen sentulón le gida bè dumu benwu mayuk snéen. Okóm bê ye abay hlikò. Ne gotu dohò ni kem ni, okóm là kô yó du he yóm hol són kdaw.

⁷ Angat wen kem benwu mit sgida bè kem dumu benwu. Ne tey dê benwu gónón mbel bitil bong ne linol bong.

⁸ Kdê ni kem ni, yó se ayawen yóm mýón kkól yóm hol són kdaw. Hol lómón yóm libun mlutut, sok kmuleng, ayawen sut yóm ngaen.

⁹ Ne angkat tey dê tau bè klamangen benwu kmutó nawa kuy lemwót bè yóm klolò ye do. Tódó kenfô le yu, ne tey kehsidek le kuy, ne hnatay le yu.

¹⁰ Bè yóm kdaw yó, angkat tey dê tau knogol le kehtahu le. Ne knutó nawa le yó kem dumu le hemtahu, ne glef le ne hekfô kul.

¹¹ Angat tey dê tau sut lembù tmugod ke Dwata, ne tey dê tau gsukat bélé le.

¹² Lemwót bè yóm ali kmò le sidek yó kem tau bè klamangen benwu, angkat monol yóm kesbong le nawa.

¹³ Okóm hol ye hbala efet kól bè sónen ani angkat guta ye yóm klowil laen dù sónen.

¹⁴ Bede nan galag bè kdéen tau bè klamangen benwu he yóm Tulón Hyu gbak ebè yóm kmò kogot Dwata tau ani hol tngón le, ominen yó he kól yóm hol són kdaw."

*Yóm tô matù ke Dwata
(Mark 13:14-23; Luk 21:20-24)*

¹⁵ Bud mon Jisas, "Bè tehe kegenen du Danyél ekni, yóm sotu tau tehe gna tugod Dwata, eles tulónen yóm angkat mdà bè Gónó Dwata yóm ali sidek knikò, yóm natuen Dwata. Yóm tau semfala du yóm ni, hol hennagian kmò klanen.

¹⁶ Ke sok kól yóm kdaw yó, eles le tódó mlóy elem bulul ne yó kem tau menwu bè prubinsya Judiya.

¹⁷ Ke wen tau tolo nô bè gónón henos bè gónón, hol béen tlek bud husek elemen ke mebel mò niten.

¹⁸ Ke wen tau tolo nô bè tñibahen, hol béen tlek bud mulék eta ne ke tò bud mebel kgal mfól mò niten.

¹⁹ Kodu le yó kem libun mlutut bè yóm kdaw yó, ne yó kem libun tolo semlé ngà.

²⁰ Hol hni ye bè Dwata ani là geblaen bè yóm bulónen sidek kdaw yóm klóy ye yó, ne ani là geblaen bè yóm Kdaw Kehegnó snéen.

²¹ Abay se angkat tey hlayam bong sok sut bélé ye yóm hlayam monu ni. Ni he yóm hlayam ali sidek bè kdéen hlayam deng sut bè tau lemwót bè hol kbut benwu, ne là se kô bud sneefen du ne.

²² Okóm lemwót bè yóm kkodu Dwata kul yó kem tau deng néléken, yó gónón là hol hegen du yóm ali hlayam yó. Ke hegenen, bà sotu ke wen tau bud mowil te tonok.

²³ Hol bê ye abay hentahu ke wen tau mon du mò kuy, 'Ngem, ni sii yóm Misaya.' Duhén ke mon le, 'Deng gdek dituu kun,' hol bê ye abay hentahu.

²⁴ Abay se angkat wen yó kem Misaya kéng sut, ne wen yó kem tau lembù tmugod ke Dwata. Angat tey dê hentaw ton hegfán le mò gónó le hol tò smukat yó kem tau deng kun nélék Dwata.

²⁵ Eles tulónu kuy nim ni," mon Jisas, "ani hol ye getgama.

²⁶ Duhén yó, ke mon kem tau, 'Deng kól bè yóm benwu là hyu menwu du yóm tau deng nélék Dwata,' bê ye abay mógów etu. Duhén ke mon le, 'Ni deng hebnos bè ni,' bê ye abay hentahu.

²⁷ Bè yóm angkat bud kkól yóm Ngà Tau, hol lómón mkal silà, tódó lemayag klamang longit lemwót dmata kdaw kól desdef. Tódó kdéen tau gotu mton du.

²⁸ Angat dohò nim tulónu kuy ni. Lómón yóm gel mon le, 'Yó se gónón mta lób, yó se gónón e sguku wak.' "

* 23:39 Lingón 118:26.

Kmò yóm angat bud kesfulék yóm Ngà Tau

(Mark 13:24-27; Luk 21:25-28)

²⁹ “Sok kogol yóm ali hlayam bè yó kem kdaw yó,” mon Jisas, “angat là buden mnóng kdaw dalang se bulón, ne angat le gotu btang gu bè longit yó kem blotik, ne là bud glolò le lesang le yó kem dumu mnóng gu bè longit.*

³⁰ Ominen yó he angat gfan gu bè longit yóm kun ilò yóm Ngà Tau. Bè yóm kton le du, tódò kentihen tau talak tonok, gotu le dmumu mkik lem wót bè khuli sel le. Tódò ton le se yóm Ngà Tau htuntun gu tta mung bè lobun. Ne ton le se yóm tey kfasangen ne yóm tey kegetahan.

³¹ Ne angat tey uni féw bong gu bè longit mò ilò yóm kehewótén yó kem hógówen gu bè longit mò na a semtifun yóm kdéén tau deng nélék Dwata bè klamangen benwu.”

Yóm gdalang tekuy bè koyu fig

(Mark 13:28-31; Luk 21:29-33)

³² “Tódò henkna ye bè yóm koyu fig,” mon Jisas. “Sok tmubed ne nbuten mból dounen, ayawen sut bulónen mnóng kdaw.

³³ Senged snéen sok deng gotu gfan yóm kdé deng tulónu kuy ni koni, yó se ayawen yóm deng klonihen yóm ksutu, hol lómón ke dengendà snolu aut ye.

³⁴ Tódò tulónu kuy ktahuhen, kesok sut ni kem deng tulónu kuy ni, tolo wen he bè ni kem tau kmoen ni gmafit mton du.

³⁵ Angat tódò kmanas yóm longit dalang se yóm tonok. Okóm yóm dou udél,” mon Jisas, “là kóen na a lana.”

Eles ketgama yóm kkól Jisas

(Mark 13:32-37; Luk 17:26-30, 34-36)

³⁶ “Laen kò dù tau temngón du yóm kdaw angat kesfuléku duhen ke tedu urasen,” mon Jisas. “Balù yó kem hógów Dwata gu bè longit, là kò tngón le du se kul. Dalang se do, là kò tngónu du. Tek sòn Mà bè longit temngón du.

³⁷ Gu laanen là deng semfulék he yóm Ngà Tau, yó angat nmò yó kem tau te tonok, hol mkél bè yóm tehe kun kdaw Nuwa ekni.

³⁸ Yóm gu laanen là deng tehe sut dunuk ekni, yó nmò kem tau mken le, ne minum le, ne syehen le efet yóm khotun Nuwa elem yóm kafal nmoen.

³⁹ Là kò tngón le du yóm angat sut bélè le. Song imò le hetngón, deng sut bélè le yóm dunuk, ne tódò le gotu mung konul. Lómón yó se kmoen yóm kkól yóm Ngà Tau.

⁴⁰ Bè yóm kdaw yó, ke lewu tau tmiba, sotu nwtien, sotu se tebelen.

⁴¹ Ke lewu libun mdek, sotu nwtien, sotu se tebelen.

⁴² Yó gónóm mon, eles ye mingat abay se là kò tngón ye du yóm kdaw angat kkól yóm gónó ye mogot.

⁴³ Ke eles tngón yóm tau fun gónó yóm kifu nan e knagaw lem gónóen yóm tau mnagaw, eles mabung ani là guseken yóm tau mnagaw.

⁴⁴ Duhen yó, eles tendo ningat ye yóm bud kkólen elem blóng ye yóm Ngà Tau, abay se kulel angat kkólen bè yóm uras là gingat ye du.”

Yóm hlingón bè yóm tau gulit ne yóm tau là guliten

(Luk 12:41-48)

⁴⁵ “Tau du de yóm gulit kmoen nmò bè yóm gónón mogot ne yóm hulung hedem? Yó se yóm tau tódò gotu hogoten du yóm tau gónón mogot yó kem dumu tau mò nmò béleén mò fen semgifà kul.

⁴⁶ Hlial kun yóm tau mò nmò yó ke tolo lelen hteneb mò nmò bè yóm kkól yóm gónón mogot.

⁴⁷ Tódò tulónu kuy ktahuhen, yóm tau gulit kmoen nmò yó, angat khemen du yóm gónón mogot yóm kdé kimuhen.

⁴⁸ Là, ke yó mefet bè nawahen yóm tau mò nmò yó, ke mom monen, ‘A, legen he ni kkólen yóm gónóhu mogot.’

⁴⁹ Ne nbuten mfes yó kem dumuhen gel mò nmò, ne fen hebsow mken ne hlengel minum kun.

⁵⁰ Timbow kól yóm gónón mogot bè yóm kdaw là ketgamahen, yóm uras là eles tngónen du,

⁵¹ ne tódò hnatayen yóm tau là gulit kmoen nmò yó, hegbunuen du yóm kul glumfak yó kem tau gel hemtedeng knó. Ne bè yó gónón tendo heslaf ne dmumu mkik sembéhé kakim.”

25

Yóm hlingón bè yóm sfolò kem libun

¹ “Bè yóm kdaw angat kkólu,” mon Jisas, “yóm kmò kogot Dwata tau, hol lómón yóm sfolò kem libun mit solok na a semlong yóm logi myehen.

² Limu bélè le yóm là hulungen hedem, ne limu se hulung hedem.

³ Lemwót yó kem libun là hulung hedem, là dog le mít lenagas mò tgama le ke gotu yóm gnan.

⁴ Okóm eles wen kul lenagas nwti yó kem libun hulung hedem.

⁵ Lemwót yóm logi myehen, wen gónóhen ganggá, là géhélen kól. Yó gónóm mon, deng mom moo ktuk yóm sfolò kem libun, gotu le gtungó.

⁶ Timbow deng sóól buteng, tódò btang lem klingu le yóm tey tmaba, monen, ‘Ni

* 24:29 Isaya 13:10 ne 34:4, Juwél 2:10.

deng kól yóm logi myehen. Géhél ye, ne ye e senlong.'

⁷ Segeng le se btik yóm sfolò kem libun, gotu nwa le yó kem solok le, ne gotu sentódò le sembwan le.

⁸ Yó udél yó kem libun là hulung hedem ebè yó kem libun hulung hedem, mon le, 'Benlay ye se mi dé, Wè, ke wen dù kuy lenagas. Són moen mudof yóm kum solok.'

⁹ Ne mudél se yó kem libun hulung hedem, mon le, 'Là bud gsakufen kuy ne nim kum lenagas ni. Tódò ye na a bemli kuy ne bè tindà.' Tahu se, na le e bemli yó kem libun là hulung hedem.

¹⁰ Kogol yóm kewót le, kól se yóm logi myehen, ne tódò hlós ebè yóm gónò gónó le mò ken bè lówóhen, ne gmung yóm limu kem libun hulung hedem. Yóm kkól le bè yó, gotu le husek elemen, ne tnikeb le beng.

¹¹ Legen udi bè yó, gdo fi se yó kem libun là hulung hedem. Mdà le bè lewaen, tmaba le, mon le, 'Ó Sér, hfusekem mi elemen.'

¹² Okóm mom mon yóm logi myehen, 'Bè. Là kò tngónu kuy.'

¹³ Yó gónóm mon," mon Jisas, "eles ye hol temgama se kuy. Là kò tngón ye du yóm kdaw angkat kkólu, duhen ke tedu urasen."

Yóm hlingón bè yóm tlu kem tau mò nmò (Luk 19:11-27)

¹⁴ "Bè yóm kdaw angkat kkólu," mon Jisas, "yóm kmò kogot Dwata tau, hol lómón ke yóm tau mógów ebè yóm sotu benwu mayuk. Gu laanen là deng lemwót yóm tau yó, nan tnaba yó kem tau mò nmò béléen, gotu hogoten kul yó kem kimuhen.

¹⁵ Tódò hogoten kul yóm bang kul gbek. Yó hogoten yóm tanayan, limu libu filak tahu blówón. Ne yó hogoten yóm tmodol, lewu libu. Yó hogoten yóm getluhen, lemibu. Ominen yó lemwót.

¹⁶ Tódò kendel bud lemwót se kun yóm tau mogot limu libu nan e hból yóm kun. Ngangen efet bud limu libu se uléken.

¹⁷ Ne bud lemwót se kun yóm mogot lewu libu. Ngangen hból yóm kun efet bud lewu libu se uléken.

¹⁸ Okóm yó nmò yóm tau mogot lemibu, deng mom lebengen lem tonok yóm kun.

¹⁹ Deng tey kegenen mógów ne yóm gónó le mogot, ominen bud kól. Ne gotu htaba-hen yó kem tau tehe wen hogoten kul. Gotu snólóken bélé le yóm kmò khógów le du yóm flak tehe hogoten kul.

²⁰ Ominen sut yóm tau tehe hnogoten limu libu, ne monen, 'Tehe limu libu yóm hogotem dou, Sér. Ni sii yóm uléken, bud limu libu.'

²¹ Ne monen se mò du yóm gónóhen mogot, 'Wóyón dé. Tey hyu nim uu, teyi gult. Lemwót bè yóm kgulitem bè yóm udi hogotu kóm, bong ne sigangu tahem. Yó ne,

holi mung dou dé anì gmungi lemen yóm dou klígal.'

²² Ne bud sut yóm tau tehe lewu libu kun nogot, monen se kun, 'Tehe lewu libu yóm hogotem dou, Sér. Ni sii yóm bud uléken, lewu libu.'

²³ Ne bud monen se mò du yóm gónón mogot, 'Wóyón dé. Tey hyu nim uu, teyi gult. Lemwót bè yóm kgulitem bè yóm udi hogotu kóm, bong ne sigangu tahem. Yó ne, holi mung dou dé anì gmungi lemen yóm dou klígal.'

²⁴ Ominen sut yóm tau tehe mogot lemibu, mom yó monen mò yóm amohen, 'Tngónu uu, Sér, tódò ket du snoloem. Tódò gel nutahem yóm là kóm hulu du, ne yóm là kóm leniteg du.

²⁵ Likoe kóm, yó gónóm mon, deng tódò lebengu yóm filakem. Ni dé yóm filakem.'

²⁶ Mung kudél yóm gónóhen mogot, monen, 'Teyi baká yóm uu. Alii mduk. Igoem sem deng mon du gel nutahu yóm là dou hulu du ne yóm là dou leniteg du.

²⁷ Ke yó se yóm dou gel nmò, moem là hemsù du bè bangkù du yóm dou filak anì wen ngaen bè yóm kkólu?'

²⁸ Ne ominen mudél ebè yó kem tauhen, monen, 'Na ye béléen yóm lemibu hogotu du, blay ye tum tau deng sfolò libu nó béléen.

²⁹ Yóm tau ke gult kogoten du yóm nó béléen, angkat bud wen tnù le du efet gengón. Okóm yóm tau ke là gult kogoten du yóm deng nó béléen, angkat bud nwa le béléen.

³⁰ Bong yóm tau laen dù mu yó, tódò tudà ye etu bè lewà bè gónón ali knifu, ne bè yó tendo gónón heslaf ne dmumu mkik sembéhé kakim.' "

Kkukum Dwata tau

³¹ "Kesok bud kól yóm Ngà Tau mò mogot klamangen," mon Jisas, "tódò kdéen hógów Dwata gu bè longit gotu semguyun du, ne angkat myón bè yóm gónón myón kmukum.

³² Angat tódò kdéen tau bè klamangen benwu gotu stifun ebè soluhen, ne sentólóngen lu. Lómó kmò kestólóngen kul, lómón yóm tau semgyok ógóf, gel sentólóngen yó kem ubiha bè yó kem kambing.

³³ Yó kmoen kul, suen bè kwananen yó kem tau tedeng kmò le, ne suen bè iwóngen yó kem tau gel mò sidek.

³⁴ Angat monen mò yó kem nó bè kwana-nen yóm Hol Geta yó, 'Géhél ye ne, yu kem tau deng tendo gel tnóbóng Mâ. Hlós ye ebè yóm benwu deng tehe eles hentifesen béle ye lemwót bè hol kbut benwu.

³⁵ Abay se bè yóm tehe kbitilu, tódò henken ye ou. Ne bè yóm tehe kleengu, tódò hinum ye ou. Ne bè yóm tehe kilohu, tey khódó ye du.

³⁶ Bè yóm tehe klaen dù nesu, wen blay ye do mò nesu. Ne bè yóm tehe kwen desu, tey gel kesgifà ye do. Ne bè yóm tehe knóu lem blanggù, tódò gel nauy ye ou.'

³⁷ Angat bnalà yó kem tau tedeng kmò le, mon le, 'Kilón de kton me kóm bitil, Sér, ne kehken me kóm ne khinum me kóm?

³⁸ Kilón de yóm kton me kóm milo, ne yóm khódó me kóm bè gónò me? Kilón de yóm keblay me kóm nes mò nesem?

³⁹ Kilón de yóm monem kwen desem, ne yóm knóem lem blanggù, ne yóm kauy me kóm?

⁴⁰ Angat bnalaen se lu yóm Tau Hol Geta, monen, 'Tódò tulónu kuy ktahuhen, yó se deng nmò ye bè yó kem dumuhu setwoli ali gdanà, lómón ke béléu gónó ye mò du yóm yó.'

⁴¹ Ominen yó mon du mò yó kem tau fi bè iwóngen, monen, 'Módó ye béléu bè ni, yu kem tau deng eles golu elem tafak Dwata. Ditu gónó ye nò lem yóm ofi laen dù tul katayen deng hentifes Dwata bè Seitan ne yó kem hógówen.

⁴² Abay se yóm tehe kbitilu, là kò dog henken ye do. Ne yóm tehe kleengu, là kò dog hinum ye do.

⁴³ Yóm tehe kilohu, là kò hnódó ye do. Yóm tehe klaen dù nesu, là kò dog benlay ye do. Yóm tehe kwen desu ne yóm tehe knóu lem blanggù, là kò dog sen-gifà ye do.'

⁴⁴ Ne angat bnalà le se, mon le, 'Kilón de kton me kóm bitil, Sér, ne meeng ne milo? Ne kilón de yóm klaen dù nesem ne yóm kwen desem ne yóm knóem lem blanggù, ne là dog tnóbóng me kóm?'

⁴⁵ Ne yó monen mò kul yóm Tau Hol Geta yó, 'Tódò tulónu kuy ktahuhen, yóm là dog któbóng ye yó kem tau ali gdanà, lómón se yó ne yóm là dog któbóng ye dou.'

⁴⁶ Duhén yó," mon Jisas, "tódò le gotu hlós elem yóm tafak Dwata laen dù sónen. Okóm yó kem tau tedeng kmò le, guta le yóm klowlil laen dù sónen."

26

Kessatul le yóm kmò kekfô le ke Jisas

(Mark 14:1,2; Luk 22:1,2; Jan 11:45-53)

¹ Timbow deng ni kem tulón Jisas kul ni, ominen mon du mò yó kem gel lemoldu du,

² "Deng tngón ye lewu ni he kehtohen yóm mò ken bong belé tekuy bè Kdaw Khius. Segeng du yóm angat keblay le yóm Ngà Tau elem tdok yó kem tau angat tmutuk du bè kros."

³ Bong yó kem geta bè yó kem gel demsù ebè Dwata kkólen bè yó kem tuha gónó le gel galak yó kem Ju, gotu le stifun bè gónò bong Kyafas, yóm tau geta bè yó kem gel demsù ebè Dwata.

⁴ Yó natul le yóm kmò klifut kekfô le ke Jisas aní ghatay le.

⁵ "Okóm," mon le, "bè tekuy hesegeng bè yóm mò ken bong, kò wen sidek nmò le belé tekuy yó kem tau."

Ketwélen hnolo te kulu Jisas yóm sotu libun bè Bitani

(Mark 14:3-9; Jan 12:1-8)

⁶ Bè yóm knò Jisas bè Bitani, mken bè gónò yóm sotu tau tehe gemnóm des mifù boluyen Simun.

⁷ Yóm igoen mken bè yó, sut beléen yóm sotu libun, wen sobuy alabastér nwiten hnok yóm hboo ali mebtens, ne tey minggel boohen. Tódò gotu msulék koken te kulu Jisas.

⁸ Bè yóm kton le du yó kem gel lemoldu du, mo le mom lembut, mon le, "Moen ke gotu namaen yóm yóó?

⁹ Mom hyu ke tehe tódò hbaluen, bong he gutahen du, ominen bemlay du bè yó kem élél yóm blihen."

¹⁰ Hyu gungol Jisas yóm udél le, yó gónón mon du mò kul, "Moen de ke bnólów ye kun nmò nim libun nii? Igoen tey minggel yóm nmoen béléu ni.

¹¹ Hyu he kul yó kem tau élél, eles le tendo nò lem blóng ye. Là dou.

¹² Yóm koken béléu ni, mò eles hgifaten dou bè yóm angat kebeng le do.

¹³ Tódò tulónu kuy ktahuhen," mon Jisas, "balú kihu gónón angat e mból bè klamangen benwu yóm Tulón Hyu lemwót bè Dwata, tendo gel gboluy snéen kun nim libun ni lemwót bè yóm deng nmoen béléu."

Katul Judas ke Jisas

(Mark 14:10,11; Luk 22:3-6)

¹⁴ Kogolen bè yó, lemwót Judas Iskariyut, sotu bè yó kem sfolò lewu gel lemoldu ke Jisas, tódò mógów etu bè tu kem geta bè yó kem gel demsù ebè Dwata.

¹⁵ Yó snólóken belé le, monen, "Hilu de blay ye do ke ou fen malak kuy ebè Jisas?" Deng mom yó nmò le, tódò nsó le beléen tlu folò botú yóm kul filak mgel.

¹⁶ Tódò lenwóten bè yó ne, sónmò Judas mebel lanen malak kul ebè Jisas.

Kken Jisas ne yó kem gel lemoldu du yóm ken bè Kdaw Khius

(Mark 14:12-21; Luk 22:7-14, 21-23; Jan 13:21-30)

¹⁷ Timbow hto yóm tanay kdawen bè yóm mò ken bè yóm gel kken yóm mambang laen dù bulung henoken, mógów le ebè Jisas yó kem gel lemoldu du, snólók le beléen, mon le, "Gónóm tô hmò du kum de yóm ken tekuy bè nim mò ken bè Kdaw Khius ni?"

¹⁸ Ne mon Jisas se mò kul, "Mógów ye ebè yóm sotu tau bè syudad Jirusalim, mon ye mò du, 'Ni se tinoken ebéléem yóm tau gónó tekuy gel htolok, monen, Deng hto ne yóm buteng tehe olu Dwata do. Nmou bè gónóem

yóm mò ken bè Kdaw Khius, mung do yó kem gel lemòlò do.’”

¹⁹Tahu se, tódò lòlò le yóm deng mon Jisas mò kul, ne nmò le yóm ken mò ken le bè yóm kifu yó.

²⁰Timbow deng móyón kifu, omin le gotu seyón mken le Jisas ne yó kem sfòlò lewu gel lemòlò du.

²¹Yóm igò le tolo mken, mudél ebélè le Jisas, monen mò kul, “Tódò tulónu kuy ktahuhen, sotu bélé ye angkat mlay do sumóng.”

²²Ya tey sidek klóngón nawa le, tódò sotu kun mon du mò ke Jisas, “Là ou du kó yó?”

²³Mon Jisas se mò kul, “Yó se tau dumuhu segeng mdù elem sóbów yóm mambang, du se yóm angkat mlay dou sumóng.”

²⁴Yóm Ngà Tau nan na matay he,” mon Jisas, “lómón yóm deng tehe eles tulónen bè Sulat Dwata. Bede tey angkat kegtafaken yóm tau bemlay sumóng. Mom tumù ne ke béen dog tehe tau.”

²⁵Mudél se Judas, yóm mlay du sumóng, monen, “Ou kò, Sér, gónón e gbak yóm monem yó?”

Bnalà Jisas se, monen, “Yó sem deng monem yó.”

Yóm mò hemget yóm fasad Dwata

(Mark 14:22-26; Luk 22:14-20; 1 Kurin 11:23-25)

²⁶Yóm igò le tolo mken, nwa Jisas yóm mambang, bede nan ne mni bè Dwata. Ominen kembéng du, ne blayen yó kem gel lemòlò du, yó monen, “Ni se yóm dou lówó. Nwa ye, ne ken ye.”

²⁷Ominen mkay yóm tğayan gónón nô yóm ninum le, nan na bud mni bè Dwata, ominen mon du mò kul, “Ni sensinum ye.”

²⁸Ni se dou litò mò hemget du yóm deng fasad Dwata bè kem kun tau. Ne tey dé tau gónón gamà nim litóu ni mò lan Dwata hmifót salà le.

²⁹Tódò tulónu kuy, hatan bud ninumu he nim ninum ni ke deng kól bè yóm kdaw angkat kinum tekuy yóm ninum lomi bè yóm kun benwu nogot Mà.”

³⁰Tikóng deng kinum le, omin le gotu semngal yóm sotu sngal dmóyón ke Dwata, omin le lemwtò ebè Bulul Ulib.

Eles ktulón Jisas yóm kehlaà Pitér du

(Mark 14:27-31; Luk 22:31-34; Jan 13:36-38)

³¹Bè yóm tolo lel le mógów, mon Jisas mò yó kem gel lemòlò du, “Kifu ni kdeng tódò gotu sentagak ye ou, yakà deng monen du bè yóm Sulat Dwata, yó monen,

‘Angat hfatay Dwata yóm tau semgyok ubiha,

ne tódò gotu sekla yó kem ubihahen.’*

³²Okóm,” mon Jisas, “sok deng bud hlowl Dwata ou, angate fen gna bélé ye etu bè Galili.”

³³Hebkó mudél se ke Pitér kun, monen, “Baluen se ke gotu sentagak le uu yó kem dumuhu, Sér, là kò naw e tnagak kóm dou.”

³⁴Bnalà Jisas se, monen, “Tódò tulónu kóm ktahuhen, Pitér, gu laanen là deng kmóót onuk kifu ni kedeng, deng sana tlu dulékem hmalà yóm ketngónem dou.”

³⁵Mon Pitér se, “Baluen he ke munge matay béléem, Sér, là kò naw e hnalà kóm dou.” Tódò senged se udél yó kem dumu gel lemòlò ke Jisas.

Kni Jisas bè Dwata bè Gitsimani

(Mark 14:32-42; Luk 22:39-46)

³⁶Ngang le Jisas mógów efet le kól bè yóm sotu ngà hungul koyu boluyen Gitsimani, ne mon Jisas mò yó kem gel lemòlò du, “Na ye myón bè ni bè yóm igou mni bè Dwata bè tuu.”

³⁷Niten Pitér ne yó kem lewu ngà Sibidi. Ne tódò gklet béléen yóm tey ksided kegnómen du.

³⁸Monen mò kul, “Tey sidek gnóm yóm gklet béléu ni, là hol tò gbeku hembala du. Nò ye bè ni ne kuy, ne eles ye mingat.”

³⁹Ominen mógów hlayuk udi, ne tódò hegluduk lemfen bè tonok, ne mni bè Dwata, monen, “Ó Mà, ke yó dum gmò, kóhem tahu dé yóm angkat tey hlayamu ni. Okóm balù wen se yóm dou kóyò, tódò hendengem yóm kóm kóyò béléu.”

⁴⁰Timbow deng knihen, ominen mulék ebè yó kem tlu tau nwtien, deng le mom gotu henga tungò. Gotu bentiken lu, ne monen mò ke Pitér, “Là gbek ye mingat kò, balù tek sotu uras?”

⁴¹Bè ye tagad tungò dé. Hol ye mni bè Dwata ani là wen gónó ye gsendil bè Seitan. Tngónu wen se óyò ye mò du yóm monu mò kuy ni, okóm là gbek lówó ye du.”

⁴²Bud kewót Jisas bè yó bè gewuhen dulék, ne bud mni bè Dwata. Yó utóm yóm knihen, monen, “Ó Mà, ke là se hyu mkó du béléu yóm angkat tey hlayamu ni, tódò henlòsem sen yóm kóm kóyò.”

⁴³Ominen bud mulék ebè yó kem tlu tau niten, deng le mom bud henga tungò, là kò dog gukat le du mata le.

⁴⁴Ne ominen bud tmagak kul na e mni bè getluhen dulék, tódò nuliten yóm gna kmò knihen.

⁴⁵Ne bud mulék ebélè le, ne monen mò kul, “Tolo lel ye he kò tungò ne hegnò? Ngem deng kól du ne yóm uras le kemfò du yóm Ngà Tau, ne blay le elem tdok yó kem tau sidek nmò le.

⁴⁶Ngem yó dé yóm tau mlay do sumóng. Btik ye ne, na tekuy e senlong.”

* 26:31 Sikaraya 13:7.

Kekfô le ke Jisas

(Mark 14:43-50; Luk 22:47-53; Jan 18:3-12)

⁴⁷ Igò Jisas tolo mudél, gdoñi bè yó se Judas, yóm sotu bè yó kem sfolò lewu gel lemòlò du. Tey tau wen huli du. Wen se le-mumak sudeng belé le, ne wen se kmulóng bogul. Lu se yó kem tau hógów yó kem geta gel demsù ebè Dwata ne yó kem tuha gónó le gel galak yó kem Ju.

⁴⁸ Deng eles tulón Judas yó kem tau mung du, monen, “Yó se tau neleku kdeng, yó se yóm tau hnebel ye. Tódò kenfô ye.”

⁴⁹ Timbow gdek Judas, tódò hekteng ebè Jisas, monen, “Na Sér,” ne ominen melek du.

⁵⁰ Omin Jisas mudél ebè Judas, “Yó ne, Wè, géhél nmoem yóm nógowem.” Omin le gotu demlu kemfô ke Jisas, ya tey kget kogot le du.

⁵¹ Sotu bè yó kem gel lemòlò ke Jisas kendel kemtos dmi lot sudeng, tódò tñibóhen yóm sotu tau, okóm olon sfak tòdò klinguhen yóm tau tñibóhen yó. Yóm tau hnali ni, du sotu tau gel dók yóm geta bè yó kem tau gel demsù ebè Dwata.

⁵² Bè yóm kton Jisas yóm tau fen tmibó yó, bnólówen, monen, “Tenesem lem lumaken sudengem. Ngem he yóm tau smalig bè sudeng, angat bud hatayen sudeng.

⁵³ Ilóem là tngónem du kô yóm kegbeku mni tóbóng bè Mâ, ne tódò kendel hógówen balù hilu libu yó kem gel hógówen gu bè longit mò tmóbóng do.

⁵⁴ Okóm ke yó nmou, tedu se tó kdohoen du yóm deng tehe hsulat Dwata golu etahu?”

⁵⁵ Omin Jisas mudél ebè yó kem tey tau wen kemfô du, monen, “Tey, glok ye mit suk ne bogul nim na ye e kekfô dou ni. Ilóem tó heskél ye ou bè yóm tau gel mò sidek. Igou se gel myón tmlók lem Gónó Dwata ket kdaw, là se kô géhél kenfô ye do.

⁵⁶ Okóm nim nmò ye beléu ni, deng gónón dohò yóm tehe hsulat Dwata yó kem gna tugoden.” Bè yóm kekfô le ke Jisas yó, deng mom gotu sentagak yó kem gel lemòlò du, mlóy le.

Kkukum le ke Jisas yó kem Ju

(Mark 14:53-65; Luk 22:54,55, 63-71; Jan 18:13,14, 19-24)

⁵⁷ Kewót le bè yó ne, nit le Jisas ebè gónó Kyafas yó kem tau kemfô du yó koni. Nim Kyafas ni, geta bè yó kem tau gel demsù ebè Dwata. Deng le eles gotu stifun bè yó ne yó kem tau gel tmlók hlau ne yó kem tau tuha gónó le gel galak yó kem Ju.

⁵⁸ Bè yóm kwit le ke Jisas, fen holun huli Pitér efet kól bè gónó yóm tau geta yó koni. Ne hlós e talak lósól, ne seyón bè yó kem tau gel mentey bè yó, hnilingen yóm mò kmò le ke Jisas.

⁵⁹ Ne lemwót yó kem tau geta bè yó kem gel demsù ebè Dwata ne kdé yó kem tau geta mogot kukum, mebel le dalil mò lan le hfatay ke Jisas lemwót bè yóm gel tifú yó kem dumu tau, baluen ke là tahuhen.

⁶⁰ Okóm laen kô dù ton le, balù yóm tey kdé tifú le du, hono là kóen tahu. Ominen yó wen lewu tau mdà,

⁶¹ yó kul tifú, mon le, “Gel monen nim tau ni, ‘Gbeku gembà du yóm Gónó Dwata ni, ne gbeku se bud hdà du bè tlu kdaw.’ ”

⁶² Ne hebkó mdà se yóm geta bè yó kem gel demsù ebè Dwata, monen mò ke Jisas, “Là bnalaem du kô yóm ktifú le kóm ni?”

⁶³ Okóm là dogen mudél Jisas. Ominen bud mudél ebéléen yóm tau geta yó koni, monen, “Wen snólóku beléem. Bè yóm kbal-aem du, hol hlanem bè boluy yóm Dwata laen dù tul katayen. Tulónem kum kun ktahuhen ke uu yóm Misaya, yóm hol Ngà Dwata.”

⁶⁴ Bnalà Jisas se, monen, “Yó sii deng monem. Okóm wen tulónu kuy, angat ton ye yóm Ngà Tau myón fi bè kwanan Dwata, yóm laen dù là gbeken du, ne angat ton ye se yóm kesfuléken edini mung bè lobun.”*

⁶⁵ Mung kungolen du nim udél Jisas ni yóm tau geta bè yó kem gel demsù ebè Dwata, botong tódò kenséen nesen, monen, “Tó hsendeden knóen bè Dwata. Omin he ke bud wen tifú du. Deng tódò gungol tekuy yóm kehsengeden knóen bè Dwata.

⁶⁶ Tedu kuy kmò kmón du yóm tau ni?”

Mon le se, “Hyu ke tódò hnatay.”

⁶⁷ Nbut le bè yó ne tendo hemsidek ke Jisas. Gotu sendulak le lem uyóhen, ne sentsuntuk le, lel le semtfé du,

⁶⁸ mon le, “Ke tahu uu se yóm Misaya, tulónem kum kun yóm tau temfé kóm.”

Kehlalà Pitér yóm ketngónen ke Jisas

(Mark 14:66-72; Luk 22:56-62; Jan 18:15-18, 25-27)

⁶⁹ Sana tolo kyón Pitér talak lósól he kun. Ne mógów ebéléen sotu bè yó kem ngà libun gel dók yóm tau geta bè yó kem gel demsù ebè Dwata, monen mò ke Pitér, “Kaem uu se sotu tau gel mung ke Jisas, yóm tau lemwót bè Galili.”

⁷⁰ Okóm mom hlalà belé le Pitér, monen, “Là kô naw e tngón du dou yóm monem yó.”

⁷¹ Ne bud mógów ebè bak tikeb yóm labat. Ne bud wen sotu ngà libun mton du, ne monen mò yó kem tau bè yó, “Ni se sotu tau gel mung ke Jisas, yóm tau lemwót bè Nasarit.”

⁷² Ya tey bud kehlalà Pitér, gloken smafà ke tngónen Jisas.

⁷³ Tikóng deng bud legen udi bè yó, mógów le ebè Pitér yó kem tau mdà gu bè yó, mon le

* 26:64 Lingón 110:1, Danyél 7:13.

mò du, “Kaem uu se hol sotu belê le. Dilô me bè kudêlem lemwóti bè Galili.”

⁷⁴ Tódô smafâ Pitêr lem blóng le, monen, “Hol tñafak Dwata se o ne ke kêngu yóm tulónu kuy. Là kô tngónu du dou yóm tau yó.” Ne tódô sen-gengen se kmóót onuk.

⁷⁵ Ominen yó gbel bè nawa Pitêr yóm deng tehe eles mon Jisas mò du, yóm monen, “Gu laanen là deng kmóót onuk kifu ni kdeng, deng sana tlu dulékem hmalà yóm ketngónem dou.” Unihen gbel bè nawahen yóm tehe mon Jisas mò du, tódô hewà, ya tey sidek kkiken.

Kwit le ke Jisas ebè Paylét
(Mark 15:1; Luk 23:1,2; Jan 18:28-32)

27

¹ Timbow deng mwas bè yó, gotu le stifun yó kem geta bè yó kem gel demsù ebè Dwata ne yó kem tuha gónó le gel galak yó kem Ju, sensatul le yóm kmò khatay le ke Jisas.

² Omin le hmengked mfét du kdina, ne nwit le ebè Paylét, yóm tau lemwót bè Rom gubérnor belê le.

Kówól Judas lihol
(Kul Nmò 1:18,19)

³ Timbow ton Judas, yóm tau tehe mlay ke Jisas sumóng, yóm deng kegtuled Jisas, ya tey khuli selen. Ominen bud tó hulék yóm tlu folò botù filak mgel tehe blay le du yó kem geta bè yó kem gel demsù ebè Dwata, ne yó kem tuha gónó le gel galak yó kem Ju.

⁴ Mon Judas, “Tey kegsalau. Deng mom hekfóu yóm tau laen kô dù salaen anì hnatay le.”

Bnalà le se, mon le, “Laen kô dù bud kum hentngón du ne yóm monem yó. Tódô kóm ne yó.”

⁵ Tódô gotu legas tudà Judas elem Gónó Dwata yóm filak tehe blay le du, ominen tódô lemwót na a mówól lihol.

⁶ Yóm filak tudà Judas, gotu bud nulut yó kem geta bè yó kem gel demsù ebè Dwata ne mon le, “Là hyuhen bè yóm hlau tekuy ke homong te bè yóm filak gel blay le ke Dwata yóm filak ni, yakà filak bli litò tau du.”

⁷ Yó deng kessatul le du yóm filak yó, tódô bli le tonok mò gónó le lembeng ke wen tau là Juhen matay belê le. Yó boluyen yóm tonok benli le, Tonok yóm Tau Gel Mifil Kuleng.

⁸ Okóm yó tles boluy le du, Tonok Bli Litò, efet yóm kmoen ni.

⁹ Yóm nmò le yó deng gónóhen dohò yóm tehe mon yóm sotu tehe gna tugod Dwata boluyen Jirimaya,

“Nwa le yóm tlu folò filak mgel yó, yó se kul btes du yó kem tau Israél.

¹⁰ Ne bli le tonok yóm tau gel mifil kuleng.

Lómón se yóm deng kun kehlan du Dwata.”*

Ksólók Paylét ke Jisas
(Mark 15:2-5; Luk 23:3-5; Jan 18:33-38)

¹¹ Lemwót ke Jisas, nit le ebè solu Paylét, yóm tau lemwót bè Rom gubérnor belê le. Snólók Paylét Jisas, monen, “Uu kô tau hol geta bè yó kem Ju?”

Mon Jisas se, “Yó sii deng monem.”

¹² Okóm là kô bnalaen kul yó du kem dê tifù le du yó kem geta bè yó kem gel demsù ebè Dwata ne yó kem tuha gónó le gel galak.

¹³ Yó gónó Paylét bud mon du mò ke Jisas, “Gungolem kô yó kem tey dê tifù le kóm?”

¹⁴ Okóm là dog bnalà Jisas kul, balù sek-teb. Ya tey ketnga yóm gubérnor yóm là dog kbalà Jisas kul.

Tódô hatay yóm kkukum le ke Jisas
(Mark 15:6-15; Luk 23:13-25; Jan 18:39-19:16)

¹⁵ Yó kun adat yóm gubérnor ke sok gel kól yóm mò ken bong bè Kdaw Khius, sal gel wen tau blanggù hefewaen, bede yóm tau kul nélék yó kem tau.

¹⁶ Bè yóm kdaw yó, wen sotu tau blanggù ali tótól, boluyen Jisas Barabas.

¹⁷ Timbow le deng gotu stifun ebè yó yóm tey tau wen, snólók Paylét lu, monen, “Tau du de kuy nóyò mò hewau belê ye, Jisas Barabas duhen ke Jisas yóm Misaya?”

¹⁸ Deng tódô tngón Paylét se yóm ali kélés nawa le ke Jisas yó kem tau mit du ebéléen yó.

¹⁹ Yóm igò Paylét tolo myón bè yóm gónón myón kmukum, wen sulat hwit yehenen ebéléen, monen, “Hol béi abay gbót hem-sidek du kóm yóm tau laen dù salaen yó. Tey sidek kegnómu du ebuteng lemwót bè yóm keknahu du.”

²⁰ Okóm yó nmò yó kem geta bè yó kem gel demsù ebè Dwata ne yó kem tuha gónó le gel galak, nofong le yó kem tau sbung bè yó anì yó hni le Barabas, ne fen hfatay le Jisas.

²¹ Bud snólók Paylét yó kem tau sbung bè yó, monen, “Mahi du bè ni kem lewu tau monu ni koni mò hewau ebélé ye?” Mon le se, “Barabas.”

²² Ne mon Paylét, “Tedu se tô kmou ke Jisas du, yóm bnoluy le Misaya?”

Deng mom yó balà le du, mon le, “Htutukem bè kros kun yó du.”

²³ Bud snólók Paylét belê le, monen, “Moen de? Tedu deng salaen belê ye?”

Okóm deng mom lenwè le hetè, mon le, “Tódô htutukem bè kros ne.”

²⁴ Timbow ton Paylét yóm là kegbeken hewà ke Jisas, ne dilóen bè yó kem tey tau sbung bè yó wen tó sidek nmò le béleén ke là nmungen du yóm kul knóyò, yó gónón tódô ma él, ne noloben tdoken lem mata le,

* 27:10 Jirimaya 32:6-9, Sikaraya 11:12,13.

monen mò kul, “Laen dù dou du bè yóm khatay ye du nim tau ni. Tódò kuy nbò yóm kgamà litóen.”

²⁵ Ne mon le se, “Tódò kum nbò ne litóen nim tau ni, dalang se kem kum ngà.”

²⁶ Omin Paylét hewà ke Barabas ebélé le, ne nan na habid hfes Jisas, ne ominen bemlay du ebè yó kem sendalù mò na e tmutuk du bè kros.

Kehlowon le ke Jisas yó kem sendalù
(Mark 15:16-20; Jan 19:2,3)

²⁷ Lemwót yó kem sendalù Paylét, nwit le Jisas elem yóm gónò bong yóm gubérnor, ne gotu le sbung ebè yó se kul yó kem dumu sendalù bè yóm kul bung.

²⁸ Ne kó le nes Jisas, hesek le du yóm nes tógó hulò, hningón nmò le tau hol geta.

²⁹ Ne lenikin le yóm sotu kay tinu semnual mò kuruna suub le bè kuluhen, ne wen fes hogot le du bè sigel kwananen. Gotu le mtud bukòl bè soluhen, hningón tó nmò le béléen yóm gel kadat le yóm tau hol geta. Ya tey kehlowon le du, mon le, “Ni sii yóm tau hol geta bè kem Ju. Yake hol tahà klowlilen.”

³⁰ Lel le semdulak du, bud na le yóm fes hogot le du, bud sensulit fes le te kuluhen.

³¹ Timbow le deng tmakas hmowon du, omin le bud mlus yóm nes hesek le du, bud hesek le du yóm sana kun nes. Kewót le bè yó ne tódò nit le ebè yóm gónò le tmutuk du bè kros.

Ktutuk le ke Jisas bè kros

(Mark 15:21-32; Luk 23:26-43; Jan 19:17-27)

³² Yóm tolo knò le bè lan, geslong le yóm sotu tau boluyen Simun, lemwót bè Sayrin.* Tódò gnaga htihang le du yóm kros Jisas.

³³ Ngangen ne gefet le bè Golgata. Yó lanen yóm boluy yó, “Bangag Kulu.”

³⁴ Wen tó hinum le ke Jisas yóm ninum lóbò, wen bolen yóm sotu kay bulung héét. Bè yóm ktílów Jisas du, là dog henlós ninu-
men du.

³⁵ Omin le tmutuk du bè kros. Yó nmò yó kem sendalù, sensatù le yó kem nes Jisas.

³⁶ Tikóng deng yó, tódò le myón bè yó, bnentey le kmò Jisas.

³⁷ Wen snulat dket le senta kuluhen yóm udél duón le du, yó monen, “Ni se Jisas, tau hol geta bè yó kem Ju.”

³⁸ Ne wen lewu tau gel mò sidek homong tnutuk le, sotu hteg le fi bè kwananen, ne sotu se fi bè iwóngen.

³⁹ Yó kem tau gel mius bè yó, sónmò le kmotuk, ne sendekà le Jisas, tey dè udél le sidek ebéléen.

⁴⁰ mon le, “Uu kun tó gambà du yóm Gónò Dwata, ne tek tlu kdawem bud hdà du. Yó

ne, lenwaem knóem kun ke tahu uu se yóm Ngà Dwata. Kmóhi elaan dé.”

⁴¹ Senged se kul kehlowon du yó kem geta bè yó kem gel demsù ebè Dwata, ne yó kem gel tmlók hlau, ne yó kem tuha gónó le galak.

⁴² Yó mon le, “Deng gel hlowilen kem dumu tau, là kò dog gbeken hlowil kun knò. Du kò kun tau hol geta bè yó kem tau Israél? Hentahu tekuy ke gbeken bud kmó elaan.

⁴³ Gel smalig bè Dwata kun, ne du kun yóm Ngà Dwata. Nénég ke móyò Dwata lemwà du.”

⁴⁴ Balú yó kem lewu tau gel mò sidek gomong tnutuk le bè Jisas, gbót le semdekà se kul.

Katay Jisas

(Mark 15:33-41; Luk 23:44-49; Jan 19:28-30)

⁴⁵ Tikóng deng gtungu kdaw, tódò kmifu talak tonok efet sóól mosol kdaw.

⁴⁶ Timbow deng sóól mosol kdaw, omin Jisas hgel udélen, monen bè hol kun udél, “Eli, Eli, lema sabachthani?” Yó lanen yóm udélen yó, monen, “Ó Dwata, Ó Dwata, moen de ke tódò bayaem ou?!”

⁴⁷ Wen kem tau mdà bè yó mungol du yóm udél Jisas yó, mon le, “Éhé, tnbahen llaydya.”

⁴⁸ Ne wen sotu bélé le bè yó kendel ma yóm lómón tó gófós, ne duen lem yóm ninum lóbò là mebetesen, ominen hemsù du bè tukò yóm ngà koyu mò gónón tó hsef du ke Jisas.

⁴⁹ Okóm mom mon kem dumu tau, “Tagad dé. Nénég tekuy ke sut llaydya mò lemwà du.”

⁵⁰ Omin Jisas bud hgel du udélen, ne tódò milot se nawahen.

⁵¹ Uma kóm bè yóm Gónò Dwata, wen tey nes mfól mò seng yóm dfél hetfing le ebè Dwata. Bè yóm kilot nawa Jisas, tódò sen-gengen lómón ke hninggel dnólóhem bè gónón sóól yóm nes yó, lemwót fi ta kól elaan. Ne tódò sen-gengen se mbel tey linol bong, tódò gotu meskang se yó kem botu lembang.

⁵² Ne gotu setngag yó kem kilib gónó le lembeng, ne tey dè bè yó kem kun tau Dwata deng tehe matay, gotu bud hlowil Dwata lu.

⁵³ Tódò le gotu hewà bè yó kem lebeng le. Ne kogol yóm deng klowlil Jisas, mógów le ebè Jirusalim se kul, ne tey dè tau mton kul.

⁵⁴ Bè yóm kehto Jisas, tolo mentey yóm kfitan, mung du yó kem sendaluen. Ya tey sidek klikò le bè yóm tey linol ne yó kem dè dumu ton le. Botong mon le, “Tahu duhen ni se yóm Ngà Dwata.”

* 27:32 Yóm Sayrin ni, sotu syudad là sekna bè benwu Libya bè Afrika. * 27:46 Lingón 22:1.

⁵⁵ Wen se kem libun nô bè yó, olo le tódô temngel mayuk. Tehe le mung ke Jisas lemwót gu bè Galili mò gel tmóbóng du.

⁵⁶ Mung kul se yóm Midi lemwót gu bè Megdala, ne yóm sotu Midi, Yê Jim ne Jusif, ne mung kul snéen yehen Sibidi.

Kebeng le ke Jisas

(Mark 15:42-47; Luk 23:50-56; Jan 19:38-42)

⁵⁷ Tikóng móyón kimel, wen sotu tau kwasa lemwót bè Arimatiya sut bè yó, boluyen Jusif. Du se sotu tau gel lemolò ke Jisas.

⁵⁸ Tódô mógów ebè Paylét nan e bal du yóm kwahen yóm lówó Jisas. Tahu se, hlus Paylét du.

⁵⁹ Kewót Jusif bè yó, mógów ebè tum gónô Jisas nô, ne nwahen elaan yóm lówóhen, ne bnausen yóm nes bukay hanà lomi.

⁶⁰ Uma kóm deng wen kilib lomi hokol Jusif bè but léhék mò tô kun angkat gónô lebung, ne tódô bè yó gónón lembeng ke Jisas. Ne wen botu bong hluyen ebè yóm bak lebung mò sengen, ne ominen yó lemwót mulék.

⁶¹ Mung le lembeng se kul le Midi lemwót bè Megdala ne yóm sotu Midi. Myón le bè yó, smolu le ebè yóm bak lebung.

Kbentey yó kem sendalù yóm lebung Jisas

⁶² Timbow deng hayahen bè yó, uma kóm kul Kdaw Kehegnô yó kem Ju, gotu le mógów ebè Paylét yó kem geta bè yó kem gel demsù ebè Dwata ne yó kem Farisi.

⁶³ Mon le mò du, “Ó Sér, gtulón bè nawa me yóm tehe monen tum tau mò kéng tu yóm kegenen tolo mowil, ‘Bè getluhen kdaw, bud hlowlil Dwata ou.’

⁶⁴ Yó gónóm mon, holi mdók kut sendalù etu bè lebengen mò mentey du efet tlu kdaw ani laen dù lan le mnagaw lówóhen yó kem tehe gel lemolò du, ne omin le yó bud tmulón du kem tau yóm deng klowlilen. Ke yó tô nmò le, milud he kegsukat kem tau senta yóm gnan.”

⁶⁵ Mon Paylét se mò kul, “Yó ne, mit ye sendalù ani hol bnentey le tum lebengen.”

⁶⁶ Tahu se, lemwót le. Ya tey bud kehget le du yóm seng bè bak lebung Jisas. Wen deket nmò le bè baken ani dilò le ke wen tau tô mkó du. Ne wen kem sendalù tebel le mò mentey bè yó.

28

Klowil Jisas

(Mark 16:1-10; Luk 24:1-12; Jan 20:1-10)

¹ Timbow kogol yóm Kdaw Kehegnô, yóm hanà tolo minal mwas bè Akad, lemwót Midi, yóm Midi lemwót bè Megdala, ne yóm sotu Midi, tódô le temkifu na le e nauy lebung Jisas.

² Timbow le kól ditu, tódô mbel tey linol bong. Ne wen hógów Dwata htuntun gu bè longit sut bè yó, tódô hluyen yóm botu seng bè bak lebung, ne tódô bud myón taken.

³ Tey mnóng lem uyóhen yóm hógów Dwata yó, hol lómón ke mkal silà, ne tey sminang bukay yóm nesen.

⁴ Ya tey sidek klikò le yó kem sendalù mentey bè yó, tódô setbol kkel le, ne tódô le gotu masà bè tonok, lómón ke deng le gotu matay.

⁵ Ne mudél yóm hógów Dwata ebè yó kem libun, monen, “Bè ye abay hlikò. Tngónu hnebel ye Jisas, yóm lomi tnutuk le bè kros.

⁶ Là buden nô bè ni ne. Deng hlowlil Dwata lómón yóm tehe mon Jisas mò kuy. Ngem ni hnénéng ye yóm tehe gónón masà.

⁷ Géhé! ye mulék ne, ne tulón ye yó kem gel lemolò du, mon ye mò kul, ‘Deng hlowlil Dwata Jisas. Deng gna bé!é ye ne ebè Galili, ditu he gónó ye ston du.’ Hol bê ye na a klifót yóm deng tulónu kuy ni.”

⁸ Tahu se, kendel le lemwót yó kem libun. Ya tey klugal le, mung du yóm klikò le. Tódô le mlóy na le e tô tulón yó kem gel lemolò ke Jisas.

⁹ Bè yóm igò le mlóy, tódô senlong Jisas lu, ne monen mò kul, “Dwata he henek nawa ye.” Tódô le hloni ebé!éen yó kem libun, mtud le bukòl bè soluhén, ne nogot le tihen.

¹⁰ Mon Jisas mò kul, “Bè ye abay hlikò. Na ye e tulón dou tu kem dumuhu setwoli ani mógów le ebè Galili. Ditu he gónó le mton do.”

Kul tulón yó kem sendalù mentey bè lebung Jisas

¹¹ Tikóng le deng lemwót yó kem libun yó koni, wen bè yó kem sendalù tehe mentey bè lebung Jisas mulék ebè Jirusalim, mógów le ebè yó kem geta bè yó kem gel demsù ebè Dwata, tódô gotu tulón le kul yóm kdéén.

¹² Omin le gotu bud stifun se kul yó kem geta bè yó kem gel demsù ebè Dwata ne yó kem tuha gónó le gel galak, sensatul le yóm mò kmò le du. Yó nmò le, wen tey filak blay le bè yó kem sendalù,

¹³ ne mon le mò kul, “Yó hol tulón ye bè yó kem tau, deng hennagaw yó kem tehe gel lemolò du yóm lówó Jisas igò ye tolo lemnga tungò.

¹⁴ Ke gungol yóm gubérnor nim ni, mi he hemyu stulón bé!éen ani laen dù gfa ye.”

¹⁵ Tahu se, nwa yó kem sendalù yóm filak, tódô lolò le se yóm deng hlau le kul. Yó se hlós tulón tendo hból yó kem Ju efet nim kmoen ni.

Kehegfan Jisas bè yó kem gel lemolò du
(Mark 16:14-18; Luk 24:36-49; Jan 20:19-23; Kul Nmò 1:6-8)

¹⁶ Lemwót yó kem sfolò sotu dù lemolò ke Jisas, mógów le etu bè yóm sotu bulul bè

Galili, yóm bulul tehe eles tulón Jisas kul mò gónó le angkat ston du.

¹⁷ Timbow ton le Jisas bè yó, ya tey kdóyón le du. Okóm wen se bélê le tolo megewu nawa le du yóm deng bud klowilen.

¹⁸ Hloni bélê le Jisas, ne monen mò kul, “Deng gotu blay Dwata do yóm kwalis mogot longit ne tonok.

¹⁹ Yó gónóm mon, mógów ye do ebè kdéen

but tau bè klamangen benwu anì baling le tau lemòlò do. Bnabtays ye lu hlan ye bè boluy Dwata, yóm Mà tekuy, ne bè boluy yóm Ngaen ne bè boluy yóm Tulusen.

²⁰ Ne yóm kdê deng hlauhu kuy, hol tolok ye kul anì hol nimón le se kul. Ne laen kô mtukul sónen yóm knóu bélê ye efet kól bè yóm hol són kdaw.”